

## Dill' wen dill' kob daa bzej Lúcaza'

*Dga bzej Lúcaza' na' bse*leen lao Teófilona'

<sup>1</sup> Ben' zan ba goklall'gake' wzejgake' to to diika' ba gok ladjnto'ni <sup>2</sup> kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'. <sup>3</sup> Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki, <sup>4</sup> kwenche inezilo' daa ba bli' bsemi'gakile' li' nakan dowalj dii li.

*Wdixjee anjla' galj Juanna'*

<sup>5</sup> Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xooole', Elizabeta', lekzka' goke' xiñ dia che dii bñoz Aaronna'. <sup>6</sup> Na' chop xooltie' chongake' wen lao Chioza', na' chongake' yog'lotte daa nllie' bia'. <sup>7</sup> Na' aga no xiingake' wzoa daa nak Elizabeta' nool will; na' ba naktegage' ben' gol.

<sup>8</sup> Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake', <sup>9</sup> bengake' to wyitj, ka yoologake' chongake', kwenche got'bia' noe' yido' lljlo' llen yala' loo lill xlatj Xancho Chioza'. Na' bidol' Zacaríaza' gone'n. <sup>10</sup> Na' shlak chgwee llen yala' loo yoodo'na', ben' zan bgaan chyoole' choe'llwillgake' Chioza'. <sup>11</sup> Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake' yala'. <sup>12</sup> Ka ble'i Zacaríaza' anjla', bikzə bi billet-lallee gone' daa le bllibe'. <sup>13</sup> Na' anjla' chi'ene':

—Bi illebo' Zacarías, la' Chioza' ba bzenague' daa chṇa-bilo'ne', na' xoolo' Elizabeta' sane' to xiino' na' wsi'ob' Juan. <sup>14</sup> Na' yibachgailo' kat' galjb', na' lekzka' ben' zan yibayi, <sup>15</sup> la' xiino'na' gakb' to ben' zakii lao Chioza'. Bi chiyal' wnixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjlb'. <sup>16</sup> Na' yigoob' ben' zan xiin dia che Israela' lo xnez Chioza', beena' nak Xangake'. <sup>17</sup> Na' kwialob' lao Xanchona', na' soalen Espíritu che Chioza' leb' ka wzoalene' Elíaza', na' gapb' ye!' wak ka daa wdape'. Na' ye'b' ben'ka' bi zoen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

<sup>18</sup> Na'ch che' Zacaríaza' anjla':

—¿Nakra gak inezid' shi lezkilo'n?, la' ba nak' ben' gol na' lekzka' nool cha'na'.

<sup>19</sup> Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni. <sup>20</sup> Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

<sup>21</sup> Na' ben'ka' lle' chyoolə chbezgake' yichej Zacaríaza', gokllejgakile' daa wllaile' loo yoodo'na'. <sup>22</sup> Na' ka bicheje' bich chak inie', senzə chone', na' gokbe'gakile' nan no-chodan' bli'lao le' loo yoodo'na'.

<sup>23</sup> Na' ka biyoll ben Zacaríaza' daa llia bia' gone' yoodo'na', na'ch biyaje' lille'na'. <sup>24</sup> Na' ka wde gok diiki, na' bia' xoolo', Elizabeta'. Na' lao gay' beo' bichkzə ga bcheje', na' wne': <sup>25</sup> “Xancho Chioza' ba goklene' nad' kwenche bich sia' ye!' zto' lao ben'.”

*Wdixjee anjla' galj Jesúza'*

<sup>26</sup> Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana', <sup>27</sup> gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'. <sup>28</sup> Na' wyoo anjla' gana' zoa Maríana' na' chi'ene':

—iChwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lohte nool.

<sup>29</sup> Na' Maríana' bibanile' daa golle'ne' ka', na' gokile' berache naz beeni nad' ka'. <sup>30</sup> Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'. <sup>31</sup> Na' naa woo to bdo' na' kat' galjb' na' wsi'ob' Jesús. <sup>32</sup> Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho Chioza' gone'b' to ben' wñabia' ka dii xozxto'b' Davina' <sup>33</sup> kwenche toshiizi inabia'b' le' ben' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

<sup>34</sup> Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

<sup>35</sup> Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi ben' choo ben' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios. <sup>36</sup> Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e. <sup>37</sup> Aga bi de dii bi chak gon Chioza'.

<sup>38</sup> Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

*Jawia Maríana' Elizabeta'*

<sup>39</sup> Na' lii wza'te Maríana' wyaje' to yell dii llia yaa yao che Judeana'. <sup>40</sup> Na' blline' lill Zacaríaza' na' bwape' Elizabeta' chiox. <sup>41</sup> Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena', <sup>42</sup> na' wñie' zillj, chi'ene':

—Chioza' ba benleeyche' li' ladj yog'lo' nool, na' lekzka' bdo' cho'na'. <sup>43</sup> ¿Nora nak' nad' zidwia'zə xna' Xan'na' nad', lla? <sup>44</sup> La' kon ka bwapo' nad' chiox, lii bxit'te bdo' cha'ni loo li'ani daa chibaib'. <sup>45</sup> Chakomba li' wyajli'o ka wna anjla', la' yog' daa wna Xanchona', aga wde bi gakan.

<sup>46</sup> Na'ch wna Maríana':

Do yichj do lallaa choe'lawaa Xancho Chioza'.

<sup>47</sup> Chibayi yichjlall'dawaani lao Chioza', beena' chisla nad'.

<sup>48</sup> Ba biyesh'lallile' nad' nak' xmose',  
naa solo yog' ben' ine' nad': “Chakomba li'.”

<sup>49</sup> La' Chioza', beena' nap yel' wak choo yel' wak xen, ba bene' dii wen inleeb cha'.

Nake' liizelozi ben' li ben' shao',

<sup>50</sup> na' chiyesh'lallile' yog'te ben'ka' chall chlebgake'ne'.

<sup>51</sup> Dii zakii nleeb ba benlene' yel' wak che'na'.

Ba bchinj bselle' yog'lo' daa nan gon ben'ka' chep cha'lall'.

<sup>52</sup> Ba bikwase' yel' wñabia' che ben' wñabia'ka',  
na' ben'ka' ble'gakile' nakzi, Chioza' ba bene' legake' ben' zakii.

<sup>53</sup> Na' ben'ka' chbil' chdon, ba bzhesh bzeljile' legake' kon dii wen dii shao' che'na',

na' bilague' ben' wni'aka' to ka cha'gake'.

<sup>54</sup> Ba goklene' cho' ben' Israel, cho' nakcho xmose',  
na' toshiizi chiyesh'lallile' cho',

<sup>55</sup> kon ka bchebe' gone' che dii xozxto'cho Abrahamana'  
na' yog' ben' zizaak lo dia che'na'.

<sup>56</sup> Na' Maríana' bgaane' ka do shon beo' lill Elizabeta',  
na'ch bizee ziyaje' lille'na'.

*Golj Juanna'*

<sup>57</sup> Na' ka bllin lla wxan Elizabetha', wxane' to bi' by-  
odo'. <sup>58</sup> Na'ch ka wnezi ben' wlill che'ka' na' ben' dialla  
che'ka', wyajgake' bibalengakile'ne' daa ba biyeshii Xan-  
cho Chioza' le'. <sup>59</sup> Na' ka gokib' to xman, jloogake'b' sen  
daa ne' circuncisión, na' goklall'gake' wsi'gake'b' Zacarías  
ka le xabaa. <sup>60</sup> Na' che' xna'baa:

—¿Bi gakan! Juanan chiyal' wsi'nto'b'.

<sup>61</sup> Na' gollgake'ne':

—¿Biche wsi'zo'b' ka'? La' aga no dialla cho' le ka'.

<sup>62</sup> Na'ch bengake' sen kwenche wñabgakile' xabaa bi  
cheenile' wsi'e bdo'na'. <sup>63</sup> Na'ch wñabe' to yagla'do'  
kwenche bzeje'n, na' daa bzeje' nan: “Juanan wsi'nto'b'.”  
Na' yog' ben'ka' bibani. <sup>64</sup> Na' lii gokte bine Zacaríaza',  
na'ch wzoloe' choe'lawee Chioza'. <sup>65</sup> Na' ben' wlill che'ka'  
bllebgake' ka nak daa gok, na' yog' yellka' lle' ladj yaa yao  
che Judeana' wze dill' ka gok. <sup>66</sup> Na' yog' ben'ka' beni ka  
gok, gokgakile':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza' leb'.

*Daa wna Zacaríaza'*

<sup>67</sup> Na' Espíritu Sántona' wñabi'e yichjlall'do' xab'  
Zacaríaza' na' bi'e cho'a xtill' Chioza', wne':

<sup>68</sup> Choe'lawaa Xanchona', beena' nak Chios checho, cho'  
ben' Israel,  
la' ba bide' ladjchoni, cho' nakcho ben' yell che', kwenche  
yisle' cho' lawi dii mala'.

<sup>69</sup> Na' ba bselee to ben' nap yel' wak xen yisle' cho',  
na' zee lo dia che dii Davina', beena' gok xnose'.

<sup>70</sup> Ba chak ka bchebe' gone' kani'yi daa golle' dii ben'ka'  
wdixjee cho'a xtilleena', ben'ka' gok lall' nee.

<sup>71</sup> Bchebe' yisle' cho' lao ben'ka' bi chle'shii cho', na' lao  
yog' ben'ka' chakzi' chakzbani cho'.

<sup>72</sup> Na' golle' dii xoxxto'choka' yiyeshile' legake',  
na' bi gal-lallee ka nak diika' bchebe' gone'.

<sup>73</sup> Ki nak daa bcheb Chioza' gone' che dii xoxxto'cho  
Abrahama':

<sup>74</sup> Bchebe' yisle' cho' lao ben'ka' bi chle'shii cho'  
kwenche we'la'ochone' na' bibi wwall wsheban cho',

<sup>75</sup> na' gon kwincholall' nee na' goncho ka yiyoollallile'  
shlak mbancho.

<sup>76</sup> Na'ch Zacaríaza' chi'e bdo' che'na':

Na' li', xiindawaa, ina ben'li' ben' chyixjee daa na Chioza',  
beena' nak liizelozi ben' choo ben' xen.

Na' kwialozego' lao Xanchona' kwenche wzenaggake' che'  
kat' zee.

<sup>77</sup> Wzenilo' ben' wlall chechoka' daa chiyal' gongake'  
kwenche yizi'xen Chioza' saaxya che'ka' na' yisle' legake'  
bi tegake' lo yel' zak'zi'na'.

<sup>78</sup> La' Chios chechona' chakile' cho' na' chiyesh'lallile'  
cho',

na' wselee to ben' za' yabana' nsee to beeni' che  
yichjlall'do' ben' yell-lioni

<sup>79</sup> kwenche sho' beeni'na' loo yichjlall'do' ben'ka' chda  
gani nak shgasj shchoł ni che dii mala' daa nsa' yel'  
wit,

na' wliile' cho' nez li che'na' na' soacho mbalaz.

<sup>80</sup> Shlak bgol Juanna', ben Chioza'ne' ben' wal. Na'  
wzoe' to latj gana' bibi chashj chleb axt ka bllin lla wzoloe'  
be'lene' ben' Israelka' cho'a xtill' Chioza'.

## 2

### *Golj Jesúza'*

*(Mt. 1:18-25)*

<sup>1</sup> Kana' chnabia' César Augústona', bene' byen ibab bal  
ben' lle' to to yell doxen yell-liona' gana' chnabi'e. <sup>2</sup> Na'  
ka wbabgake' dii nech, beena' le Cirenio nake' gobernador

che Síriana'. <sup>3</sup> Na' benan byen biyaj yog' ben' yell che chégake' kwenche jada' lie'ka'. <sup>4</sup> Na' daa nak Joséna' xiin dia che dii Davina', bizee yell Nazareta' daa llia gana' mbani Galileana', na' biyaje' yell Belénna' gana' golj dii Davina', daa llia gana' mbani Judeana'. <sup>5</sup> Na' kwenche ibabgake' biyaje' yell Belénna' len Maríana', beena' ba nakan ikee. Na' Maríana' ba no'e. <sup>6</sup> Na' shlak zoagake' Belénna', bllin lla sane'. <sup>7</sup> Na' wxane' to bi' byodo' nakb' bi' nech, na' btobe'b' lechaa na' wdixje'b' gana' chao bayix'ka', la' bich bi latj bllel gana' chigaan ben'.

*Jtixje'i anjla' ben'ka'* chap xil'ka' ba golj Jesúza'

<sup>8</sup> Na' lle'na' goljb', gaozə yell Belénna' lle' xonj ben' chapgake' xil' che'ka'. <sup>9</sup> Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le bllebgake'. <sup>10</sup> Na' che' anjla' legake':

—Bi illeble, la' zidtixje'id' le' dill' wen dill' koba' daa gonan ka yibachgayi yog' ben'. <sup>11</sup> La' naa yell che dii Davina' ba golj beena' yisla le' lao dii mala'. Na' len' Xancho Crístoná', beena' chbezle wsel' Chioza'. <sup>12</sup> Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

<sup>13</sup> Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

<sup>14</sup> ;We'la'ocho Chioza' zoa yabana'!

Mbalaz ben'ka' zoa yell-lioni, ben'ka' ba bli'yi Chioza' yel' goklen che'na'.

<sup>15</sup> Na' ka biza' anjlka' ziyajgake' yabana', na'ch che' ljwell ben'ka' chap xil'ka':

—Li yidoshki Belénna', li sho' diwiashki daa ba gok, daa ba wdixje'i anjl che Xanchona' cho'.

16 Na'ch ziyajdogake' Belénna' na' bllingake' gana' zoa Maríana' len Joséna', na' bdo'na' deb' gana' chao bay-ix'ka'. 17 Na' ka biyoll ble'gakile'b', na' be'gake' dill' lao ben' wlall che'ka' daa goll anjla' legake' che bdo'na'. 18 Na' yog' ben'ka' beni ka wna wap xil'ka' bibangakile' ka dillaa be'gake'. 19 Na' Maríana' kon ka biyoll bzenague' dill'ka' na' bgaanán loo yichjlall'do'ena', na' gokile' bera zejín dga. 20 Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

*Jwa'gake' Jesúza' yoodo'na'*

21 Na' ka gokib' to xman, wloogake'b' sen daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

22 Na' kon ka na ley che dii Moiséza' gongake', wlezgake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'. 23 Bengake' ka, la' ley che Xanchona' nan: “Bi' byo nech che yog'lol' ben', chiyal' gongake'b' lo na' Chioza'.” 24 Na' jaake' je'la'ogake' Xancho Chioza' jengake' ka na leya' daa nan chiyal' witgake' chop ngolbex wa chop palom.

25 Na' kana' jwa'gake' Jesúza' yoodo'na', zoa to ben' le Simeón Jerusalénna'. Nake' to ben' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' ben' Israelka'. Na' zoalen Espíritu Santo che Chioza' le'. 26 Na' Espíritu Sántona' ba bzenile'ne' nan aga wete' shi bin' ile'ile' Crístona', beena' chbezgake' wsel' Xancho Chioza' kwenche inabi'e. 27 Na' Espíritu Sántona'kz bseleene' yoodo'na', na' na' zie' ka bllinlen xaxna' Jesúza' leb' kwenche gongakile'b' ka na leya'. 28 Na'ch b'len Simeónna' leb' na' be'lawee Chioza', chi'e: 29 Chios cha', be' latj guet' mbalaz naa, la' ba beno' daa bchebo' gono' cha', nad' nak' xmoso'.



<sup>30</sup> La' ba ble'id' beena' yisla neto',

<sup>31</sup> beena' ba bseloo lao yog'lol' ben' yell-lioki.

<sup>32</sup> Len' kwee beeni'na' loo yichjlall'do' ben'ka' bi nakgake' ben' Israel.

Na' gone' ka neto' ben' Israel sho'nto' balaan, neto' naknto' yell cho'.

<sup>33</sup> Na'ch Joséna' len xna'ba bibangakile' ka nak daa wna Simeónna' cheb'. <sup>34</sup> Na'ch wnabi Simeónna' Chioza' gaklene' legake', na' chi'e Maríana', xna' Jesúsza':

—Ba nchogbi'a Chioza' che bi'do'ni gom' kwenche zan ben' Israelka' kwiayi'gake' na' lekzka' zane'yila. Na' wliib' ben' ka nak yel' wak che Chioza', na' ben' zan inegake' zban cheb' na' bi shajle'gake' cheb', <sup>35</sup> na'ch gakbia' ka chza'lall' ben' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

<sup>36</sup> Na' lekzka' yoodo'na' zoa to nool goldo', ben' chyixjee daa che' Chioza'ne', na' lie' Ana. Nake' xiin dii Fanuela' na' xiin dia che dii Asera'. Ben' xkwid'ze' bshagnee, na' gall yizchga wzoalene' ben' che'na' ka wite'. <sup>37</sup> Nake' noolə wizeb na' ba gokile' taplalj tap yiz. Na' toshiizi zoe' yoodo'na', na' ka wal' ka tella zoe' choe'lawee Chioza', na' tlizi chzoe' wbas' na' choe'lwille'ne'. <sup>38</sup> Na' lekzka' wbiguee kwite'ka' na' bi'e Chioza' yel' choxken daa ba bselee beena' gaklene' ben' Israelka'. Na' bi'e dill' che Jesúsza' lao ben' Jerusalénka', ben'ka' chbez wsel' Chioza' beena' yisla legake' lao dii mala'.

### *Biyajgake' Nazareta'*

<sup>39</sup> Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'. <sup>40</sup> Na' Jesúsza' bgolb' na' zejch gokb' bi' wal na' bi' sin', na' le goklen Chioza' leb'.

*Jesúza' jashaljlem' ben' sin'ka' yoodo'na'*

<sup>41</sup> Xaxna' Jesúza' chajgake' Jerusalénna' yog' yiz kat' chal' lni Paskwa'. <sup>42</sup> Na' ka goki Jesúza' shllin yiz, wyajlengake'b' lnina' kon ka yoologake'. <sup>43</sup> Na' ka wde lnina' biza' xaxna'baa, na' bi gokbe'gakile' bigaan Jesúza' Jerusalénna'. <sup>44</sup> Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na' ben'ka' nombia'gake' <sup>45</sup> aga billelgakile'b'. Na' bibiigake' jadiljgake'b' Jerusalénna'.

<sup>46</sup> Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtillleeka' na' chnabib' legake' che daa choe'gake' dill'. <sup>47</sup> Na' yog' ben'ka' chzenag xtill'baa chibangakile' ye! chajni che'baa na' ka chilliib' xtill' ben'ka' chli' chsedi leya'. <sup>48</sup> Na' ka ble'i xaxna'baab' bibangakile'. Na'ch che' xna'baa:

—Xiindawaa, ¿biche benzilo' neto' ka'? Xo'ni na' nad' ba gokshejlall'chgainto' biyiljnto' li'.

<sup>49</sup> Na'ch che' Jesúza' legake':

—¿Biche chiyiljzle nad'? ¿Abi nezile chiyal' soa' lill Xa'na'?

<sup>50</sup> Na' aga wyajni'gakile' bi zejin daa gollb' legake'.

<sup>51</sup> Na'ch Jesúza' biyajlem' legake' Nazareta' na' bzenagb' chegake' toshiizi. Na' xna'baa aga go!-lallee diika' gok. <sup>52</sup> Na' Jesúza' zejch bgolb' na' wdapchb' ye! sin', na' Chioza' bibachile'b', na' lekzka' bibayi ben' leb'.

### 3

*Juanna', beena' bchoa ben' nis*

(Mt. 3:1-12; Mr. 1:1-8; Jn. 1:19-28)

<sup>1</sup> Na' ka gok shin' yiz chnabia' César Tibériona', na' Poncio Pilátona' chnabi'e gana' mbani Judéana', na'

Heródeza' chñabi'e gana' mbani Galileana', na' ben' bishee Felípena' chñabi'e gana' mbani Ituréana' len Tracónitena', na' Lisániaza' chñabi'e gana' mbani Abilíniana',<sup>2</sup> na' Anáza' len Caifáza' nakgake' b̄xoz choo b̄xoz xen che ben' Israelka'. Na' kana'yen' w̄ne Chioza' Juanna', xiin Zacaríaza', kana' zoe' to latj gana' bibi chashj chleb.<sup>3</sup> Na'ch wyaj Juanna' jte' doxen yell-liona' de cho'a yao Jordánna' na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' chegake'.<sup>4</sup> Bene' kon ka bzej dii Isaíaza' gana' nan:

To ben' gosyee latja' gana' bibi chashj chleb, na' ine':

“Li se kwas wzenagle che Xanchona'

na' wsalj yichjlall'do'leka' kat' zee.

<sup>5</sup> La' le' gone' ka chon ben' chillee ga nak xitj yao,

na' ka ben' chchinj yaa kwenche chileshe'n.

Na' chilie' yog'lol' nez dii nyok nlew,

na' chillee xitjka' chi' lo neza'.

<sup>6</sup> Na' yog'lol' ben' ile'gakile' ka gon Chioza' yisle' ben' lawi dii mala'.”

<sup>7</sup> Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—¡Le' naklikzle ka bel zn̄ia! ¿Achakile wak wxonjile'

yel' zak'zi' daa wsel' Chioza'?

<sup>8</sup> Li gon ka gakbe'i ben' nan dii li ba biyaj bilenile'.

Na' bi gakzile bibi yel' zak'zi' ile'ile daa in̄azle: “Neto' naknto' xiin dia che dii Abrahama'.”

Ni in̄ia' le' axt yajki wak gon Chioza' xiin dia che dii Abrahama'.

<sup>9</sup> Yog'lol'-le shi bi chonle ka chiyoolallii Chioza' na' gak chele ka chak che to yag dii choe' dii zix

dii bi nak wen, na' lii chchogtegake'n na' chzal'gake'n lo yi'na'.

<sup>10</sup> Na' ben'ka' chzenag xtill' Juanna' che'gake'ne':

—¿Beran chiyal' gonnto', shka'?

<sup>11</sup> Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

<sup>12</sup> Na' lekzka' bllin bal ben' wichixjka' kwenche wchoa Juanna' legake' nisa', na' wnabgakile'ne':

—Maestro, ¿beran chiyal' gonnto', shka'?

<sup>13</sup> Na' ch che' Juanna' legake':

—Bi wchixjle dii xenchlə ka to daa chiyal' wchixjle.

<sup>14</sup> Na' lekzka' bal ben'ka' nak soldad wnabgakile'ne':

—¿Shera neto', beran chiyal' gonnto' shka'?

Na' ch che' Juanna' legake':

—Bi wwall wsheble ben' kwenche ikaazle bi de che', ni bi wtobilene' dii bi nak ka'. Li gon banez laxjlena'.

<sup>15</sup> Na' ben' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'. <sup>16</sup> Na' Juanna' golle' legake':

—Zi' za' beena' napch yel' wak xench ka nad'. Na' nad' ni bi zakaa gag' xmose' kwenche wlechj' xele'na'. Nad' chchoa' le' nis daa chiyaj chilenile, san len' gone' ka yidsoa Espíritu Sántona' loo yichjlall'do'lena', na' ben'ka' bi chiyaj chileni, wselee legake' lo yi' gabila'. <sup>17</sup> Na' daa gon Crístona' che ben' chzaklebin ka daa chon beena' nox' yag xoz' daa chpa'ile' trígona', na' yitope' trígona' kooshaween na' wzeye' beb cheyinna' lo yi'na' daa biga yiyolkzə.

<sup>18</sup> Kan' nak diika' bzajnii Juanna' ben'ka', na' dii zanch dill' dii be'lene' legake' kana' bi'e dill' wen dill' kob che Chioza'. <sup>19</sup> Na' Juanna' lekzka' bsheshlene' Heródeza', beena' wnabia' Galileana', daa bikee Herodíaza', xool ben' bishee Felípena', na' che bichlə dii malka' ba bene'. <sup>20</sup> Na' ch Heródeza' benche' bish' ljwell dii malka' ba bene' daa wlo'e Juanna' lillyana'.

*Wchoa Jesúza' nisa'*  
(Mt. 3:13-17; Mr. 1:9-11)

<sup>21</sup> Kana' chchoa Juanna' ben' nisa', len Jesúza' bchoe'n. Na' shlak choe'lwil Jesúza' Chioza', byalj yabana' <sup>22</sup> na' betj Espiritu Sántona' jsoalene'ne', na' ble'gakile' Espirituna' ka to palom. Na' bengakile' shii Chioza' za'n yabana', chi'e:

—Lin' nako' Xiin', chakchgaid' li' na' le chibaid' li'.

*Ben'ka' nak dia che Jesucristona'*  
(Mt. 1:1-17)

<sup>23</sup> Na' do shichoa yizi Jesúza' ka wzoloe' bene' yog' daa llia bia' gone'. Na' yog' ben' wngake' xiin Josénan'. Na' Joséna' goke' xiin Elína', <sup>24</sup> Elína' goke' xiin Matata', Matata' goke' xiin Levína', Levína' goke' xiin Mélquina', Mélquina' goke' xiin Jánana', Jánana' goke' xiin Joséna'. <sup>25</sup> Joséna' goke' xiin Matatíaza', Matatíaza' goke' xiin Amóza', Amóza' goke' xiin Nahuma', Nahuma' goke' xiin Éslina', Éslina' goke' xiin Nagaina'. <sup>26</sup> Nagaina' goke' xiin Maata', Maata' goke' xiin Matatíaza', Matatíaza' goke' xiin Semeina', Semeina' goke' xiin Joséna', Joséna' goke' xiin Judána'. <sup>27</sup> Judána' goke' xiin Joánana', Joánana' goke' xiin Résana', Résana' goke' xiin Zorobabela', Zorobabela' goke' xiin Salatiela', Salatiela' goke' xiin Nérina'. <sup>28</sup> Nérina' goke' xiin Mélquina', Mélquina' goke' xiin Ádina', Ádina' goke' xiin Cosama', Cosama' goke' xiin Elmodama', Elmodama' goke' xiin Era'. <sup>29</sup> Era' goke' xiin Josuéna', Josuéna' goke' xiin Eliezera', Eliezera' goke' xiin Jorima', Jorima' goke' xiin Matata'. <sup>30</sup> Matata' goke' xiin Levína', Levína' goke' xiin Simeónna', Simeónna' goke' xiin Judána', Judána' goke' xiin Joséna', Joséna' goke' xiin Jonánna', Jonánna' goke' xiin Eliaquima'. <sup>31</sup> Eliaquima' goke' xiin Meleana', Meleana' goke' xiin

Mainána', Mainána' goke' xiiñ Matátana', na' Matátana' goke' xiiñ Natánna'. <sup>32</sup> Natánna' goke' xiiñ Davina', Davina' goke' xiiñ Isaína', Isaína' goke' xiiñ Obeda', Obeda' goke' xiiñ Booza', na' Booza' goke' xiiñ Salmónna', Salmónna' goke' xiiñ Naasónna'. <sup>33</sup> Naasónna' goke' xiiñ Aminadaba', Aminadaba' goke' xiiñ Arama', Arama' goke' xiiñ Ezroma', Ezroma' goke' xiiñ Fáreza', Fáreza' goke' xiiñ Judána'. <sup>34</sup> Judána' goke' xiiñ Jacoba', Jacoba' goke' xiiñ Isaaca', Isaaca' goke' xiiñ Abrahama', Abrahama' goke' xiiñ Taréna', Taréna' goke' xiiñ Nacora'. <sup>35</sup> Nacora' goke' xiiñ Seruga', Seruga' goke' xiiñ Ragauna', Ragauna' goke' xiiñ Pelega', Pelega' goke' xiiñ Hebera', Hebera' goke' xiiñ Sálana'. <sup>36</sup> Sálana' goke' xiiñ Cainánna', Cainánna' goke' xiiñ Arfaxada', Arfaxada' goke' xiiñ Sema', Sema' goke' xiiñ Noéna', Noéna' goke' xiiñ Lameca'. <sup>37</sup> Lameca' goke' xiiñ Matusalénna', Matusalénna' goke' xiiñ Enoca', Enoca' goke' xiiñ Jareda', Jareda' goke' xiiñ Mahalaleela', Mahalaleela' goke' xiiñ Cainánna'. <sup>38</sup> Cainánna' goke' xiiñ Enóza', Enóza' goke' xiiñ Seta', Seta' goke' xiiñ Adánna', na' Adánna' goke' xiiñ Chioza'.

## 4

*Dii xiwaa goklalliin kooye*la'n Jesúza' gone' ka cheenin  
(Mt. 4:1-11; Mr. 1:12-13)

<sup>1</sup> Ka biza' Jesúza' cho'a yao Jordanna', Espíritu Sántona', beena' chñabia' loo yichjlall'do'ena', bchi'ene' latja' gana' bibi chashj chleb. <sup>2</sup> Na' na' wzoe' choa lla, na' dii xiwaa goklalliin kooye'la'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'. <sup>3</sup> Na'ch che' dii xiwaane':

—Shi leilo' nako' Xiiñ Chios, goll yaji yiyakan yetxtil.

<sup>4</sup> Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

<sup>5</sup> Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' llia yell-lioni. <sup>6</sup> Na'ch che'n le':

—Gon' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. <sup>7</sup> Na' gona'n li' shi wchek' xibo'na' we'lawoo nad'.

<sup>8</sup> Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

<sup>9</sup> Na'ch ka wde, bizche' dii xiwaa Jesúza' Jerusalenna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni. <sup>10</sup> La' Cho'a Xtill' Chioza' nan:

Chioza' wselee anjl che'ka' gap wwiagake' li',

<sup>11</sup> na' gox'gake' li'

kwenche ki koo wchewo' yajka'.

<sup>12</sup> Na'ch che' Jesúza':

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenche xenlalloo shi gone' ka ba wne'.”

<sup>13</sup> Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

*Wzolo Jesúza' bi'e Cho'a Xtill' Chioza' Galileana'*

*(Mt. 4:12-17; Mr. 1:14-15)*

<sup>14</sup> Jesúza' billine' gana' mbani Galileana' ziyoochgue' yel' wak che Espíritu Sántona', na' doxenzə na' wze dill' daa chone'. <sup>15</sup> Na' chjali' chjasedile' ben' Israelka' gana' chdop chllaggake' choe'lwillgake' Chioza', na' yog' ben' nagake' le xochi cho'e dill'.

*Billin Jesúza' yell Nazareta'**(Mt. 13:53-58; Mr. 6:1-6)*

<sup>16</sup> Na'ch biyaje' Nazareta', yella' gana' bgole'. Na' ka bllin lla sabda', llana' chombaan ben' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'. <sup>17</sup> Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:

<sup>18</sup> Espíritu che Xancho Chioza' zoalene' nad', na' Chioza' ba bzoe' nad' zidye'len' ben' yesh'ka' dill' wen dill' kob che'na'.

Ba bselee nad' kwenche zidtip' lall' ben'ka' chakyeshii yichjlall'do'eka',

na' zidtxje'id' ben' wak yisell yilaagake',

na' gon' ka ile'i ben' lcholka',

na' gaklen' ben'ka' chchi' chsak' ben' legake',

<sup>19</sup> na' wi'a dill' ba bllin lla gaklen Xanchona' ben' yell-lioki.

<sup>20</sup> Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'. <sup>21</sup> Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

<sup>22</sup> Na' yog' ben'ka' lle' na' che' ljwellgake' le' chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiin Joséna'?

<sup>23</sup> Na'ch che' Jesúza' legake':

—Wnaljale cha' ka dillaa de: “Wen rmech, biyon kwino'.” Na' lezkza' wnaljale nad': “Daa beninto' beno' Capernaúma' lezkza' benschkin lallchoni.”

<sup>24</sup> Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'. <sup>25</sup> Na' nia' le', zan nool



wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli. <sup>26</sup> Na' bi bse|' Chioza' Elíaza' kwenche gaklene' nool wizebka' lle' ni, san bse|eene' to yell zit' daa le Sarepta, daa llia gaozə yell Sidónna', gana' goklene' to nool wizeb zoa na'. <sup>27</sup> Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

<sup>28</sup> Na' yog' ben'ka' lle' gana' chdop chllaggake' le bllaagake' daa wna Jesúza' ka'. <sup>29</sup> Na' lii wzolla'tegake' bibejgake' Jesúza' yella', na' bche'gake'ne' to ga ze bdiñj xen wal, goklall'gake' lljachixgake'ne'. <sup>30</sup> Per Jesúza' bicheje' ladje'ka' na' ziyaje'.

*Bibej Jesúza' dii xiwaa yoo to ben'*  
(Mr. 1:21-28)

<sup>31</sup> Jesúza' wyaje' Capernaúma', sto yell daa llia gana' mbani Galileana', na' bli' bsedile' ben'ka' lla sabda', llana' chombaana ben' Israelka'. <sup>32</sup> Na' bibangakile' ka chli' chsedi Jesúza', la' bli' bsedile' legake' lega ben' nap yel' wñabia'.

<sup>33</sup> Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

<sup>34</sup> —¡Jwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li', na' nezid' nako' li-izelozí ben' li ben' shao' che Chios.

<sup>35</sup> Na' ch bsheshlen Jesúza' dii xiwaa, golle'n:

—¡Llizə wzoal! ¡Bichej!

Na' chwiate ben'ka' bchix bto| dii xiwaa beena', na' bichejan na' bikzə gayile' bi goki. <sup>36</sup> Na' yog' ben'ka' lle' na' bibangakile', na' che' ljwellgake':

## San Lucas 4:37      18      San Lucas 4:43

—¿Naktekan nak cho'a xtill' beeni, lla? Ka chneze' chillesh dii xiw'ka' yoo ben' daa napchgue' yel' wñabia' na' yel' wak.

<sup>37</sup> Na' doxen na' wze dill' ka nak daa chon Jesúza'.

*Biyon Jesúza' tobiin che Simón Pédróna'*

*(Mt. 8:14-15; Mr. 1:29-31)*

<sup>38</sup> Na' biza' Jesúza' gana' chdop chllaggake' na' biyaje' lill Simónna'. Na' tobiin che Simónna' bi shawee, yoochgue' dii lana', na' wñabgakile' Jesúza' gaklene'ne'.

<sup>39</sup> Na'ch wbig' Jesúza' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

*Jesúza' biyone' ben' zan*

*(Mt. 8:16-17; Mr. 1:32-34)*

<sup>40</sup> Na' ka ba chxoá wbillá, ben'ka' lle' na' jwa'gake' lao Jesúza' ben'ka' chak wde wdeli yillwe'. Na' bxoá neena' to togake' na' biyakgakile'. <sup>41</sup> Na' bibeje' dii xiwaa yoo ben' zan, na' ka bichejgakan chosyaagakan zillj inlleb, che'gakan:

—Lin' nako' Xiin Chioza'.

Na'ch bsheshlen Jesúza' legakan. Bi bi'e latj inegakan la' nezgakin len' nake' Crístóna', beena' chbez ben' Is-raelka' wsel' Chioza' inabi'e.

*Wda Jesúza' bi'e Cho'a Xtill' Chioza' Galileana'*

*(Mr. 1:35-39)*

<sup>42</sup> Ka wyeeni', bchej Jesúza' yella' na' wyaje' ga kono lle'. Per ben' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaanlene' legake'.

<sup>43</sup> Na'ch goll Jesúza' legake':

—Lekzka' chiyal' chixje'id' ben'ka' lle' yell yoblə ka nak yel' wñabia' che Chioza', la' daan bselee nad'.

<sup>44</sup> Na' wda Jesúza' wdixji'e cho'a xtill' Chioza' to to gana' chdop chllag ben' Israelka' choe'lwillgake' Chioza'.

## 5

*Wxengake' be| zan*

*(Mt. 4:18-22; Mr. 1:16-20)*

<sup>1</sup> To shii bllin Jesúza' cho'a nido' che Genesareta' na' bllin ben' zan wal axt bdakwyillgake'ne', daa cheengakile' wzenaggake' cho'a xtill' Chioza'. <sup>2</sup> Na' ble'i Jesúza' chop barkw chi'gakan cho'a nido'na'. Ba bichej ben' wxen belka' na' ba chiyibgake' yixj che'ka'. <sup>3</sup> Na'ch wyoo Jesúza' loo barkw che Simónna', na' wnable'ne' wllig' zilateen loo nido'na'. Na' wche' Jesúza' loo barkwa' na' wzoloe' bli' bsedile' ben'ka'. <sup>4</sup> Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle belka'.

<sup>5</sup> Na'ch che' Simónna':

—Maestro, do yel ba bennto' llinna' na' ni tlish'b bi bdolinto', per shi kan' no', wzal'chnto' yixjki.

<sup>6</sup> Na' ka bzal'gake' yixj che'ka', wxenan bel zan inleeb. Na' ka nan yibejgake' yixja' wzolo chcheza'n. <sup>7</sup> Na' blaa neeka' ben'ka' lle' loo barkwa' sto kwenche jaklengake' legake'. Na' ka bllin ben'ka', na'ch bissha'chagake' chopte barkwka' axt ba chakgakan ka dii kwe' yel. <sup>8</sup> Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' ben' saaxyaz nad'.

<sup>9</sup> Golle'ne' ka' daa bibanile', na' ka'kzə ben'ka' lene' bibangakile' daa bdol' bel zan inleeb. <sup>10</sup> Na' lekzka' bibani Jacóbona' len Juanna' xiin Zebedewa', la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' belki loo nisi, ka'kzan gono' yibejo' ben' lao dii mala'.

<sup>11</sup> Na' ka billinlengake' barkwka' cho'a niso'da'na', na'zə bkwaangake'n len xshinlaze'ka' na'ch janogake' Jesúza'.

*Biyon Jesúza' to ben'* chake' yillwe' daa le lepra

(Mt. 8:1-4; Mr. 1:40-45)

<sup>12</sup> Na' shlak zoa Jesúza' to yell, bllin to ben' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

<sup>13</sup> Na'ch Jesúza' bxoā neena' yichj beena', na' chi'ene':

—Cheenid'x. Na' naate yikwasa'n.

Na' kon ka golle' ka' lii biyakteyi beena'. <sup>14</sup> Na'ch che' Jesúza'ne':

—Kono yoo ka ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiyal' lljoo che Chioza' daa nllia dii Moiséza' bia' kwenche inezi ben' ba biyakilo'.

<sup>15</sup> Na' la'kzi golle'ne' ka', zizikchli wzeyi che', na' ben' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'. <sup>16</sup> Per Jesúza' yooloe' chaje' ga kono ben' chak kwenche chjelwille' Chioza'.

*Biyon Jesúza' to ben'* net ni'a neena'

(Mt. 9:1-8; Mr. 2:1-12)

<sup>17</sup> To lla ka chli' chsedi Jesúza', xonj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' ben'ka' bi shao'. <sup>18</sup> Na'ch bllin

to chop ben' n̄lengake' to ben' net n̄i'a neena' n̄xoagake'ne' to lo daa. Goklall'gake' sho'lengake'ne' loo yoonā' kwenche l̄jwa'gake'ne' lao Jesúza', <sup>19</sup> per bi gok sho'lengake'ne' daa nyichachga ben'ka' loo yoonā'. Na'ch wyepgake' koll' yoonā'lā na' bkwasgake' dexka' kwenche gok b̄letjgake'ne' do daa che'na' ladj ben'ka' lle' na' kwenche b̄lline' lao Jesúza'. <sup>20</sup> Na' ble'i Jesúza' le n̄xeni-lall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

<sup>21</sup> Na'ch ben'ka' chli' chsedi leya' na' fariseoka' wza'lall'gake', chakgakile': “¿Nora beeni chonz kwine' ka Chioza'? ¡Lā' toz Chiozan' chak chizi'xene' saaxya che ben'!”

<sup>22</sup> Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'? <sup>23</sup> ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”? <sup>24</sup> Na' wliid' le', nad', Ben' Bsel' Chioza', nap' yel' wnabia' yell-lioni kwenche yizi'xen' saaxya che ben'.

Na'ch golle' beena' net n̄i'a neena':

—Naa nia' li', biyas, bitob daa cho'na' na' biyaj lillo'na'.

<sup>25</sup> Na' lii biyaste beena' chwiate ben'ka' lle' na', bitobe' daa che'na' bizee ziyaje' lill-le' choe'lawee Chioza'. <sup>26</sup> Na' yog'lol' ben'ka' bibangakile' na' be'la'ogake' Chioza', na' do chllebzgake' che'gake':

—Naanlla ba ble'icho dga chonan ka chibanicho.

*Gox Jesúza' Levína'*

*(Mt. 9:9-13; Mr. 2:13-17)*

<sup>27</sup> Ka biza' Jesúza', na' ble'ile' to ben' w̄ichixj lie' Leví, chi'e gana' ch̄chixjgake'. Na' chi'ene':

—Da, dino nad'.

<sup>28</sup> Na' ch lii wzolla'te Levína', wlej yichje' xshine'na' na' jano'e' Jesús'a'.

<sup>29</sup> Na' Levína' bene' to lni xen che Jesús'a' lille'na'. Na' wyaj ben' zan ben' wichixjka' na' zi bal ben' yoblə wdao-gake' txen. <sup>30</sup> Na' fariseoka' na' ben'ka' chli' chsedi leya' wzologake' chakdi-lengake' ben'ka' nak Jesús'a' txen, che'gake':

—¿Berache cheej chaolenle ben' wichixjka' na' ben' malka'?

<sup>31</sup> Na' ch che' Jesús'a' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'. <sup>32</sup> Aga bid' ni che ben'ka' nak ben' li ben' shao', san bid' kwenche yep' ben' saaxyaka' chiyal' yiyaj yilengakile'.

Wnabgakile' Jesús'a' che wbasaa

(Mt. 9:14-17; Mr. 2:18-22)

<sup>33</sup> Na' wnabgakile' Jesús'a', che'gake'ne':

—Ben'ka' nak Juanna' txen na' ben'ka' nak fariseoka' txen zekizezi chzoagake' wbas' na' choe'llwillgake' Chioza'. Na' ¿berache ben'ki nakgake' li' txen bi chzoagake' wbas'?

<sup>34</sup> Na' chi'e legake':

—Kat' de to yel' wishagna', aga wak gonle byen ben'ka' chdop chllag soagake' wbasaa shlak zoalengake' bi'na' chshagna'. Na' ka'kzan ben'ki nakgake' nad' txen, cheej chaogake' naa zoalen' legake'. <sup>35</sup> Per wllin lla wkwas ben' nad' ladje'ka', kana'chan soagake' wbasaa.

<sup>36</sup> Na' lekzka' bzoe' sto jempl, chi'e legake':

—Ni to ben' bi chchogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wnelebin lech' koba'. <sup>37</sup> Na' ni kono chгаа vinona' daa zi chchejte to loo yid golə. La' shi no gon ka', vino koba' wchezaan yid gola' na' chopten kwiayi'. <sup>38</sup> San

vino koba' chiyal' shollan loo yid koba'. <sup>39</sup> Na' lekzka' to ben' ba yooloe' cheeje' vino gola' aga weenile' yeeje' dii koba', daa chziachile' dii gola'.

## 6

*Wdishjgake' do che trígona' lla sabda'*

*(Mt. 12:1-8; Mr. 2:23-28)*

<sup>1</sup> To lla sabd, llana' chombaan ben' Israelka', wdelen Jesúza' ben'ka' nakgake'ne' txen to ga naz ben' trígona', na' ben'ka' zejlangake'ne' wzolo wdishjgake' trígona' na' wxobgake'n wdaogake'n. <sup>2</sup> Na' bal fariseoka' gollgake' legake':

—¿Biche chonzle daa bi chiyal' goncho llani chombaancho?

<sup>3</sup> Na'ch che' Jesúza' legake':

—¿Abin' wlable gana' cho'en dill' ka ben dii Davina' len ben'ka' nakgake'ne' txen ka wdongake'? <sup>4</sup> Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxozka' de lsens gaogake'. Na' lekzka' bi'en ben'ka' nakgake'ne' txen.

<sup>5</sup> Na' lekzka' chi'e fariseoka':

—Nad', Ben' Bse! Chioza' Yell-lioni, chnabi'a lao llani chombaancho.

*Biyon Jesúza' to ben' lla sabda'*

*(Mt. 12:9-14; Mr. 3:1-6)*

<sup>6</sup> Na' sto lla sabd, llana' chombaan ben' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'. Na' ladj ben'ka' len to ben' net nee de shlina'. <sup>7</sup> Na' fariseoka' na' ben'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaangake', kwenche gaogake' xya che'. <sup>8</sup> Na' gokbe'i Jesúza' daa chza'lall'gake', na'ch golle' beena' net tlaa neena':

—Wzolla' na' wze gchola'.

Na'ch wzolla' beena', wzie' gchola'. <sup>9</sup> Na'ch goll Jesúza' ben'ka':

—Ni inabid' le': ¿Beran na leya' chiyal' goncho lla sabdka'? ¿Agoncho dii wenna' anti goncho dii mala'? ¿Ayislacho ben' anti witchone'?

<sup>10</sup> Na'ch bwia Jesúza' legake', na' chi'e beena' net tlaa neena':

—Bli noona'.

Na'ch bli neena' na' biyakin. <sup>11</sup> Na' fariseoka' na' ben'ka' chli' chsedi leya' le bllaagake' na' choe'gake' dill' nak ka gongake' che Jesúza'.

*Wlej Jesúza' postlka' shllin*

*(Mt. 10:1-4; Mr. 3:13-19)*

<sup>12</sup> Na' wyaj Jesúza' to lo yaa kwenche jelwille' Chioza', na' do yel be'lwille'ne'. <sup>13</sup> Ka wyeeni', goxe' ben'ka' nakgake'ne' txen na' ladj ben'ka' wleje' ben'ki shllin na' bsi'e legake' postl: <sup>14</sup> Simónna' beena' bsi'e Pedro, len ben' bishee Andréza', na' Jacóbona', Juanna', Felípena', Bartoloména', <sup>15</sup> Matewa', Tomáza', Jacobo xiiñ Alfewa', Simónna', beena' bsi'gake' Zelote, <sup>16</sup> Judas, ben' bish' Jacóbona'\* na' Jud Scariota', beena' bene' Jesúza' lo na' ben' malka'.

*Bli' bsedi Jesúza' ben' zan*

*(Mt. 4:23-25)*

<sup>17</sup> Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' ben' zan inleeb, ben' zaak doxen gana' mbani Judeana' na' yell Jerusalénna', na' ben' zaak cho'a nido'na' gana' mbani yell Tírona' na' yell Sidónna'. <sup>18</sup> Wyajgake' kwit Jesúza' kwenche

---

\* 6:16 Ben' bish' Jacóbona': ben'ka' nsed nagake' chiyal' inñan xiiñ Jacóbona'.



wzenaggake' xtilleena' na' yiyakgakile' bi yillwe' dii chakgake'. Na' lekzka' biyaki ben'ka' chsak'zi' dii xiw'ka' legake'. <sup>19</sup> Yog'z ben' goklall'gake' idi'gake' Jesúza' daa ba nezgakile' chchej yel' wak che'na' na' chiyaki yog' ben'.

Ben'ka' zoa mbalaz na' ben'ka' bi zoa mbalaz  
(Mt. 5:1-12)

<sup>20</sup> Na' ch bwia Jesúza' ben'ka' nakgake'ne' txen, na' chi'e legake':

—Chakomba le' nakle ben' yesh' daa chleble yel' wñabia' che Chioza'.

<sup>21</sup> 'Chakomba le' chbił chdonle ñaa; wllin lla yesh yeljile.  
'Chakomba le' chbell-le ñaa; wllin lla yixill-le.

<sup>22</sup> 'Chakomba le' shi chakzbani ben' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to ben' wen dii mal ni cha', nad', Ben' Bsel' Chioza' Yell-lioni. <sup>23</sup> Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xoxxtoe'ka' ben'ka' wdixjee daa goll Chioza' legake' kani'yi.

<sup>24</sup> 'Nyesh'laz gak chele, le' nakle ben' wni'a, la'kzi le wen chak chele ñaa.

<sup>25</sup> 'Nyesh'laz gak chele, le' de dii cheej chaole ñaa, la' wllin lla ibił idonle.

'Nyesh'laz gak chele, le' chyitj chxill-le ñaa; wllin lla kwellyesh'le.

<sup>26</sup> 'Nyesh'laz gak chele, le' choe'la'o yog' ben' le', la' ka'kzə be'la'o dii xoxxto'leka' dii ben'ka' benzə ka chyixjee daa che' Chioza' legake'.

Chiyal' gakicho ben'ka' chakzbani cho'  
(Mt. 5:38-48; 7:12)

<sup>27</sup> 'Le' chzenagle ñaa, nia' le', li gaki ben'ka' chakzbani le'. Li gonigake' wen. <sup>28</sup> Li inabi Chioza' gone' ka gak

wen che ben'ka' chyishj bia' blag' chele. Li inabi Chioza' gaklene' ben'ka' chiya dii nagake' chele. <sup>29</sup> Shi no kap' xag'l<sup>h</sup>ena' t<sup>h</sup>laa, li wze daa zi sh<sup>h</sup>laa. Na' shi no koyo xachel-lena', li we'tega len xkamisl<sup>h</sup>ena'. <sup>30</sup> Nottezə ben' shi bi inabe' chele, li we'n. Na' ka', shi no ikaa bi de chele, bi yinabzilene'n. <sup>31</sup> Li goni ben' kon ka cheenile gongakile' le'.

<sup>32</sup> 'Shi to ben'ka' nllagzile chakile, ¿garan de dii wenna' daa chonle? La' ka'klen chon ben' saaxyaka'. <sup>33</sup> Lekzka' shi to ben'ka' chonzi le' wen chiyonile wen, ¿garan de dii wenna' chonle? La' ka'klen chon ben' saaxyaka'. <sup>34</sup> Na' shi choe'le bi choe'le ben' daa nezile yigwee wzonna', ¿garan de dii wenna' daa chonle? La' ka'klen chon ben' ssaxyaka', choe'gake' bi choe'gake' daa nongake' lez wigoogake' wzon che'ka'. <sup>35</sup> Na' le', naalla, chiyal' gakile ben'ka' chakzbani le', na' gonle wen chegake'. Na' shi we'le dii we'le legake', bi gonle lez yiyoᅇgake'n. Shi ka' gonle, Chioza' yiyoᅇ' dii xench chele, na' inezi ben' nakle xiin Chios, beena' nak ben' choo ben' xen, la' le' chone' wen che ben'ka' bi choe' le' ye' choxken na' ben' wen dii malka'. <sup>36</sup> Chiyal' yiyesii ljwell-le ka chiyeshii Xacho Chioza' yog' ben'.

*Bi wwia wyile bi chon ben'*

*(Mt. 7:1-5)*

<sup>37</sup> 'Bi wwia wyile bi chon ben', kwenche bi gon Chioza' xya chele. Bibi wtobile' ben', kwenche bi gapple dol' lao Chioza'. Li si'xen che ljwell-le, na' Chioza' si'xene' chele. <sup>38</sup> Li we' ben' bi chyaljile' na' Chioza' yiyoᅇ'n. Na' yiyoᅇchle' dii xench, ka chon ben' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le ben' bi de chele, ka'kzan goni Chioza' le'.

<sup>39</sup> Na' bzoa Jesúza' to jem<sup>h</sup>pl, chi'e legake':

San Lucas 6:40      27      San Lucas 6:49

—Nezicho bi gak to ben' l<sub>ch</sub>ol w<sub>chi</sub>'e sto ben' l<sub>ch</sub>ol, la' choptegake' l<sub>l</sub>jabixgake' to loo yech. <sup>40</sup> Na' beena' chsed bi gak ine': “Chonch' ka beena' chli' chsedile' nad'.” Kat'ch yiyoll yido wsede', kana'chan gake' ka beena' bli' bsedile'ne'.

<sup>41</sup> '¿Biche chwiazoo bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? <sup>42</sup> Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': “Ben'shki yibej' bicha' yoo loo jalawo'na'”? ¿Ben' wxiye! Zigaate bwia cho'na' na' tech wwio' che' bish' ljwello'na'.

*Daa chbia to yag chli'n bi yag daa*

*(Mt. 7:17-20; 12:33-35)*

<sup>43</sup> Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. <sup>44</sup> Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. <sup>45</sup> Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

*Chop ben'* bengake' twej yoo

*(Mt. 7:24-27)*

<sup>46</sup> '¿Berache nazle nad' “Xan', Xan'”, na' bi chonle daa nia' le'? <sup>47</sup> Ni inia' le' no zaklebi beena' chone' nad' txen na' chzenague' cha' na' chone' ka nia'. <sup>48</sup> Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. <sup>49</sup> Na' beena' cheni cho'a xtilaana' na' bi chone' ka nia', zaklebile'

beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlliaiy'tekkzan.

## 7

*Biyon Jesúza' xmos xan soldadka'*

(Mt. 8:5-13)

<sup>1</sup> Ka biyoll be'len Jesúza' ben'ka' dill', biyaje' Capernaúma'. <sup>2</sup> Na' yella' zoa to ben' Roma ben' chnabi'e to guiyoa soldad, na' zoa to xmose' lille'na', beena' le chakile', na' chake' to yillwe' dii chonan ka witan le'. <sup>3</sup> Na' ka beni xan soldadka' choe'gake' xtill' Jesúza', na'ch bselee bal ben' golka' chnabia' Israela' kwenche lljet'yogakile'ne' lljayene' beena' bi shao'. <sup>4</sup> Na' ka bllin ben' golka' kwit Jesúza', got'yogakile'ne', che'gake':

—Xan soldadka' chidolee gakleno'ne', <sup>5</sup> la' le chakile' cho' ben' Israel na' len' bene' yooná' gana' chdi'anto' choe'lwillnto' Chioza'.

<sup>6</sup> Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bal ben' nllaguile' kwenche jellgake' Jesúza' dill'ki:

—Xan', bi sio' wneyi yido', la' bi chido'laa shoo loo lillii.

<sup>7</sup> Daan bi biyaxjid' yid' kwin' yidtil' li'. La'ch' to chop cho'a dill' shel' ino' na' yiyakile'. <sup>8</sup> La' zoa no chnabia' nad', na' lekzka' chnabi'a soldad cha'ka'. Na' kat' chep' toe': “Wyaj ni”, na' chaje'. Na' kat' chep' stoe': “Da ni”, na' chide'. Na' kat' chep' xmosaa: “Ben dga”, na' chone'n.

<sup>9</sup> Na' ka beni Jesúza' xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gonlilall'likze' nad' ka chonlilall' beeni nad'.

<sup>10</sup> Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmose'na'.

*Bisban Jesúza' xiin to nool wizeb bi' ba wit*

<sup>11</sup> Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə. <sup>12</sup> Na' ka bllingake' cho'a yella', ble'gakile' zjakwash' ben'ka' to bi' wet. Na' bi'na' wit nakb' bi' tlish', na' xna'baa nake' noolə wizeb. Na' ben' zan ben' yellka' zjakwash'gake'b'. <sup>13</sup> Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

<sup>14</sup> Na'ch jabigüee bexee gana' xoa bi' weta', na' wlez ben'ka' nłengake'b'. Na' golle' bi' weta':

—Bi' xkwid', nia' li', jbiyas!

<sup>15</sup> Na' bi' weta' lii bibanteb' na' bibe'b' na' wzolo chineb', na' biyon Jesúza'b' lo na' xna'baa. <sup>16</sup> Na' ka ble'i ben'ka' daa bene', yog'lolze' bllēb na' wzologake' choe'la'ogake' Chioza', nagake':

—Ladjchoni ba bla' to ben' zakii ben' chyixjee daa che' Chioza'ne'.

Na' lezkka' nagake':

—Chiozan' ba blee kwenche gaklene' cho' nakcho yell che'.

<sup>17</sup> Na' doxen gana' mbani Judeana' na' yellka' llia gaozə wnezgakile' daa ben Jesúza'.

*Ben'ka' bsel' Juanna' lao Jesúza'*

*(Mt. 11:2-19)*

<sup>18</sup> Na' ben'ka' nongake' Juanna' txen jayellgake'ne' yog' diika' chon Jesúza'. Na'ch Juanna' wnie' chope' <sup>19</sup> na' bselee legake' gana' zoa Jesúza' kwenche janabgakile'ne' shi leyen'en' beena' llia bia' yid wa shi chiyal' kwezgake' sto ben' yoblə. <sup>20</sup> Na' ka bllin ben'ka' bsel' Juanna' kwit Jesúza', che'gake'ne':

—Juanna', beena' chchoa ben' nisa', bselee neto' kwenche zidnabinto' li' shi li'yen'kzan nako' Crístona',

beena' chbeznto' wsel' Chioza' kwenche inabi'e, wa shi chiyal' kweznto' stoe'.

<sup>21</sup> Na' shlak zegake' na', biyon Jesúza' ben' zan ben' chak yillwe', na' lekzka' bibeje' dii xiw'ka' yoo ben', na' bene' ka ble'i ben' zan ben' lcholka'. <sup>22</sup> Na' ch che' Jesúza' ben'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' lcholka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwellka' chengakile', na' chiban ben' wetka', na' chyixje'id' ben' yesh'ka' dill' wen dill' kob che Chioza'. <sup>23</sup> Chakomba beena' chajle' cha' na' bi chakchoplallee.

<sup>24</sup> Na' ka biza' ben'ka' bsel' Juanna', Jesúza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e?

<sup>25</sup> Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezakzile ben'ka' nakw lech' dii zakii, na' naptergake' bittezə dii chzelall'gake', zoagake' lill ben' wnabia'ka', aga zoagake' latja' gana' bibi chashj chleb.

<sup>26</sup> Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'.

<sup>27</sup> La' che beenin cho'e Cho'a Xtill' Chioza' dill' gana' nan: Wselaa beena' kwialo lawo'na',

na' chixji'e xtilloona' kwenche soa ben' wzenaggake' cho' kat' illino'.

<sup>28</sup> Na' nia' le', lao yog'lolte ben' yell-lioni, ni to konon' ichej ben' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

<sup>29</sup> Na' yog'lol ben'ka' bchoa Juanna' nisa', no ben' wixhijka' na' zan ben' yoblə, ka bengakile' daa wna Jesús'a, gokbe'gakile' dill' li dill' shao' nak cho'a xtil' Chioza'. <sup>30</sup> Na' fariseoka' na' ben'ka' chli' chsedi leya' bi goongakile' wchoa Juanna' legake' nisa', ni bi gok-lall'gake' gon Chioza' dii wenna' cheenile' gone' chegake'. <sup>31</sup> Na'ch goll Xancho Jesús'a legake':

—¿Bi ka wsaklebid' le' mbanle naa? ¿No ka inia' nakle? <sup>32</sup> Nakle ka bi'do'ka' chbe' gana' chak yaana' na' chosyaagakb' che' ljuwellb': “Bkwellnto' blleja' na' bi byaale, na' beinto' dii chon nyesh', na' ni bi wchell-le.” <sup>33</sup> La' bid Juan wichoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.” <sup>34</sup> Na'ch bid' nad', Ben' Bsel' Chioza' Yell-lioni, na' chle'ile cheej chaw', na' nale cha': “Le ben' waoxat nak beeni na' cheejtie', na' nllagteile' ben' saaxyaka' na' ben' wixhijka'.” <sup>35</sup> Per yel' sin' che Chioza' chli'lawin ka nsa' che ben'ka' chzenag-gake' cheyin.

*Jesúza' wyaje' lill Simónna', beena' nak fariseo*

<sup>36</sup> To fariseo wnie' Jesús'a kwenche gaogake' lille'na'. Ka blline' na' wchi'e cho'a mesa'. <sup>37</sup> Na' to noolə wda zoa yella', ka wnezile' zjtao Jesús'a lill farisewa', na'ch wyaje' noxee to lmet de yaj xochi na' yollan set zix. <sup>38</sup> De chbellzile' jabiguae xni'a Jesús'a na' bisbisile' ni'ena' nis xchell che'na'. Na' bisbillile'n yish' yichje'na', na' bnopə'n na' bwazje'n set zixa'. <sup>39</sup> Na' farisewa', beena' wnie' Jesús'a lille'na', ka ble'ile' ka chon noola', na' gokile': “Shel'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ni'ena' nake' ben' saaxy.” <sup>40</sup> Na'ch che' Jesús'a farisewa':

—Simón, de to dii cheenid' inia' li'.

Na' che' Simónna':

—Wna, Maestro.

<sup>41</sup> Na'ch che' Jesúza':

—Chop ben' chbag'gake' mech che to ben' chon yichjin. Toe' chbaguee gay' guiyoa mech plat\*, na' stoe' chbaguee shiyonan. <sup>42</sup> Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no ben'ka' chop gakchile'ne'?

<sup>43</sup> Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

<sup>44</sup> Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beno' nisa' kwenche chib ni'ani, per nooli ba wdibile' nis xhell che'na' ni'ani na' bisbillile'n yish' yichje'na'. <sup>45</sup> Bi bnopo' nad', per nooli kon ka wyo'a chnoptezi chnope' ni'ani. <sup>46</sup> Bi wdebo' yichjii set, per nooli ba bwazje' set zixa' ni'ani. <sup>47</sup> Daan nia' li', la'kzi dii zan saaxya ba ben nooli, ba biyakxengakan daa le chakchgaile' nad'. Na' beena' lat'zə biyakxen che', lekzka' lat'chga chakile' nad'.

<sup>48</sup> Na'ch golle' noola':

—Ba biyakxen saaxya cho'ka'.

<sup>49</sup> Na' ben'ka' chi'lengake' Jesúza' txen wzologake' che' ljwellgake':

—¿Nora beeni, lla, axt saaxyaka' chizi'xene'?

<sup>50</sup> Na' Jesúza' chi'e noola':

—Daa chonlilalloo nad', ba bilo' lao yel' zak'zi'na'. Biyaj mbalaz.

## 8

### *Noolka' goklengake' Jesúza'*

---

\* 7:41 Mech plat: dill' griegona' nan denario, na' nakan to mech dii zak' che shilla llin.



<sup>1</sup> Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chñabi'e loo yichjlall'do' ben'ka' chzenag che'. Na' postl che'ka' shllin chdalen-gake'ne' txen. <sup>2</sup> Na' lekzka' len bal' noolka' ba biyone'. Bale' bibeje' dii xiw'ka' wyoogake', na' zi bale' gogkake' yillwe' na' biyone' legake'. Na' ladje'ka' len Maríana', noola' nsi'gake' Magdalena, beena' bibej Jesúza' gall dii xiw'ka'. <sup>3</sup> Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' ben'ka' jano Jesúza' na' bçhingake' dii de çhegake' kwençhe goklengake'ne'.

*Jempl che to ben' goz goon*

*(Mt. 13:1-9; Mr. 4:1-9)*

<sup>4</sup> Ben' zan bllesh to to yell jawiagake' Jesúza', na' ka bdop ben' zan wal na'ch bseesile' legake' to jempl, chi'e:

<sup>5</sup> —To ben' goz goon wzee zeje' goza'. Na' ka zej chzalee binna', balan bxop cho'a neza' na' blej bshoshj ben' len, na' bllin byinka' wdaogakban. <sup>6</sup> Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. <sup>7</sup> Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan. <sup>8</sup> Na' zi balan bxop lo yo wenna', na' le bgolgakan na' axt do to guiyoa wej wllia to ton.

Na' ka biyoll bseesee jempla', na'ch wnie' zilljə chi'e:

—Le' chenile dga nia', li sen wneyi.

*Bzajonii Jesúza' biche chzoe' jemplka'*

*(Mt. 13:10-17; Mr. 4:10-12)*

<sup>9</sup> Na'ch wñab ben'ka' nakgake'ne' txen bi zejin jempla' daa bseesee. <sup>10</sup> Na' che' Jesúza' legake':

—Chioza' cho'e latj inezile daa kono nezkzi, ka chñabi'e loo yichjlall'do' ben'ka' chzenaggake' che'. Na' ben'ka' sto chseesid' legake' shga!' jempl, la' la'kzi chle'gakile'

bin chon', kon chongake' ka beṅ' bi chle'i. Na' la'kzi chengakile' bin nia', aga chajni'gakile'n.

*Bzajonii Jesúza' bi zeji jempl che beṅ' goz goona'*  
(Mt. 13:18-23; Mr. 4:13-20)

<sup>11</sup> 'Kin zeji jempl che beṅ' goz goona': cho'a xtill' Chioza' nakan ka binna' daa goze'. <sup>12</sup> Na' zoa beṅ' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che binna' daa bxop cho'a neza'. <sup>13</sup> Na' zoa beṅ' chibagakile' chzenaggake' cho'a xtill' Chioza' na' chleb-gake'n, per kat' chak bi chak chegake' na' chbej yichj-gake'n. Chak chegake' ka gok che binna' bi bde loinna' daa bxopan lo yaja'. <sup>14</sup> Na' zoa beṅ' chzenague' cho'a xtill' Chioza', per chi'ch yichjgake' daa chak chegake' na' che ye! wni'ana', na' che bichlə dii chzelall'gake', na' bi chakchagake' lo xnez Chioza'. Chak chegake' ka gok che binna' bxop ladj yag yesh'ka'. <sup>15</sup> Na' zoa beṅ' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bittezə dii chak chegake'. Beṅ'kin chak chegake' ka gok che binna' bxop lo yo wenna' daa le wllia.

*Jempl che to kandil*  
(Mr. 4:21-25)

<sup>16</sup> 'Biga zoa to beṅ' chxene' kandila' na' chdose'n to dii wkwashaan daa wa chzoe'n xan xlague'na', san chzoe'n sibə kwenche ile'i beṅ'ka' sho' loo yoonā'. <sup>17</sup> Na' lekzka' yog'lolte dii ngash' naa, wllin lla yila' lawin, na' daa kono nezi naa, wllin lla inezi beṅaan.

<sup>18</sup> 'Li wzenag dga nia' le' naa. Beena' chzenag zizikchli shajni'chile', na' beena' bi chzenag, daa ba bzenague' lat', yog'lolan yiyal-lallee.

X̄na' Jesúza' len beṅ' bisheeka'

(Mt. 12:46-50; Mr. 3:31-35)

<sup>19</sup> Na'ch bllin x̄na' Jesúza' len beṅ' bisheeka' gana' zoe', na' bi gok ibig'gake' kwite'na' daa lle' beṅ' zan. <sup>20</sup> Na' wbig' to beṅ' golle' Jesúza':

—X̄noona' len beṅ' bishooka' lle'gake' lesh' chyoonā' na' cheengakile' wshaljlengake' li'.

<sup>21</sup> Na' goll Jesúza':

—Ben'ka' chzenaggake' cho'a x̄till' Chioza' na' chon-gake' ka nan, ḷegaken' nakgake' x̄na' na' beṅ' bishaa.

*Jesúza' bkweze' to be' wal lo niso'dna'*

(Mt. 8:23-27; Mr. 4:35-41)

<sup>22</sup> To lla wyoo Jesúza' to ḷoo barkw len beṅ'ka' nakgake'ne' txen na' golle' ḷegake':

—Techo shḷaalə niso'dni.

Na'ch wza'gake'. <sup>23</sup> Na' shlak ngoo barkwa' nez, wtes Jesúza'. Na'ch wze to be' wal lo niso'dna' na' wzolo chas chat' nisa' na' biyollan ḷoo barkwa', na' zi lat'zə nan kwe'n yel. <sup>24</sup> Na' jasangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len niso'dna'. Na' wlezkakan, bich bi gok. <sup>25</sup> Na'ch golle' ḷegake':

—¿Abi chonḷilall'kzle nad'?

Na' ḷegake' ḷe chllebgake' na' ḷe chibangakile' na' che' ḷjwellgake':

—¿Nora beeni lla?, axt be'na' na' niso'dna' chzenag-gakan che'.

*Bibej Jesúza' dii x̄iwaa yoo to beṅ' Gadara*

(Mt. 8:28-34; Mr. 5:1-20)

<sup>26</sup> Na'ch bllingake' yell-lio che beṅ' Gadáraka', daa llia shḷaa niso'dna' ndil yell-lio che Galileana'. <sup>27</sup> Ka bichej Jesúza' ḷoo barkwa' jabig' to beṅ' Gadara kwite'na'. Ba wlla

yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'. <sup>28</sup> Na' ka ble'ile' Jesúza', besyee na' jachek' xibe' lawe'na', na' zillj inleeb chi'e:

—Jwayiz nad', Jesús Xiin Chios, ben' nak liizelozi ben' choo ben' xen. Ben goklen bi wsak'zi'o nad'.

<sup>29</sup> Gollan ka' daa ba chon Jesúza' byen yichejan. Ba wlla chnabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono ben' lle'. <sup>30</sup> Na' che' Jesúza':

—¿Bin lio'?

Na' chi'e:

—Legiónan lia'.

Golle' ka', la' zanannan' yo'e. <sup>31</sup> Na' got'yogakin Jesúza' bi wseleegakan gana' kwiayi'gakan. <sup>32</sup> Na' gaozə zoa to yaa gana' lle' kush zan chaogakb. Na' dii xiw'ka' wzeyidgakan wnabgakin Jesúza' wi'e latj yiyoogakan kushka', na' bi'e latj. <sup>33</sup> Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bدينj na' jshoogakb loo nisa' na' witgakb.

<sup>34</sup> Na' ben'ka' chap kushka' ka ble'gakile' daa gok, biyajdogake' jazengakile'n ben'ka' lle' yella' na' ben'ka' lle' lyixaa. <sup>35</sup> Na'ch bllesh ben'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'. <sup>36</sup> Na' ben'ka' ble'gakile' daa gok, gollgake' ben'ka' zi' bllin nakan gok biyaki beena' wyoo dii xiw'ka'. <sup>37</sup> Na' yog'lol ben' Gadáraka' got'yogakile' Jesúza' yizee lalle'ka' daa le chllebgake' ka bene'. Na' biyo'e loo barkwa' ziyaje'. <sup>38</sup> Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

<sup>39</sup> —Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

*Biyon Jesúza' noola' bex̄ee xe'na' na' lekzka' xiin Jairona' (Mt. 9:18-26; Mr. 5:21-43)*

<sup>40</sup> Ka billin Jesúza' shlaa nido'na', le chiba chizaki ben'ka' lle' na', la' yog'zgake'n chbezugake' le'. <sup>41</sup> Na'ch bllin to ben' le Jairo, nake' to ben'ka' chgoo x̄nezi cheyi diika' chon ben' Israelka' gana' chdop chllaggake' choe'lwillgake' Chioza'. Na' b̄chek' xibe'na' lao Jesúza' na' got'yoile'ne' shaje' lille'na', <sup>42</sup> daa ba chakshwet bi' nool che'na'. Nakh' to bi' tlish' tyaj, na' ka do shllin yizib'. Na' shlak zej Jesúza' ben' zan janogake'ne' axt bdakwyillgake'ne'.

<sup>43</sup> Na' ladj ben'ka' zjano Jesúza' len to noolə ba gok shllin yiz chzoe' wbaana'. Na' ba bliiyee yog' dii de che' daa chajtezi chaje' lao ben' wen rmechka', na' ni to kono gok yiyon le'. <sup>44</sup> Na'ch wbiguee koll' Jesúza' bex̄ee xe'na', na' katena' lii biyakteile'.

<sup>45</sup> Na'ch goll Jesúza' ben'ka' zjano le':

—¿No beena' ba bex̄' nad'?

Na' ni to kono b̄cheb. Na'ch goll Pédrone'ne':

—Maestro, ben'kin chdakwyillgake' li' na' chllig'gake' li' to ki to ka'lə. ¿Bi'che nazo': "Non ba bex̄' nad'?"

<sup>46</sup> Na' che' Jesúza' legake':

—Nochodan' ba bex̄' nad', la' gokbe'teid' bchej ye'l' wak cha'na'.

<sup>47</sup> Na' noola', ka gokbe'ile' aga wak wkwashee, do chllbez'e' jachek' xibe'na' lao Jesúza'. Na' lao yog'lol ben'ka' lle' na', golle' bi'che bex̄'ze' xe'na' na' daa bex̄een lii biyakteile'. <sup>48</sup> Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbalaz.

<sup>49</sup> Ni choe'telə Jesúza' dill' ka bllin to ben' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

<sup>50</sup> Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

<sup>51</sup> Na' ka bllingake' lille'na', aga be' Jesúza' latj sho' ben' yoblə, lete Pédrona', Jacóbona', Juanna' na' xaxna' bi' weta'zə. <sup>52</sup> Yog'loł ben'ka' lle' lill Jairona' chbellgake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

<sup>53</sup> Na' bxill-ləgake' che', la' nezgakile' ba witbaan.

<sup>54</sup> Na' ch bex' Jesúza' na' bi' wetdo'na' na' wnie' zilljə, chi'e:

—Biyas, bi'do'.

<sup>55</sup> Na' ch bibam' na' lii biyasteb'. Na' goll Jesúza' legake' we'gake' dii gaob'. <sup>56</sup> Na' xaxna'baa le bibangakile', na' che' Jesúza' legake' ni to kono ye'gake' daa gok.

## 9

Ben'ka' shllin jtixje'gake' cho'a xtill' Chioza'

(Mt. 10:5-15; Mr. 6:7-13)

<sup>1</sup> Na' bitop Jesúza' ben'ka' shllin, na' bi'e legake' yel' wak na' yel' wñabia' kwenche'yibejgake' yog'loł dii xiw'ka' yoo ben' na' yiyongake' ben' che'i yillwe'. <sup>2</sup> Na' bselee legake' kwenche' llje'gake' dill' ka nak yel' wñabia' che' Chioza', na' yiyongake' ben'ka' bi shao'. <sup>3</sup> Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale. <sup>4</sup> Na' yoona' gana' illinle, na'tezə soale axt ka illinch lla yiza'le. <sup>5</sup> Na' yella' gana' bi wlebgake' le', kat' yiza'le, yishible bishtena' lliia ni'aleka' kwenche' gakbe'gakile' aga wenan chongake' bi chlebgake' cho'a xtill' Chioza'.

<sup>6</sup> Na'ch wza' beṅ'ka' nakgake'ne' txen na' wyajgake' to to yell wdixje'gake' dill' wen dill' kob che Chioza' na' biyongake' beṅ'ka' bi shao'.

*Wit Juanna', beena' bchoa beṅ' nisa'*

*(Mt. 14:1-12; Mr. 6:14-29)*

<sup>7</sup> Heródeza', beena' wṅabia' gana' mbani Galileana', benile' yog' daa chon Jesúza'. Na' chakile' nora beena', la' bal beṅ' nagake' dii Juan wichoa nisan' ba bibane' dii yoblə. <sup>8</sup> Na' zi baḷe' nagake' Elíazan' ba bila' dii yoblə. Na' zi baḷe' nagake' nochod' dii beṅ'ka' wdixjee daa goll Chioza' ḷegake' kani'yin ba biban ladj beṅ' wetka'. <sup>9</sup> Na' Heródeza' wne':

—Nad' ben' mandad wchog yen dii Juanna'. ¿Noraz beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

*Jesúza' bwawe' gayaa mil beṅ'*

*(Mt. 14:13-21; Mr. 6:30-44; Jn. 6:1-14)*

<sup>10</sup> Na' ka billin postlka' shllin, na' gollgake' Jesúza' yog'lol diika' jengake'. Na'ch bchi'e to lezgake' yella' le Betsaida. <sup>11</sup> Na' ka wṅezi beṅ'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' ḷegake' na' bzajniile' ḷegake' ka nak yeḷ' wṅabia' che Chioza', na' biyone' beṅ'ka' bi shao'.

<sup>12</sup> Na' ka ba wlle', beṅ'ka' shllin jabig'gake' kwit Jesúza' na' gollgake'ne':

—Goll beṅ'ki yiyajgake' yellka' wa no ranshdo'ka' lliā gaozə lljadiljgake' dii gaogake' na' ga guesgake', la' ga ni zoacho bikzə bi de.

<sup>13</sup> Na' che' Jesúza' ḷegake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chnto' che yoguee.

<sup>14</sup> Gollgake'ne' ka' la' ka do gayaa mil ben' byoka' lle' na'. Na'ch che' Jesúza' ben'ka' shllin:

—Li ye'gake' kwe' shiyon wejgake'.

<sup>15</sup> Na' bzoagake' xtillee na' wlekgake' ben'ka'. <sup>16</sup> Na'ch bex' Jesúza' yetxtilka' gay' na' bel'ka' chop. Na' blis jalawe'na' yabana' bi'e Chioza' ye' choxken, na' bxoje'n na' bi'en ben'ka' naggake'ne' txen na'ch be'gake' che che ben'ka'. <sup>17</sup> Na' yog'gake' wdao ka beljgakile', na' diika' bichoonan bitopgake'n biyakten shllin xet'.

*Pédrona' bi'e dill' nan Jesúza'n beena' wlej Chioza' inabi'e*  
(Mt. 16:13-19; Mr. 8:27-29)

<sup>18</sup> To shii ka choe'lwill Jesúza' Chioza', na' lle' ben'ka' naggake'ne' txen, na' wnable' legake':

—¿Non na ben'ka' nak'?

<sup>19</sup> Na' che'gake'ne':

—Bale' naggake' nako' dii Juan wichoa nisa', na' zi bale' naggake' nako' Elíaza', na' zi bale' naggake' nako' to ben' wdixjee daa goll Chioza'ne' kani'yi, na' ba bibane' ladj ben' wetka'.

<sup>20</sup> Na'ch chi'e legake':

—Shera le', ¿nora nale nak'?

Na'ch che' Pédróna'ne':

—Lin' Crístóna', beena' ncheb Chioza' wselee.

<sup>21</sup> Na'ch goll Jesúza' legake' ni to kono ye'gake' ka'.

*Goll Jesúza' postl che'ka' wit ben' le'*  
(Mt. 16:20-28; Mr. 8:30-9:1)

<sup>22</sup> Na' chi'e legake':

—Kon ka nchogbia' cha', nad', Ben' Bsel' Chioza' Yellioni, biya dii wchi' wsak'gake' nad'. Na' ben' golka' chnabia' wzoagake' nad' ka'lə na' ka'kzə bxožka' chnabia'



na' ben'ka' chli' chsedi leya'. Na' chonan byen witgake' nad', na' ka gak shon̄ lla yiban' ladj ben' wetka'.

<sup>23</sup> Na'ch golle' yog'lol̄e':

—Shi no cheeni gon nad' txen, chiya! wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa. <sup>24</sup> La' beena' bi chzani yel' mban che'na' yen ile'ile' bittez ni cha', beenan' kwiayi'. San beena' chzani yel' mban che'na' ni cha', beenan' gat' to yel' mban che' zejli kani. <sup>25</sup> Bibi zjanayin gap ben' yog'lol̄ daa de yell-lioni, shi le' kwiayee. <sup>26</sup> Nottezə ben' chiyii chido'i nad' na' che cho'a xtillaana', ka'kz nad', Ben' Bsel' Chioza' Yell-lioni, yiyii yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'. <sup>27</sup> Na' dii li nia' le', bal-le lle'le ni, ni mbanle kat' wli' Chioza' yel' wnabia' che'na'.

*Jesúza' biyake' nlla'lə*

*(Mt. 17:1-8; Mr. 9:2-8)*

<sup>28</sup> Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' bchi'e Pédrona', Juanna' na' Jacóbona'. <sup>29</sup> Na' shlak choe'lwille' Chioza', biyak cho'alawe'na' nlla'lə, na' biyak xe'na' xtil ax̄t chey cheeni'n. <sup>30</sup> Na' gokxe chop ben' bshaljlengake'ne', toe' dii Moiséza' na' beena' sto Elíaza'. <sup>31</sup> Na' yel' chey cheeni'na' nechjan legake'. Na' chshaljlengake'ne' che ka nak yel' wita' ile'ile' Jerusalénna'. <sup>32</sup> Na' Pédrona' len Juanna' na' Jacóbona' le chakxwegake', per bendiplall'gake' bi wtesgake', na'ch ble'gakile' yel' chey cheeni' che Jesúza' na' che ben'ka' zi chop bllin kwite'na'. <sup>33</sup> Na' ka ba chikwas dii Moiséza' na' Elíaza' kwit Jesúza', Pédrona' golle' Jesúza':

—Maestro, ¡le wen zoacho nizə! Gonnto' shon̄ə ransh, to cho', to che dii Moiséza' na' sto che Elíaza'.

Na' ni bi gokbe'i Pédróna' bin golle'. <sup>34</sup> Na' ni choe'tie' dill', ka wze to bej gana' lle'gake' na' bkwashaan legake'. Na' le bllebgake' ka gokbe'gakile' ba yoogake' loo beja'. <sup>35</sup> Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

<sup>36</sup> Na' ka wde goll Chioza' legake' ka', na' ble'gakile' stoza Jesúsza' ze. Na' ni to kono gollgake' daa ben ble'gakile'.

*Biyon Jesúsza' to bi' wew' yoo dii xiwaa*

*(Mt. 17:14-21; Mr. 9:14-29)*

<sup>37</sup> Betiyo, ka biyetjgake' lo yaana', ben' zan wal jatilgake' legake'. <sup>38</sup> Na'ch ladj ben'ka' wne to ben' byo zillj, chi'e Jesúsza':

—Maestro, ben goklen bwiagach bi' cha'ni, la' tlish' tyajchgabaan zoa. <sup>39</sup> Dii xiwaa choxa'n leb' na' tokonganz chosyaab', na' chonan ka chazb' shon axt chbia bllin' cho'abaa. Na' chiya dii chonin leb', na' aga cheenin wsanan leb'. <sup>40</sup> Ba got'yoid' ben'ki nakgake' li' txen yibejgachgake' dii xiwaa yoob', na' bi gokgake' yibejgake'n.

<sup>41</sup> Na'ch che' Jesúsza':

—¿Zi'tegalə chelena', le' ben' mal na' ben' bi chajle! ¿Zi ka'k'tek chiyal' soalen' le'? Na' ¿zi ka'k'tek chiyal' soid' le'? Da diwa' bi' cho'na' ni.

<sup>42</sup> Na' ka zej bi'na' kwit Jesúsza' na' wchoon dii xiwaa leb' lo yona' na' wyazb' shona' sto shii. Na'ch bsheshlen Jesúsza' dii xiwaa na' bichejan, na' biyakib'. Na' biyone'b' lall' na' xabaa. <sup>43</sup> Na' yog' ben'ka' lle' na' bibangakile' daa ble'gakile' ye! wak xen che Chioza'.

*Sto shii wdixjee Jesúsza' witgake'ne'*

*(Mt. 17:22-23; Mr. 9:30-32)*

Na' shlak chibani yog' ben'ka' ble'i daa ben Jesúsza', na' golle' ben'ka' nakgake'ne' txen:

<sup>44</sup> —Li wzeyen' nagle dga inia' le': gongake' nad', Ben' Bsel' Chioza' Yell-lioni, lall' na' ben'ka' chakzi' chakzbani nad'.

<sup>45</sup> Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllebgake' inab-gakile'ne' bi zejin daa golle' legake'.

*¡Noran zak'chi?*

*(Mt. 18:1-5; Mr. 9:33-37)*

<sup>46</sup> Na' wzolo chakdił-len ljjwellgake' nogaken' nak ben' zak'chi. <sup>47</sup> Ka gokbe'i Jesúza' daa chza'lall'gake', na'ch wdoyoe' to bi'do' na' bzie'b' kwite'na'. <sup>48</sup> Na' chi'e legake':

—Nottezə ben' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' ben' zak'chi ladjlena'.

*Beena' bi chakile' cho' zi', txenkzan nake' cho'*

*(Mr. 9:38-40)*

<sup>49</sup> Na'ch goll Juanna'ne':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben'. Na' bllonnto' gone' ka', la' bi nake' cho' txen.

<sup>50</sup> Na' che' Jesúza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

*Jesúza' bsheshlene' Jacóbona' len Juanna'*

<sup>51</sup> Na' ka ba zoa yiyaj Jesúza' yabana', na'ch btoblallee yiyaje' Jerusalénna'. <sup>52</sup> Na' bselee ben' wllialozegagake' na' wyajgake' to yell daa mbani Samáriana' jtiljgake' gana' yigaane'. <sup>53</sup> Na' ben' Samáriaka' bi blebgake'ne' daa nezgakile' Jerusalénna'lan yiyaje'. <sup>54</sup> Na' chop ben'ka' nakgake'ne' txen, Jacóbona' len Juanna', ka ble'gakile' ka ben ben' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega ben'ki?

<sup>55</sup> Na' biyechj Jesúza' bsheshlene' legake', chi'e:

—Aga nezile non chnabia' yichjlall'do'lena' nazle ka'.

<sup>56</sup> Nad', Ben' Bsel' Chioza' Yell-lioni, aga zaa kwenche wliayaa yel' mban che ben', san zaa kwenche yisla' yel' mban che'kan'.

Na'ch biyajgake' yell yoblə.

*Ben'ka' goklall' lljano Jesúza'*

*(Mt. 8:19-22)*

<sup>57</sup> Na' ka zejgake' tneza', to ben' chi'e Jesúza':

—Xan', cheenid' sa'len' li' gattezə shajo'.

<sup>58</sup> Na' che' Jesúza'ne':

—Zoa yech ga chiyoobez'ka', na' byindo'ka' non lilldo'gakb, san nad', Ben' Bsel' Chioza' Yell-lioni, biga de yigaan'.

<sup>59</sup> Na'ch che' Jesúza' sto ben':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

<sup>60</sup> Na'ch che' Jesúza'ne':

—Bibi gakilo', wikwash'kzə ljwell ben' wetka'. San li', jitixje'i ben' ka nak yel' wñabia' che Chioza'.

<sup>61</sup> Na'ch sto ben' yoblə chizi'e Jesúza':

—Xan', cheenid' sa'len' li' per zigaate be' latj lljalaaach' dill' bish' ljwell'ka'.

<sup>62</sup> Na' che' Jesúza'ne':

—To ben' chwaane' goon, aga wak wwie' gozkoll'lə. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.

## 10

*Jesúza' bselee* guiyon shllin ben' jtixje'gake' cho'a xtilleena'

<sup>1</sup> Na' ka wde dga, Jesúza' wleje' zi guiyon shi ben'\* na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'. <sup>2</sup> Na' golle' legake':

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsel'stoe' wen llinka' kwenche yizi' yilap-gake'n. <sup>3</sup> Li shajshki naa, nad' chselaa le' ka xil'do' ba zej ladj ba zña. <sup>4</sup> Bi wa'le ga koo xshinlazle, ni mech, ni zi shkwe' xel-le; na' bi shazile wwaple ben' chiox tneza'. <sup>5</sup> Na' ka sho'le to lill ben', zigaate wwaplene' chiox, ye'lene': “Soashgale mbalaz, le' zoale yooni.” <sup>6</sup> Na' shi zoa ben' cheenile' soe' mbalaz, na' ye'l' mbalaza' yigaanlenan le'. Na' shi bi cheenile', na' yibiilenan le'. <sup>7</sup> Na' yooná' gana' illinle na'tezə yigaanle na' yeej gaole kon bi gongake' le', la' to wen llin chiyal' ikaa laxje'. Na' bi lljsoale to to yoo. <sup>8</sup> Kat' illinle to yell ga wlebgake' le', yeej gaotezle bittezə dii gongake' le'. <sup>9</sup> Na' yiyonle ben'ka' bi shao' yella', na' ye'le legake': “Ye'l' wñabia' che Chioza' ba bla'n laoleni.” <sup>10</sup> Na' shi illinle to yell ga bi wlebgake' le', li yide lyell, li ye'gake': <sup>11</sup> “Axt bishte che yell cheleni wllia ni'anto'ni chibibnto'n kwenche gakbe'ile aga wenan chonle bi chleble cho'a xtill' Chioza'. Na' li koosha yichjle dga inanto' le', ye'l' wñabia' che Chioza'n ba bla'n laoleni.” <sup>12</sup> Na' nia' le', ben'ka' lle' yellka' gana' bi wlebgake' le', dii xench nak ye'l' zak'zi'na' ile'gakile' aga ka ben' yell Sodómaka' llana' wchoglo Chioza' che ben'.

---

\* 10:1

*Ben'ka' bi bzenag xtill' Jesúza'*

*(Mt. 11:20-24)*

<sup>13</sup> 'jNyesh'laz gak chele, le' ben' yell Corazín na' le' ben' yell Betsaida! La' shel' gok ye! wakka' yell Tírona' na' Sidónna' ka diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'.  
<sup>14</sup> Kat' illin lla wchoglo Chioza' che ben', ye! zi' xench ile'ile aga ka ben' yell Tíroka' na' ben' yell Sidonka'.  
<sup>15</sup> Na' le' ben' yell Capernaúm, bi gonle lez yillinle yabana', la' Chioza' wzalee le' gana' sak'zi'le.

<sup>16</sup> Na'ch che' Jesúza' ben'ka' bselee:

—Ben'ka' chzenaggake' chele, cha'kzan chzenaggake'. Na' ben'ka' bi chlebgake' le', nad'kzan bi chlebgake'. Na' beena' bi chlebe' nad', lekzka' bi chlebe' Chioza', beena' bsel' nad'.

*Billin ben'ka' guiyon shi*

<sup>17</sup> Na' ben'ka' guiyon shi† le chibagakile' ka billingake' kwit Jesúza', na' che'gake'ne':

—Xan', axt dii xiw'ka' chilleshgakan ka chzetjnto' lio'na'.

<sup>18</sup> Na'ch che' Jesúza' legake':

—Ble'id' Satanáza' daa chnabia' dii xiw'ka' bxopan yabana' ka chxopto yi' wziw'.  
<sup>19</sup> Nad' ba ben' le' ye! waka' kwenche la'kzi gad' no bel' znia wa no bexjoni' le' aga bi gakile', na' wlej wshoshjtele yog' daa chon dii xiwaa.  
<sup>20</sup> Per bi yibaile daa chisheshle dii xiw'ka', san li yibayi daa ba da' lлена' lee libra' de yabana'.

*Jesúza' bibaile'*

*(Mt. 11:25-27; 13:16-17)*

---

† 10:17

21 Na' katena' Espíritu Sántona' bene' ka bibachgayi Jesúza', na' wne':

— Xa, li' nako' Xan yabana' na' yell-lioni, na' choe'lawaa li' daa ba bliilo' ben'ka' bibi chajonii daa bi bliilo' ben' sin'ka' na' ben'ka' nteyi. Kan' ba wyazlalloo gono', Xa.

22 'Xa'na' ba none' lall' na' yog'te dii de. Na' ni to kono nezi noyen'an' nak' nad' Xiine'; toz Xa'na' nezile'n. Na' ni to kono nezi noyen'an' nak' Xa'na'; toz nad' Xiine' nezid', na' chon' ka inezi ben'ka' cheenid' inezgakile'n.

23 Na'ch biyeçhje' bwie' ben'ka' nakgake'ne' txen, chi'e legake':

—Chakomba ben'ka' chle'gakile' diika' chle'ile naa.

24 Nia' le' ka', la' zan ben'ka' wdixjee daa goll Chioza' legake' na' zan ben' wñabia'ka' goklall'gake' ile'gakile' diiki chle'ile naa, na' bi ble'gakile'n. Goklall'gake' yengakile' dga chenile naa, na' bi bengakile'n.

To ben' Samaria bene' to dii wen

25 Na'ch wbig' to ben' chli' chsedi leya' wñabile' Jesúza' kwençhezə inezile' shi wak yillii Jesúza' xtilleena', na' wñabile'ne':

—Maestro, ¿bin chiya! gon' kwenche gat' to yel' mban cha' zejli kañi?

26 Na'ch che' Jesúza'ne':

—¿Bin na leya' chiya! goncho? ¿Bi na daa chlabo'?

27 Na'ch beena' chli' chsedi leya' chi'e:

—“Chiya! gakicho Xancho Chioza' do yichj do lall'cho, do ka nak fuerz chechona', na' axt ga zeelo chajniicho; na' gaki bish' ljwellcho ka chaki kwincho.”

28 Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kañi.

29 Na' beena' bi goklall' wñit kwine', na'ch chi'ene':

—¿Noran bish' ljwell'?

<sup>30</sup> Na'ch che' Jesúza'ne':

—To beŋ' ziyo'e nez daa ziza' Jerusalénna' daa ziyaj Jericólə, na' bchej wbanka' tneza' wlangake' yog'te diika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'. <sup>31</sup> Na' shintk gok ka' ka wde to bxoꝝ lo neza'. Na' ka ble'ile' beena' de na', to wdeze' ka'lə. <sup>32</sup> Na' lekzka' wde to beŋ' nake' xiŋ dia che dii Levína'. Na' ka ble'ile' chtol beena' na', lekzka' to wdeze' ka'lə. <sup>33</sup> Na' sto beŋ' Samaria lekzka' zeje' tneza' ka ble'ile' beena' chtol na', na' biyeshile'ne'. <sup>34</sup> Na' jabigüee kwite'na', na'ch bllie' lo we'na' set na'ch vino, na' bcheje'n. Na' bilepe'ne' koll' bayix' che'na', biçi'ene' to yoo gana' wdape'ne'. <sup>35</sup> Na' betiyo, ka ba zoa yiza' beŋ' Samáriana', wleje' chop mech plat‡, na' bi'en xan yoonə' kwenche gap wwie'ne' zan lla, na' chi'ene': “Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə.” <sup>36</sup> Na' ¿nora beŋ'ki shon chakilo' beni bish' ljwell beena' wlan beŋ' wbanka'?

<sup>37</sup> Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiya'l' gono'.

*Jesúza' jawie' Mártaana' na' Maríana'*

<sup>38</sup> Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'. <sup>39</sup> Na' zoa to beŋ' bil Mártaana' lie' María, na' Maríana' wchi'e lao Jesúza' chzenague' dillaa cho'e. <sup>40</sup> Na' Mártaana', dechga daa gone' na' wzeche' wneyi cheyin, na'ch wyaje' kwit Jesúza', chi'ene':

---

‡ 10:35 Mech plat: dill' griegona' nan denario, na' nakan to mech dii zak' che shlla llin.



—Xan', goll-lat' beṅ' bila'ni gaklene' nad'. Toz' ndakw' yog' mandadka'.

<sup>41</sup> Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'. <sup>42</sup> Per toz daa de nakan dii llialach na' Maríani ba wleje'n, na' kono gak yikaan lawe'na'.

## 11

*Bli' Jesúza' nak we'lwillgake' Chioza'*

*(Mt. 6:9-15; 7:7-11)*

<sup>1</sup> Shlin choe'lwill Jesúza' Chioza' to latj, na' ka biyoll be'lwille'ne', to beena' nake'ne' txen golle'ne':

—Xan', bli'yi neto' nakan chiyał' we'lwillnto' Chioza', ka ben Juanna' bli' bsedile' beṅ'ka' bengake'ne' txen.

<sup>2</sup> Na'ch che' Jesúza' legake':

—Kat' we'lwill-le Chioza' kin inale:

Xanto' Chios, beṅ' zoa yaba,

we'la'oshga yog'loł beṅ' li'.

Na' inabia'gacho' loo yichjlall'do' yog'loł beṅ'

kwenche gak lo yell-lioni ka chazlaloo, kon ka chak yabana'.

<sup>3</sup> Ka nak daa choṅo' cheej chaonto' yog' lla, bengachan naanlla.

<sup>4</sup> Wxi'xen chento', ka chon neto' chzi'xennto' bittezə dii choni beṅ' neto'.

Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

<sup>5</sup> Na'ch che' Jesúza' legake':

—Inatezcho shi zoa to beṅ' nllaguile na' do chel shajle lille'na' na' ye'lene': “Beṅ' bish'dawaa, beṅ' shloll nad' shon yetxtil, <sup>6</sup> la' ba bla' lilla'na' to beṅ' nllaguid', zee zit', na' bikzə bi de cha' wshabidee.” <sup>7</sup> Na'ch beena' yoo loolə lii inatie' le': “Bi gonzilo' nad' zed, ba nsejl'

lillii na' ba delen' bi' cha'ki. Aga wak chas' gon' daa chyaljilo'." <sup>8</sup> Na' nia' le', la'kzi nllagteile'ne', bi chase' wi'ene' daa chnabile'ne'. San shi seyide' inabe'n, chen ki cheenile' chase' wi'e yog' daa chyaljile. <sup>9</sup> Daan nia' le': Li inabi Chioza' bin cheenile na' gone'n. Li yiyiljan na' willelkzilen. Li wtankw lee puerta', na' wsaljke'n. <sup>10</sup> La' beena' chnabile' to bi chnabile' ben', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsaljkzgake'n.

<sup>11</sup> 'Ka chak chele le' nakle ben' chisgol chischoo bi'do', ka inabi xiinlena' le' yetxtila', aga we'leb' to yaj. Wa shi inabib' le' to bel gaob', aga we'leb' to bel znia. <sup>12</sup> Wa shi inabib' le' to llit gaob', aga we'leb' to bexjoni'. <sup>13</sup> Le' naktele ben' mal, chak we'le xiinleka' daa nak dii wen. jNa' Xacho Chioza' zoa yabana' nakteche' ben' wench! Na' wi'e Espiritu Santo che'na' soe' loo yichjlall'do' yog' ben' inabe'ne'.

*Nagake' Jesúza' chibeje' dii xiw'ka' kon yel' wak che Bezlona'*

*(Mt. 12:22-30; Mr. 3:19-27)*

<sup>14</sup> Jesúza' chibeje' to dii xiw' yoo to ben' bi chak inie', na' ka bichejan na'ch gok binie'. Na' ben'ka' lle' na', bibangakile' daa bene'. <sup>15</sup> Na' bale' che'gake':

—Kon yel' wak che Bezlona', daa chnabia' dii xiw'kan', chibeji beeni dii xiw'ka'.

<sup>16</sup> Na' zi bale' wñabgakile'ne' gone' to yel' wak dii ile'gakile' kwenche wli'n shi Chioza'kzan bseleene'. <sup>17</sup> Na' ba nezli Jesúza' daa chza'lall'gake', na'ch chi'e legake':

—Shi ben'ka' lle' to yell gaggake' choplə na' til-len ljwellgake', na' kwiayi' yella', shi naa. Na' lekzka' shi ben'ka' lle' toz yoo til-len ljwellgake', aga ssha soagake' toz. <sup>18</sup> Na' ka'kzə Satanáza' na' dii xiw'ka' yoo lo na'yin, shi gaggakan choplə na' kwiayi' yel' wñabia' cheyinna'.

Nia' le' ka' daa nale yel' wak che Bezlonan\* chibejid' dii xiw'ka' yoo ben'. <sup>19</sup> Shi chibej' dii xiwaa yoo ben' kon yel' wak che Bezlona', † ¿sheralə ben'ka' nakle txen? ¿Alezkka' lennan' chibejlengake' dii xiwaa yoo ben'? Daa bi nakan ka', chli'n naklejlilen. <sup>20</sup> Na' daa chibej' dii xiwaa yoo ben' kon yel' wak che Chioza', lennan' chli'n ba bla' yel' wñabia' che Chioza' ladjleni.

<sup>21</sup> 'Kat' to ben' wal nape' dii gonile' zn̄ia na' chape' lille'na', aga no gak l̄jtoyo dii de che'. <sup>22</sup> Per shi illin sto ben' walch til-lene'ne', na' gone'ne' gan, na'ch yigoyoe' yog' daa none' lez wñiaile', na' kwantie' yog' daa yoo loo lille'na' na' wi'e lat' wej che ben'ka' nakgake'ne' txen.

<sup>23</sup> 'Beena' bi nake' nad' txen, chakzbanile' nad'. Na' beena' bi chaklen kwenche wzenag ben' cho'a xtill' Chioza', len' chsej chllone' wzenaggake'n.

*Chillin dii xiwaa sto shii gana' bichejan*  
(Mt. 12:43-45)

<sup>24</sup> 'Kat' chiche' to dii xiw' dii yoo ben', na' chjadan ga bibi dekwə na' chyiljan gana' yizi'lalliin. Na' shi bi chllelin gana' yizi'lalliin na'ch chakin: “Yiyaachkz' dii yoblə gana' bichejkz'.” <sup>25</sup> Na' ka chillinan gana' bichejan, nakan ka to loo yoo dii nxi n̄loa na' nakan xochi. <sup>26</sup> Na'ch chza'n chjxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlə mal che beena' aga ka gok che' dii nech.

*Chakomba beena' chzenag cho'a xtill' Chioza'*

<sup>27</sup> Na' shlak che' Jesús'a' ka', to noolə zie' ladj ben'ka' lle' na' wñie' zilljə, chi'e:

—¡Chakomba noola' wxane' li' na' bwall b̄xope' li'!

\* 11:18 Bezlonan': lekzannan' Beelzebú de xtil na' nakan sto le Satanáza'.

† 11:19 Bezlona': lekzannan' Beelzebú de xtil na' nakan sto le Satanáza'.

<sup>28</sup> Na' che' Jesúza'ne':

—jMbalazch ben'ka' chzenaggake' cho'a xtill' Chioza' na' chongake' ka nan!

Ben'ka' bi chajle' che Jesúza' wñabgake' wli'e to yel' wak

(Mt. 12:38-42; Mr. 8:12)

<sup>29</sup> Na' bdi'a bllagch ben'ka' kwit Jesúza' na' golle' le-gake':

—Le' zoale naa, nxinj yichjlall'do'leka'. Chñable wliid' le' to yel' wak, na' aga wliid' le' daa cheenile. Lete ile'ile to dii nak ka yel' waka' daa ben Chioza' che dii Jonáza'.

<sup>30</sup> Daa gok che Jonáza' bli'n yel' wak che Chioza' lao ben' Níniveka'. Kakzə nad', Ben' Bsel' Chioza' Yell-lioni, wli'a yel' wak che Chioza' laolena', le' zoale naa. <sup>31</sup> Na' llana' wchoglo Chioza' che ben', na' yiban noola' wñabia' do lli'lə, na' gawe' xya chele lao Chioza', le' zoale naa, ine' chiyal' sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' ben' zak'chi ka dii Salomónna', na' bi chzenagle cha'.

<sup>32</sup> Na' lezkka' llana' wchoglo Chioza' che ben', na' yiban ben' Níniveka' na' gaogake' xya chele lao Chioza', le' zoale naa, inagake' chiyal' sak'zi'le. La' legake' biyaj bileni saaxya che'ka' ka be'len Jonáza' legake' cho'a xtill' Chioza', na' nad' zoa' ni, nak' ben' zak'chi ka dii Jonáza', na' bi chzenagle cha'.

*Jalaochona' nakan ka to yi' che kwerp chechona'*

(Mt. 5:15; 6:22-23)

<sup>33</sup> Na' lezkka' chi'e legake':

—Biga zoa ben' chxene' to kandil na' chzoe'n to ga ngash' wa wdoseen to dii kwwashaan len, san chzoe'n sibə kwenche ile'i ben'ka' sho' loo yoona'. <sup>34</sup> Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i

jalawo'na', kwerp cho'na' zoan lo yel chola'. <sup>35</sup> Na' bsak' wze wneyi kwenche ki lwaa to' lo beeni'na', tazo' lo yel chola'lə. <sup>36</sup> Shi doxen kwerp cho'na' yoon beeni', na' ni to dii shgasj shchol bi yoon, na' ile'ilo' kwasloj ka chle'ilo' kat' ze to yi' chzeeni'n doxen.

*Jesúza' chsheshlene' fariseoka' na' ben'ka' chli' chsedi leya'*

*(Mt. 23:1-36; Mr. 12:38-40; Lc. 20:45-47)*

<sup>37</sup> Na' ka biyoll be' Jesúza' dillaa, na' bche' to fariseo le' ljtawe' lille'na'. Na' wyoo Jesúza' lille'na' na' wchi'e cho'a mesa'. <sup>38</sup> Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'. <sup>39</sup> Na' ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki ben' le ben' wen nakle, len le' chibaile chkaale bi de che ben' na' chibaile chonle bichlə dii mal. <sup>40</sup> ¡Le' ben' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjlall'do'choni? <sup>41</sup> Li izani bi de chele, li we'n ben' bibi de che', na'ch yixi' yiyech yichjlall'do'lena'.

<sup>42</sup> ¡Nyesh'laz gak chele, le' fariseo! Choe'le Chioza' lat' wej<sup>‡</sup> no yixwej, no kwanirod na' bichlə yix' kwan dii mbekle. Na' bi chonle daa nak shlich'a na' bi chakteile' Chioza'. La' daayen'an llialach gonle per lekzka' bi wsanle kwejle daa chnab Chioza'.

<sup>43</sup> ¡Nyesh'laz gak chele, le' fariseo! Le chibaile kwe'le gana' chbe' ben'ka' zakii gana' chdop chllagcho choe'lwillcho Chioza', na' cheenile yog' ben' kwee le' balaan ga lle' lla' ben'.

<sup>44</sup> ¡Nyesh'laz gak chele, daa nakle ben' wxiye'! Nakle ka to ba che ben' wet dii bi nla' lawinna' dii bi chle'i ben'

<sup>‡</sup> 11:42 Lat' wej: literalmente la décima parte.

na' chaj chdegake' lawinna', ni bi chakbe'gakile' bin naki loolə.

<sup>45</sup> Na'ch to beena' chli' chsedi leya' golle' Jesúza':

—Maestro, daa no' ka' len neto' chzoazi'yoo.

<sup>46</sup> Na' goll Jesúza':

—¡Lekzka' nyesh'laz gak chele, le' chli' chsedile leya'! Dii zan dii che'le ben' chiya! gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gaklenle legake'.

<sup>47</sup> ¡Nyesh'laz gak chele! Le' chonshao'zle cho'a ba che dii ben'ka' wdixjee daa goll Chioza' legake', ben'ka' bet dii xoxto'leka'. <sup>48</sup> Na' daa chonle ka' zejín chonle txen dii xoxto'leka' ka nak daa bengake'. La' legaken' betgake' ben'ka', na' le' chonshao'le cho'a ba che'ka'.

<sup>49</sup> Na' daan, lo ye! sin' che Chioza' wne': “Wselaa ben' chixjee daa yepée na' len ben' wi'e cho'a xtillaana', na' bale' witgake' na' zi bale' biya dii gongakile'ne'.” <sup>50</sup> Na' le' zoale naa, lenle ile'ile ka ye! zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxé wzil yell-lioni. <sup>51</sup> Le' zoale naa, lenle chido! le sak'zi'le ni che ye! wit che dii Abela' axt dii Zacaríaza', beena' betgake' cho'a yoodo'na' kwit gana' chzeygake' bayix'ka'.

<sup>52</sup> ¡Nyesh'laz gak chele, le' chli' chsedile leya'! La' nazle chsedile ben' che Chioza', per ni le' bi cheenile wzenagle daa nan, na' chillontele shajni ben'ka' chzenagan.

<sup>53</sup> Na' ka goll Jesúza' ka', ben'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wñabgakile'ne' chiya dii nak lallj, <sup>54</sup> goklall'gake' we' Jesúza' dill' dii wchixa'n le'.

## 12

*Dill' wxiye' che fariseoka' zaklebin levadúrana'*

<sup>1</sup> Na'ch bdop bllag ben' zan inlleb gana' zoa Jesúza' axt chdakw ljjwellgake', na' wzoloe' zigaate be'lene' ben'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'. <sup>2</sup> La' daa kono nezi naa, wllin lla inezi beanaan, na' yog'lol' daa ngash' naa, wllin lla ila' lawin. <sup>3</sup> Na' yog' daa chakile kono beni daa wnale, wllin lla inezgakile'n. Na' daa wnale ka yoole loolə nsejshoshle yoona', axt gosya'i ben' wzie'n dill'.

*Beena' chiyal'* illebcho

*(Mt. 10:26-31)*

<sup>4</sup> Le' nllaguid', nia' le' bi illeble ben'ka' witgake' le', la' kachokzan zeelo gak gongakile' le'. <sup>5</sup> Per ni inia' le' non chiyal' illeble: li illeb Chioza', la' ka yiyoll yikee yel' mban chelena' lekzka' nape' yel' wñabia' wzalee le' lo yi' gabila'. Len', li illeb.

<sup>6</sup> Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'. <sup>7</sup> Na' ka'kzə le', axt to to yish' yichjləna' mbab. Na' bi illeble, la' zak'chle aga ka zan byindo'ka'.

*Ben'ka' chchebgake' nakgake' Crístona' txen*

*(Mt. 10:32-33; 12:32; 10:19-20)*

<sup>8</sup> Na' nia' le', beena' wcheb lao ben' nake' nad' txen, lekzka' nad', Ben' Bsel' Chioza' Yell-lioni, wi'a dill' lao yog'lol' anjl che Chioza', yepgakee beeni nake' nad' txen. <sup>9</sup> San beena' bi wcheb nake' nad' txen, lekzka' nad', wi'a dill' lao yog'lol' anjl che Chioza', yepgakee beeni bi nake' nad' txen.

<sup>10</sup> Na' beena' biz gon ina cha', nad', Ben' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

<sup>11</sup> Kat' lljwa'gake' le' lao ben'ka' chñabia' gana' chdop chllagcho choe'llwill-cho Chioza', wa lao ben' chchogbia'

che beṅ' wa lao joschis, bi sele wṅeyi naklə yilliile cho'a xtilł' beṅ'ka' wa bin inale. <sup>12</sup> La' kat' inele, Espiritu Sántona'kzan wzajniile' le' daa chiyał' inale.

*Dii nxolla' nsa' yeł' wni'ana'*

<sup>13</sup> Na' ladj beṅ'ka' ndop nllag wṅe to beṅ', golle' Jesúza':  
—Maestro, gollgach beṅ' bishaana' gone' daa chidol' ikaa che dii xanto'na'.

<sup>14</sup> Na' che' Jesúza'ne':

—ǵNora bzoa nad' ladjleni ka to beṅ' chon yeł' joschis che beṅ' wa beṅ' chlāa bi dii de che beṅ'?

<sup>15</sup> Na' lekzka' chi'e:

—Li wsak' kwenche bi selall'le gat'ch bi gat' chele, la' aga dii kan' llialo lo yeł' mban chelena'.

<sup>16</sup> Na'ch bzoe' to jempl, chi'e legake':

—Wzoa to beṅ' wni'a na' dii zan bizi' bilape' lo yell-lio che'na'. <sup>17</sup> Na'ch chakile': “ǵNakra ka gona'n naa? Biga de kooshawaa dga bizi' bilap'.” <sup>18</sup> Na'ch wne': “Ba nejid' bi gon'. Yičhiñj' yoonā' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichlə dii de cha'. <sup>19</sup> Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz.” <sup>20</sup> Na' goll Chioza'ne': “Li, beṅ' bi nteyi, naanlle' gueto' na' daa ngooshawoo, nola cheyi gakan.” <sup>21</sup> Kan' gak che beena' chtop chshag yeł' wni'ana', na' bibi zakee lao Chioza'.

*Chioza' chap chwie' beṅ'ka' nak xiine'*

*(Mt. 6:25-34)*

<sup>22</sup> Ka wde dga, Jesúza' golle' beṅ'ka' nakgake'ne' txen:

—Naa nia' le': Bi sele wṅeyi che daa yeej gaole, ni bi sele wṅeyi che xalaanlena'. <sup>23</sup> La' zak'techlə yeł' mban chelena' aga ka daa yeej gaole, na' zak'tech xkwerplena' aga ka xalaanlena'. <sup>24</sup> Li wwiakachi bechjka', la'kzi bi



chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', naa, zak'techle aga ka bado'ka' ze lo llazə. <sup>25</sup> Ni tole bi gak yischoochle yel' mban chelena' ni zi tgor la'kzi nall inlleb selen wneyi. <sup>26</sup> Shi dga nak diido'zə bi chak gonlen, ɔberache zezle wneyi che bichlə dii yoblə?

<sup>27</sup> 'Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'. <sup>28</sup> Shi Chioza' none' xochi yejdo'ka' ze ly-ixaa, la'kzi xtitchgan mbanan na'ch wtop ben' len wlli'en lo yi'na', ɔalechlin ki gone' chele, la'kzi bitek chajle'le gaklene' le'? <sup>29</sup> Na' daan bi setekle wneyi ga sa' daa yeej gaole. <sup>30</sup> La' ben'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen. <sup>31</sup> Li se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

<sup>32</sup> 'Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. <sup>33</sup> Li wit' wde bi de chele, na' li gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. <sup>34</sup> Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúza'

<sup>35-36</sup> Na' lekzka' chi'e legake':

—Li gakto ka wen linka', ben'ka' chbezgake' xane'ka' yilline' daa zeje' to ga chak wishagna'. Na' toshi-izi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n.

<sup>37</sup> Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'. <sup>38</sup> Chakomba ben'ka' chbezgake' yillin xane'ka' la'kzi yilline' do chel wa do zbałzə. <sup>39</sup> Na' chiyał' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. <sup>40</sup> Ka'kzan le' chiyał' sele wneyi toshiizi kwezle nad', Ben' Bsel' Chioza' Yell-lioni, la' tokonganə yiyed'.

*Wen llinna' chon wen na' beena' bi chon wen  
(Mt. 24:45-51)*

<sup>41</sup> Na'ch wñabi Pédrona' Jesúza', chi'ene':

—Xan', ¿ato neto'zan no' ka', anti che yog' beñaan no' ka'?

<sup>42</sup> Na'ch goll Xancho Jesúza':

—¿Nakra chakile chon to wen llin wen, ben' nezi nak gone' llinna', shi xane'na' gone' lall' nee yog'te ben'ka' zoa loo yoo lille'na' kwenche wweej wwawe' legake' gor cheyin? <sup>43</sup> Chakomba wen llinna' chilajile' chone' daa nak lall' nee ka yillin xane'na'. <sup>44</sup> Dii li nia' le', xane'na' gone' lall' nee yog'loł dii de che'. <sup>45</sup> Na' shi wen llinna' gakile': “Akza naa yila' xan'na'”, na'ch soloe' gonile' zban wen llinka' sto, ka nool ka ben' byo, na' soloe' yeej gawe' na' sollile'. <sup>46</sup> Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che ben'ka' bi chongake' daa chiyał' gongake'.

<sup>47</sup> Ben' wen llinna' nezi bin cheeni xane'na' gone', na' bi chone'n ni bi zie'n wneyi, na' wit chinchga xane'na' le'.

<sup>48</sup> Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lołte diika' bene' lall' nee.

*Gak ben' choplə ni che Jesúza'*  
(Mt. 10:34-36)

<sup>49</sup> 'Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ninan. <sup>50</sup> Biya dii yen ile'id', na' le ba chakyeshid' axt ni illini llana'. <sup>51</sup> ;Achakile bid' yell-lioni kwenche gon' ka soalen ljjwell ben' mbalaz? Aga kan', san daa bid' illaa ljjwellgake' na' gaggake' choplə. <sup>52</sup> La' naa, shi to yoo lle' gayee, na' gaggake' choplə, shone' til-lengake' ben'ka' chop, na' ben'ka' zi chop til-lengake' ben'ka' zi shonə. <sup>53</sup> Xa bi' byona' til-lene'b', na' leb' til-lem' xabaa. Na' xna' bi' noola' til-lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

*Bi chajni'gakile' bi zejin daa chon Jesúza'*  
(Mt. 16:1-4; Mr. 8:11-13)

<sup>54</sup> Na' lekzka' che' Jesúza' ben'ka' lle' na':

—Kat' chle'ile ziza' beja' gana' chxoalə wbillə', lii natele: “Wakə yeja'”, na' kayen' chak. <sup>55</sup> Na' kat' chde be'na' daa za' lli'lə, na' nale: “Le zey'chga yizak”, na' kayen' chak. <sup>56</sup> ;Le' ben' wxiye! Kat' chle'ile bin chak xan yabana' na' lo yell-lioni nezile beran gak. ;Bi'che bi chakbe'ile bin zeji daa chon Chioza' llaki zoacho naa?

*Chiyal' yiyoe'xenko ben'ka' chao xya checho*  
(Mt. 5:25-26)

<sup>57</sup> ;Bi'che ki chiyilje to kwizle daa nak dii li dii shao'? <sup>58</sup> Shi no chao xya chele na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chchogbia' che ben', na' le' gone' le' lo na' beena' wseje' le' lillyana'. <sup>59</sup> Na' nia' le', aga wichejle lillyana' axt ki chixjle doxen daa chiyal' chixjle.

## 13

*Chiyal'* yiyaj yilenicho dii malka' choncho

<sup>1</sup> Na' lo llana'tezə bllin ba<sub>l</sub> be<sub>n</sub>' lao Jesúza' goll-gake'ne' ka ben Pilátona' bene' mandad betgake' ba<sub>l</sub> be<sub>n</sub>' Galiléaka' ka chitgake' bayix'ka' choe'la'ogake' Chioza'. Na' xçhene'ka' biyakan toz kon xçhen bayix'ka' betgake'.

<sup>2</sup> Na' che' Jesúza' legake':

—¿Achakile be<sub>n</sub>' Galiléaka' betgake' nakchgake' be<sub>n</sub>' malch aga ka nochlə be<sub>n</sub>' wlall çhe'ka'? <sup>3</sup> Nia' le' bi nakan ka'. Shi le' bi yiyaj yilenile dii malka' chonle, lezkza' yog'le kwiayi'. <sup>4</sup> Shera be<sub>n</sub>' Jerusalénka' shin'shonə, be<sub>n</sub>'ka' wit daa bdakwgake' yoo siba' daa zoa Siloéna', ¿achakile' napchgake' dol' aga ka be<sub>n</sub>' wlall çhe'ka'? <sup>5</sup> Nia' le' bi nakan ka'. Na' shi le' bi yiyaj yilenile dii malka' chonle, lezkza' yog'le kwiayi'.

*Jempl çhe yag yixwewa' daa bi wllia*

<sup>6</sup> Na'ch bzoa Jesúza' to jempl, chi'e be<sub>n</sub>'ka':

—To be<sub>n</sub>' zoa to yag yixwew lo yell-lio çhe'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian. <sup>7</sup> Na'ch chi'e beena' chap yell-lio çhe'na': “Ba gok shon yiz chidwia' shi llian yixwewa', na' ni to bibi chbian. Bçhogchoklan, la' nlançhokzan yell-lioni.” <sup>8</sup> Na' beena' chape' yell-lio çhe'na' chi'e: “Xan', zi' zoashkin zi twiz na' wçheen' xaninna' na' wlla'n be<sub>n</sub>'na'. <sup>9</sup> Shera shicholə wbian. Na' shi bi wlliakzan, na' wçhogo'n.”

*Biyon Jesúza' to noolə llana' chombaan be<sub>n</sub>' Israelka'*

<sup>10</sup> Na' to lla sabd, llana' chombaan be<sub>n</sub>' Israelka', chli' chsedi Jesúza' be<sub>n</sub>'ka' chdop chllag gana' choe'llwillgake' Chioza'. <sup>11</sup> Na' len to noolə ba gok shin'shon yiz nlew dii xiwaa le', na' bichkzə gok yizie' shli. <sup>12</sup> Na' ka ble'i Jesúza'ne' wnie'ne' na' golle'ne':

—Noolə, ba bikwas yillwe' cho'na'.

<sup>13</sup> Na'ch b̄xoə neena' koll' noola' na' katena' lii bizetie' sh̄l̄icha, na' wzoloe' choe'lawee Chioza'. <sup>14</sup> Na' beena' ch-goo x̄nezi ch̄eyi diika' chongake' gana' chdop chllaggake' bllee daa biyon Jesúza' noola' llana' chombaangake', na'ch chi'e beñ'ka' lle' na':

—De x̄op lla goncho llinna', na' bittezə llaka' yidle kwenche yiyakile, na' bi gonle lez yiyakile' llani chombaanch̄o.

<sup>15</sup> Na'ch che' X̄ancho Jesúza' legake':

—Le' beñ' wxiye', ¿abi wsell-le goon̄ cheleka' wa burr cheleka' lljaweejlegakb nisa' llani chombaanch̄o? <sup>16</sup> Nooli nake' xiin̄ dia che dii Abrahama', na' ba gok shin̄'shon̄ yiz Satanáza' daa ch̄n̄abia' dii x̄iw'ka' nonan le' ka beñ' ncheje'. ¿Ana' chakile bi nakan wen biyonee llani chombaanch̄o?

<sup>17</sup> Na' ka goll Jesúza' ka', yog' beñ'ka' chakzbangakile'ne' biyii bido'gakile', na' yog' beñ'ka' sto bibagakile' daa ble'gakile' yel' wakka' chone'.

*Jempl che sa mostásana'*

(Mt. 13:31-32; Mr. 4:30-32)

<sup>18</sup> Na'ch wna Jesúza':

—¿Nakra ka nak yel' w̄n̄abia' che Chioza', lla? Na' ¿bera ka wsaklebida'n? <sup>19</sup> Zaklebin sa mostásana' daa goz to beñ' lo yell-lío che'na', na' ka bla'n na' bgolan gokan to yag xen na' axt bȳindo'ka' ben lillbka' lo xoziinna'.

*Jempl che levadúrana'*

(Mt. 13:33)

<sup>20</sup> Na' lekzka' chize' Jesúza':

—Dga sto wsaklebida'n yel' w̄n̄abia' che Chioza'. <sup>21</sup> Zaklebin levadúrana' daa ch̄ch̄ix̄ to noolə sh̄ona rob yezj kwenche yisgolan kwa che yetxtila'.

*Chiyal'* sho'cho puertdo'naz

(Mt. 7:13-14, 21-23)

<sup>22</sup> Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsdile' ben'. <sup>23</sup> Na' bchej to ben' wñabile'ne', chi'ene':

—Maestro, ¿ato chopchga ben' yila bi kwiayi'gake'?

Na'ch che' Jesúza'ne':

<sup>24</sup> —Li gon byen sho'le cho'a puert daa nak di-ido'zə kwenche soalenle Chioza'. La' ben' zan gakkall'gake' sho'gake'n, na' bi gak sho'gake'. <sup>25</sup> Na' ka solla' xan yoona' wseje' puerta', na' le', igaanle cho'a puerta' wtankwle le'inna' na' ye'lene': “Ben'do', bsaljgach kwenche sho'nto'.” Na' xan yoona' ine' le': “Bi nombi'a le' ni bi nezid' ga ben' le'.” <sup>26</sup> Na'ch ye'lene': “Weej wdaolennto' li' txen, na' bli' bsdilo' neto' yell chento'na'.” <sup>27</sup> Na'ch ine' le': “Bi nombi'a le', ni bi nezid' ga ben' le'. Li lljayaak do na'lə yog'lol-le le' ben' wen dii mal.” <sup>28</sup> Na' kwellchgale ax̄t gaox̄ax̄j leylena' daa le gakshejlall'le ka ile'ile dii Abrahama', dii Isaaca', dii Jacoba' na' yog' dii ben'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole. <sup>29</sup> Na' wde wdeli ben' lle' zbii zkaan yell-lioni yillingake' yabana' gana' chñabia' Chioza' na' kwe'gake' gaogake'. <sup>30</sup> Na' bal ben' bi nak ben' zakii naa gakgake' ben' zakii, na' ben'ka' nak ben' zakii naa bich gakgake' ben' zakii.

*Wchell Jesúza' ni che ben'* Jerusalénka'

(Mt. 23:37-39)

<sup>31</sup> Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

<sup>32</sup> Na' che' Jesúza' legake':

—Li yiyaj na' li lljayell ben' wxiye'na': “Nin soa' to chop shon lla kwenche yibej' dii xiw'ka' yoo ben' na' yiyon' ben' bi shao', na' sheelo diika' chon'.” <sup>33</sup> Chonan byen kooch' nez naa, wx̄e len willj kwenche yiyaa Jerusalenna' gana' chitgake' ben'ka' chyixjee daa che' Chioza', la' agagan' witgake' legake' gan yoblə.

<sup>34</sup> Le' ben' Jerusalén, chitle ben'ka' chidtxjee daa che' Chioza' legake', na' yaja' chitile ben'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'. <sup>35</sup> Li koo yichjle dga inia' le', Chioza' kwey yichje' gani zoale. Na' nia' le', aga wle'chile nad' axt kat'ch illin lla inale: “¡Gaklenshga Xancho Chioza' beeni ba bselee!”

## 14

*Jesúza' biyone' to ben' yo'e yi*

<sup>1</sup> To lla sabd, llana' chombaan ben' Israelka', wyaj Jesúza' jtawe' lill to fariseo, ben' chnabia', na' fariseoka' sto chinal' chinogake'ne'. <sup>2</sup> Na' lawe'na' ze to ben' yo'e yi. <sup>3</sup> Na'ch Jesúza' wñabile' fariseoka' na' ben'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaancho, anti bi den?

<sup>4</sup> Na' legake' bikzə bi gollgake'ne'. Na'ch Jesúza' bexee beena' yoo yina' na' biyone'ne', na' golle'ne':

—Wak yiyajo'.

<sup>5</sup> Na'ch chi'e fariseoka':

—Shi to burr chele wa to goon chele ixopb to loo yech to lla chombaancho, ¿abi yibejleb katena' la'kzi nakan llana' chombaancho?

<sup>6</sup> Na' bikz bi billet-lall'gake' ye'gake'ne'.

*Ben'ka' chaxgake' to ga chak wishagna'*

<sup>7</sup> Na' ble'i Jesúza' ka chon ben'ka' wdaolene' lill farisewa', wche'gake' gana' chbe' ben'ka' zakii. Na'ch bseese to jempl, chi'e legake':

<sup>8</sup>—Kat' no gax le' to ga chak wishagna', bi kwe'le gana' chbe' ben'ka' zakii. La' shera shi ila' ben' zak'chi ka le', <sup>9</sup> na' beena' goxe' le' ine': “Wzolla' kwenche kwe' beeni gani chi'o.” Na'ch do chido'zile yizolla'le na' lljache'le xanteyin. <sup>10</sup> Na' bi gonle ka'. San kat' no gax le', chiya' lljche'le xanteyin kwenche kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaan lao ben'ka' chi'lenle cho'a mesa'. <sup>11</sup> La' beena' chon kwine' ben' choo ben' xen, Chioza' gone'ne' ben' bibi zakii; na' beena' chakile' bibi zakee, Chioza' gone'ne' ben' choo ben' xen.

<sup>12</sup> Na' lekzka' che' Jesúza' beena' goxe'ne' lille'na':

—Kat' cheenilo' wwawo' ben', bi gaxo' ben' zoalenzo' wen, no ben' bishoo, no ben' dialla cho', ni no ben' wlill cho', ben' nake' ben' wni'a, la' legake' lekzka' wak yigoogake' wzonna' yiwaogake' li' ka beno' chegake'. <sup>13</sup> Aga kan' gonon', san byi ben' yesh', ben' net ni'a nee, ben' bi chak sa' wen na' ben' lchol. Ben'kan' chiya' gaxo', <sup>14</sup> na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' ben' wenka' ladj ben' wetka'.

*Jempl che to ben' ben to lni xen*

<sup>15</sup> Na' to beena' chi'lene' Jesúza' cho'a mesa', ka benile' wne' ka', na' chi'ene':

—Chakomba ben'ka' lljadaogake' gana' chnabia' Chioza'!

<sup>16</sup> Na'ch che' Jesúza'ne':

—Wzoa to ben' bene' to lni xen, na' goxe' ben' zan kwenche shajgake' lille'na' lljtaogake'. <sup>17</sup> Na' ka gol' gaogake', bselee to wen llin che'na' jelle' ben'ka' ba bye':



“Li dagach, la' ba gok daa gaocho.” <sup>18</sup> Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yell-lío na' chonan byen lljawia'n. Ye'gacho'ne' si'xene' bi gak yid'.” <sup>19</sup> Na' beena' sto chi'ene': “Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'.” <sup>20</sup> Na' beena' sto chi'ene': “Zi' bshagna', na' bi gak yid'.” <sup>21</sup> Na'ch biza' wen llinna' jayelle' xane'na' yog' daa goll ben'ka' le'. Na'ch bllaa xane'na' na' chi'e wen llin che'na': “Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen.” <sup>22</sup> Na' ka jasane' ben'ka' jatope', na'ch chi'e xane'na': “Xan', ba ben' ka wno', na' ni dech latj sho' ben'.” <sup>23</sup> Na'ch che' xane'na': “Wyaj do yawi nezka' na' ben byen yid ben'ka' yillago' kwenc̄he yilla' loo lilla'ni. <sup>24</sup> Na' nia' le', ka nak ben'ka' bya' dii nech, ni toe' bi gaogake' daa ba bsini'a.”

Ye' zak'zi'na' yen ile'icho ni che Jesucristona'

<sup>25</sup> Ben' zan zjanogake' Jesúza', na'ch biyechje' chi'e legake':

<sup>26</sup> —Shi nole cheeni gakte nad' txen, chiya' gachile nad' aga ka xaxna'le, xool-le, xiinle, ben' bish'le, ben' zanle, na' ax̄t ye' mban chelena'. Shi bi gakte' nad', aga wak gakte' nad' txen. <sup>27</sup> Na' lekzka' beena' bi chzanile' ye' mban che'na', gak bitteza dii gak che', kwenc̄he gone' daa chazlallaa, aga wak gake' nad' txen. <sup>28</sup> Shi nole cheenile gonle to yoo sib wal, zigaate chiya' wwiale ka'k' gaki na' shi waki xmechlena' sheeloin. <sup>29</sup> La' shi ba wlekwle leninna' na' tena' bich bi de wzeeloilen, na' yog' ben'ka' ile'gakte' bi biyollan wxillgakte' le'. <sup>30</sup> Na' inagake': “Kon wdishj beena' len yoona' na' bi goki xmeche'na' wzeeloe'n.” <sup>31</sup> Na' ka'kz to ben' wñabia', shi cheenile' til-lene' sto wñabia' yoblə, na' lekzka' chiya' wsakee shi

wzoi shi mil beṅ'ka' nape' tiḷ-lengake' beena' nap galja mil beṅ'. <sup>32</sup> Na' shi gakbe'ile' bi soi beṅ'ka' nape', na' zi' illinlə beṅ' wṅabia'na' sto, wselee to ḥop beṅ' lljellgake'ne': “Bizə tiḷcho.” <sup>33</sup> Na' ka' le', shi bi ḥoonlall'le yog' dii de ḥele, aga wakə gake nad' txen.

*Kat' bich xzi' zedaa*  
(Mt. 5:13; Mr. 9:50)

<sup>34</sup> 'Zedaa nakan dii wen, na' shi bich xzi'n aga wakch yiyonchon xzi' dii yoblə kwenḥe wḥinchon. <sup>35</sup> Ni bi gak wḥinchon lwaa beṅ', san ḥoonchon. Na' le' chenile dga nia', li sen wṅeyi.

## 15

*Jempl ḥe xilaa wnit*  
(Mt. 18:10-14)

<sup>1</sup> Yog' beṅ' wiḥixjka' na' beṅ' saaxyaka' jabig'gake' kwit Jesúza' kwenḥe bzenaggake' dillaa cho'e. <sup>2</sup> Na' fariseoka' na' beṅ'ka' chli' chsedi leya' wzologake' biz chon chnagake' ḥe Jesúza', che'gake':

—Chlebteza beeni beṅ' saaxyaka' na' chaolenteze' le-gake'.

<sup>3</sup> Na'ch bzoa Jesúza' to jempl, golle' legake':

<sup>4</sup> —Shi tole naple to guiyoa xil' na' nit tob, na' wk-waanle baka' taplalj twalj lyixaa na' lljadilje bana' wnit, na' axt kon ka yillelb gonle. <sup>5</sup> Na' ka yillelb, yibaile yixoaleb yaaxizlena'. <sup>6</sup> Na' ka yillinle lill-lena' wtople beṅ'ka' nllaguile na' beṅ' wlill ḥeleka', na' ye'le legake': “Li yibaleni nad', la' ba billeg xil' ḥa'na' bana' wnit.” <sup>7</sup> Na' nia' le', ka'kzan chibayi Chioza' len anjl ḥe'ka' yabana' kat' to beṅ' wen dii mal chiyajile' saaxya ḥe'na' aga ka taplalj twalj beṅ'ka' bi chonan byen yiyajgake'.

*Jempl ḥe mecha' wnit*

<sup>8</sup> 'Wa shi to noolə de shi mech plat che' na' nit ton, na' wxene' yi' che'na' na' wlo'e' loo lille'na' na' yiyilje'n axt ki yillelile'n. <sup>9</sup> Na' ka yillelile'n na' wtope' noolka' nllaguile' na' ben' wlill che'ka', na' yee legake': “Li yibaleni nad', la' ba billem mech cha'na' daa wnit.” <sup>10</sup> Na' nia' le', ka'kzan chibayi Chioza' len anjl che'ka' kat' chiyaj chileni to ben' saaxya.

*Jempl che bi'na' benditj xmech xabaa*

<sup>11</sup> Na' lekzka' che' Jesúza' legake':

—To ben' wzoa chop xiine', <sup>12</sup> na' bi' neshaa gollb' xabaa: “Xa, blaa daa de cho' na' ben' nad' daa chiyal' ikaa.” Na'ch blaa xabaa daa de che' na' bi'en legakb'. <sup>13</sup> Na' aga wlla, biyit' bide bi' neshaa daa bi'eb', na' mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. <sup>14</sup> Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'. <sup>15</sup> Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nllée kushka' kwenche jtapb' legakb'. <sup>16</sup> Na' daa le chdom' goklall'b' gaob' daa chao kushka', na' ni len bi be'gake'b'. <sup>17</sup> Na' gokib': “Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni. <sup>18</sup> Ba ziyaachoklə kwit xa'na' na' yepee: Xadawaa, ba bxinj' blen' lao Chioza' na' lawo'na'. <sup>19</sup> Bich chidołaa gak' xiino', san beni nad' ka nottezə wen llin cho'ki.” <sup>20</sup> Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnop'e'b'. <sup>21</sup> Na'ch che'b' xabaa: “Xadawaa, ba bxinj' blen' lao Chioza' na' lawo'na', bich chidołaa gak' xiino'.” <sup>22</sup> Na' xabaa chi'e wen llin che'ka': “Lobe'zə li lljlej tgot lech' daa liizelozi nakch na' li wwakwba'n, na' lekzka' li wllin to niy xbemaa na' li wllin yel ni'abaa. <sup>23</sup> Na' li lljxi' me'do'na'

mbejchlawin, li wibth kwenche gaochob na' goncho to lni, <sup>24</sup> la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengake' lnina'.

<sup>25</sup> Na' ka wzolo lnina', xiine' bi' necha' chdab' lyixaa. Na' ka billim' gaozə lillbaa, benib' chkwell wikwellka' na' chakte wiyaana'. <sup>26</sup> Na'ch wneb' to wen llinka' na' wñabibee bin chak lillbaa. <sup>27</sup> Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'." <sup>28</sup> Na' xiine' bi' necha' bllaab' na' bi' goonib' yiyooob'. Na'ch bchej xabaa got'yoile'b' kwenche yiyooob'. <sup>29</sup> Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' gono' nad' la'ch' to shibdo' kwenche wit'b yeej gaolem' bi'ka' nllaguid'. <sup>30</sup> Na' naa bila' xiino'ni biyit' bideb' yog' daa bi'ob' na' benditjb' xmecho'na' kon noolə wdaka', na' ba betzo' me'do'na', bana' le nak, ni cheb'." <sup>31</sup> Na'ch che' xabaa: "Xiindawaa, li' zoaleno' nad' toshiizi, na' yog' bi' de cha' chekzo' daa. <sup>32</sup> Per chonan byen naa yibaicho na' goncho lnini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

## 16

*Jempl che wen llinna', beena' benditj daa de che xane'na'*

<sup>1</sup> Na' lekzka' goll Jesúza' ben'ka' nakgake'ne' txen:

—Wzoa to ben' wni'a nape' to wen llin che', na' bene' lo nee yog' dii de che'. Na' wyaj bal ben' jellgake'ne': "Le chonditj beena' daa beno' lo nee." <sup>2</sup> Na'ch wne xane'na' le', chi'ene': "Ba benid' ka nagake' chono', na' chiyal' yidio' kwent diika' ngoo lo no', la' bich gon' xshino'na'."

<sup>3</sup> Na'ch chaki wen llinna': "¿Nakra gona'n naa, bich gon' xan'na' llinna' gon'? Bi soid' gon' llin wal, na' chido'id'

yep' ben' yiyesh'gakile' nad' gongake' lat' wej xmech'. <sup>4</sup>Ba nezid' nak gon' kwenche wleb ben' nad' lille'ka' kat' bich gat' llin cha'na'." <sup>5</sup>Na'ch goxe' to to ben'ka' chal'gake' che xane'na', na' ben' necha' wnable'ne', chi'ene': "¿Ka'k' chaloo che xan'na'?" <sup>6</sup>Na' beena' chi'e: "Chalaa to guioa medid\* set." Na'ch chi'ene': "Ni de yisha', lobe'zə wche' na' bda'n shiyonzannan' chaloo." <sup>7</sup>Na' ka wde, wnable' beena' sto, chi'ene': "¿Shera li'? ¿Ka'k' chaloo?" Na' beena' chi'ene': "Chalaa to guioa gush trigo." Na'ch chi'ene': "Ni de yisha' na' bda'n taplalj gushzannan' chaloo." <sup>8</sup>Na' xan wen llinna' be'lawee wen llin mal che'na' daa biyiljallee naklan gone'n. La' ben'ka' zech wneyi che daa chak lo yell-lioni, chiyiljall'chgake' nak soalen ljwellgake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlall'do'eka'.

<sup>9</sup>'Na' nia' le', li wchin yel' shawaa de chele yell-lioni kwenche gaklenle ben', na' kat' ba wde che yel' shawaa, Chioza' wlebe' le' soalenlene' zejli kani.

<sup>10</sup>'Na' beena' chon ka chiyal' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiyal' kon daa nak lall' nee, ka'kzə gone' shi bitekchlə dii xench koo lall' nee. <sup>11</sup>Shi bi chonle ka chiyal' kon yel' shawaa de yell-lioni, bi gonzle lez ikaale yel' shawaa de yabana'. <sup>12</sup>Na' shi bi chonle ka chiyal' kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

<sup>13</sup>'Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

---

\* 16:6 Medid: to to medidki gokan ka do 37 litr.

<sup>14</sup> Na' fariseoka' le chzelall'gake' mecha', na' ka ben-gakile' dillaa choe' Jesúza', bxillgakile'ne'. <sup>15</sup> Na'ch che' Jesúza' legake':

—La'kzi nale nakle beñ' wen, Chioza' nezile' nakan nak yichjlall'do'lena'. La' daa chaki beñ' yell-lioni nakan dii lliarote, leyen'lannan' chakzbani Chioza'.

*Leya' na' yel' wñabia' che Chioza'*

<sup>16</sup> Na' lekzka' che' Jesúza':

—Leya' na' daa bli' bsemi dii beñ'ka' wdiñjee daa goll Chioza' legake', legakannan' wñabia'gakan axt ka bllin lla bid Juanna'. Na' ka bid Juanna', wzolo chzenag beñ' dill' wen dill' kob che yel' wñabia' che Chioza', na' chongake' to dii byen kwenche inabi'e loo yichjlall'do'eka'.

<sup>17</sup> Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

*Bi chiya' yilaa beñ'ka' nshagna'*

*(Mt. 19:1-12; Mr. 10:1-12)*

<sup>18</sup> Shi to beñ' byo yilee xoolena' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa beñ' che'na' le', lekzka' chone' ka chon beena' zoalente nool che'na' na' chdalene' noolə yoblə.

*Beñ' wni'ana' na' Lázarona'*

<sup>19</sup> Na' chize' Jesúza' beñ'ka':

—Wzoa to beñ' wni'a na' chakwe' shgal' lech' dii wen na' yog' lla chaoshawe'. <sup>20</sup> Na' lekzka' wzoa to beñ' yesh' wlie' Lázaró, na' lliá we'na' doxen kwerp che'na'. Na' tlizi chjchi'e cho'a yoo che beñ' wni'ana', <sup>21</sup> gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llie'. <sup>22</sup> Na' bllin lla wit beñ' yeshaa, na' biche' anjl che Chioza'ne' kwenche jazoalene' dii Abrahama'. Na' lekzka' wit beñ' wni'ana' na' bkwash'gake'ne'. <sup>23</sup> Na' dii

ben' wni'ana' chdezi'chgue' gana' lle' ben' wetka', na' blis jalawe'na' na' zit'lə ble'ile' dii Lázaroná' chi'e kwit dii Abrahama'. <sup>24</sup> Na'ch wnie' zilljə chi'e: “Xadawaa Abraham, biyesh'gachi nad' na' bsel' Lázaroná' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.” <sup>25</sup> Na' Abrahama' chi'ene': “Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o. <sup>26</sup> Na' ziznakan sto, ze to bdiñj xen gcholi, na' aga wak te ben'ki yidgake' gana' lle'le, na' ben'ka' lle' na' aga wak tegake' yidgake' gani zoanto'.” <sup>27</sup> Na'ch che' ben' wnia'na'ne': “Chñabid' li' shka', xadawaa Abraham, ben goklen bsel'gach Lázaroná' lill xa'na' <sup>28</sup> gana' zoa zi gay' ben' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni.” <sup>29</sup> Na' Abrahama' chi'ene': “Napkzgake' daa bzej dii Moiséza' na' daa bzej dii ben'ka' wdixjee daa goll Chioza'. ¡Na' chiya! wzenaggake'n!” <sup>30</sup> Na' che' ben' wnia'na'ne': “Aga wakan, xadawaa Abraham, san shel' to ben' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'.” <sup>31</sup> Na' che' Abrahama'ne': “Shi bi chzenaggake' daa bzej dii Moiséza' na' daa bzej dii ben'ka' wdixjee daa goll Chioza', lekzka' aga wyajle'gake' la'kzi yiban to ben' wet.”

## 17

*Bi goncho ka ixop ben' yoblə gone' dii mala'*

*(Mt. 18:6-7, 21-22; Mr. 9:42)*

<sup>1</sup> Na'ch che' Jesúza' ben'ka' nakgake'ne' txen:

—Bia'kzə de dii gon ka ixop ben' gone' dii mala', per ñyesh'laz gak che beena' wchixe' ben' yoblə gone' dii mala'! <sup>2</sup> Wenlan shel' wwa!gake' yene'na' to yaj che molin

na' lljazal'gake'ne' loo nisdona' aga ka daa wchixe' to ben'ki chajle'gake' cha'. <sup>3</sup>Daan, li wsak'.

'Shi to bish' ljjwell-le gone' mal chele, li wsheshlene', na' shi yiyajile' daa bene' chele, li yizi'xen che'. <sup>4</sup>La'kzi axt gall shii shlla gone' bi gone' chele, na' gall shiite ine' le': "Chiyajid' daa ben' cho'", chiyal' yizi'xenle che'.

*Daa gak gon to ben' chajle'*

<sup>5</sup>Na'ch goll postlka' Xancho Jesúsza':

—Goklen neto' gonlilall'chneto' Chioza'.

<sup>6</sup>Na'ch che' Xancho Jesúsza' legake':

—Shel' ye!' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': "Blall'shki, na' jsoa loo nisdona' na'lə", na' gon yaga' daa ye'len, shel'ka'.

*Daa chiyal' gon to wen llin*

<sup>7</sup>'Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': "Biyoo, na' wche' kwenche gawo'." <sup>8</sup>Aga we'lene' ka', san ye'l-lene': "Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'." <sup>9</sup>Na' ni bi we'lene' ye!' choxken daa ba bene' daa che'lene' gone'. <sup>10</sup>Lekzka' le', kat' ba biyoll benle yog' daa non Chioza' mandad gonle, chiyal' inale: "Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'."

*Biyon Jesúsza' shi ben' chak yillwe' daa le lepra*

<sup>11</sup>Na' shlak zjada Jesúsza' Jerusalénna', wdie' gana' ndil yell-lioka' mbani Samáriana' na' Galileana'. <sup>12</sup>Na' ka blline' to cho'a yelldo', bllesh shi ben' chakgake' yillwe' daa le lepra kwenche lljatilgake'ne', na' de zit'lə wzegake' <sup>13</sup>besyaagake' zilljə, che'gake'ne':



—Jesús, Maestro, biyesh'lall'gachi neto'!

<sup>14</sup> Na' ka ble'i Jesúza' legake', na' golle':

—Li shaj lao b̄xozka' kwenche ile'gakile' le'.

Na' shlak zejgake' bigaa yillwe' che'ka'. <sup>15</sup> Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'. <sup>16</sup> Na' b̄chek' xibe'na' lao Jesúza' na' bdose' lo yona' kwenche bi'ene' yel' choxken. Na' beena' ben ka' nake' ben' Samaria. <sup>17</sup> Na'ch che' Jesúza':

—¿Aaga shigaken' biyaki? ¿Garañ ben'ka' zi ga?

<sup>18</sup> ¿Atochga ben' zitiin bibi'e choe'lawee Chioza'?

<sup>19</sup> Na'ch che' Jesúza' beena':

—Bizolla' na' biyaj. Ba biyakilo' daa wyajli'o cha'.

Yel' wñabia' che Chioza'

(Mt. 24:23-28, 36-41)

<sup>20</sup> Na'ch wñabi fariseoka' Jesúza' batran solo inabia' Chioza' lo yell-lioni. Na' chi'e legake':

—Ka nak yel' wñabia' che Chioza', aga nakan ka to dii ile'tekzicho. <sup>21</sup> Aga no in̄a: “Ni chñabia' Chioza'”, wa “Na' chñabi'e”, la' ladjlenikzan ba bla' yel' wñabia' che'na'.

<sup>22</sup> Na'ch chi'e ben'ka' nakgake'ne' txen:

—Wllin lla kat' gaklall'le la'ch' zi shlla ile'chile inabi'a, nad', Ben' Bsel' Chioza' Yell-lioni, na' aga wle'chile nad'.

<sup>23</sup> Na' ichej ben' in̄e': “Ni zoe’”, wa “Na' zoe'.” Na' bi shajle, ni bi gonle ben'ka' txen. <sup>24</sup> La' ka chak kat' chepyes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni. <sup>25</sup> Na' chonan byen zigaate biya daa yen ile'id', na' ben'ki zoa naa wzoagake' nad' ka'lə. <sup>26</sup> Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni. <sup>27</sup> Kana' wzoa dii Noéna', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' bllinte llana' wyoo dii Noéna' loo barkwa'. Na' wzolo chak yejsiwaa yell-lioni axt billa'cha

lawinna' nisa', na' blliyai'n yog'lolē'. <sup>28</sup> Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'. <sup>29</sup> Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'. <sup>30</sup> Na' ka'kzan gak llana' kat' yiyed', nad', Ben' Bsel' Chioza' Yell-lioni.

<sup>31</sup> 'Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetjze' kwenche lljaleje'n. Na' shi to ben' zeje' lyixaa, bi yiyajze' lille'na'.

<sup>32</sup> Li lljadini ka gok che dii xool Lota'. <sup>33</sup> Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kañi.

<sup>34</sup> 'Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan. <sup>35</sup> Na' gana' lle' chop noolə chotgake', toe' yichi'a na' stoe' yigaan. <sup>36</sup> Na' chop ben' byo chongake' llin lyixaa, toe' yichi'a na' beena' sto yigaane'.

<sup>37</sup> Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

## 18

*Jempl che to nool wizeb na' to ben' wen yel' joschis*

<sup>1</sup> Na' bzoa Jesúza' to jempl kwenche bli' bsedile' legake' bi lljshyagakile' we'llwillgake' Chioza'. <sup>2</sup> Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'. <sup>3</sup> Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.” <sup>4</sup> Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni

bibi chakid' shi bi chiyoolallii ben' ka chon', <sup>5</sup> gonch' yel' joschis che nooli kwenche bich yidyembeguile' nad'.”

<sup>6</sup> Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb Chioza'. <sup>7</sup> ¿Achakile Chioza' bi gaklene' ben'ka' ba wleje' nakgake' lall' nee, ben'ka' choe'llwillgake'ne' ka wal ka tella? ¿Awllaile' gaklene' legake'? <sup>8</sup> Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch ben' nonlilall' nad' yell-lioni, lla?

*Jempl che to fariseo na' to ben' wichixj*

<sup>9</sup> Na' bzoa Jesúza' sto jempl che ben'ka' chakgakile' nakgake' ben' wen lao Chioza' na' chongakile' ben' yoblə nakzi. Na' wne':

<sup>10</sup> —Chop ben' wyajgake' yoodo'na' kwenche je'llwillgake' Chioza'. Toe' nake' fariseo na' beena' sto nake' ben' wichixj. <sup>11</sup> Na' farisewa' zie' chshalj chshon che kwine', chi'e: “Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, agagan' kwey yichj' nool cha'na' kwenche soalen' nool yoblə, na' ni bi chon' ka chon ben' wichixji. <sup>12</sup> Chop shii to xman chzoa' wbas', na' lawi yog' daa chon' gan chbej' daa chidołoo ikoo.”\* <sup>13</sup> Na' ben' wichixja', zit'lə wzie' na' ni bi biyaxjile' wlis lawe'na' wwie' yabana', san chballee cho'a lcho'ena' chi'e: “¿Chios cha', biyesh'gachi nad' daa nak' ben' saaxya!” <sup>14</sup> Na' nia' le', Chioza' bzenague' che ben' wichixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' ben' choo ben' xen, Chioza' gone'ne' ben' bibi zakii. Na' beena' chakile' bibi zakee, Chioza' gone'ne' ben' choo ben' xen.

\* 18:12 Daa chidołoo ikoo: literalmente la décima parte.

*Ben*leey Jesúza' bi'do'ka'  
(Mt. 19:13-15; Mr. 10:13-16)

<sup>15</sup> Na' *lekzka'* *ben'* zan *jwa'* bi'do' *che'ka'* lao Jesúza' *kwenche'* *bxoá'* *neena'* *yichjb'ka'* na' *wñabile'* Chioza' *gaklene'gakb'*. Na' ka *ble'i'* *ben'ka'* *nakgake'ne'* *txen'*, *bsheshlengake'* *legake'*. <sup>16</sup> Na' Jesúza' *goxe'* bi'do'ka', na' *chi'e'* *ben'ka'* *nakgake'ne'* *txen'*:

—*Li'* *we'* *latj'* *yid'* bi'do'ki *lawa'ni'*, bi *wllonle'*, *la'* Chioza' *chnabi'e'* *loo'* *yichjlall'do'* *ben'ka'* *nak'* ka *legakb'*. <sup>17</sup> *Dii'* *li'* *nia'* *le'*, *beena'* bi *yyiak'* *yichjlall'do'ena'* ka *che'* bi'do'ki *kwenche'* *inabia'* Chioza' *le'*, bi *yilline'* *gana'* *zoa'* Chioza'.

*To ben'* *zakii'* *ben'* *nak ben'* *wni'a'* *be'lene'* Jesúza' *dill'*  
(Mt. 19:16-30; Mr. 10:17-31)

<sup>18</sup> *To ben'* *zakii'* *wñabile'* Jesúza', *chi'ene'*:

—*Maestro'*, *li'* *nako'* *ben'* *wen'*. *Wna'* *nad'* *beran'* *chiyal'* *gon'* *kwenche'* *gat'* to *yel'* *mban'* *cha'* *zejli'* *kan'i'*.

<sup>19</sup> *Na'ch'* *che'* Jesúza'ne':

—*¿Berache'* *nazo'* *nad'* *ben'* *wen'*? *Toz'* Chioza' *nake'* *ben'* *wen'*. <sup>20</sup> *Ba'* *nezkzilo'* *daa'* *nllia'* Chioza' *bia'* *goncho'*: “*Bi'* *soaleno'* *nool'* bi *nak'* *nool'* *cho'*, bi *wito'* *ben'*, bi *kwano'*, bi *chiljlaloo'* *bizá'* *gon'* *ino'* *che'* *ben'*, na' *wdap'* *balaan'* *xaxnoo'*.”

<sup>21</sup> *Na'ch'* *che'* *beena'ne'*:

— *Kana'* *naktia'* bi *xkwid'* *chon'* *yog'* *diika'*.

<sup>22</sup> *Na'ch'* ka *beni'* Jesúza' ka *goll'* *beena'ne'*, na' *chi'ene'*:

—*Stozá'* *daa'* *chyalj'* *gono'*: *jayet'* *jade'* *yog'* *daa'* *de'* *cho'* na' *be'n'* *ben'* *yesh'ka'*. Na' *shi'* *gono'* ka', na' *gat'* to *yel'* *shao'* *cho'* *yabana'*. Na' *da'*, *dino'* *nad'*.

<sup>23</sup> Na' ka *beni'* *beena'* ka *goll'* Jesúza'ne', *le'* *gokyeshile'*, *la'* *ben'* *wni'a'* *nleban'*. <sup>24</sup> Na' ka *ble'i'* Jesúza' *le'* *gokyeshile'*, na' *chi'e'*:

—ǰLallj inleeb chonan che ben' wni'aka' we'gake' latj inabia' Chioza' legake'! <sup>25</sup> Lobe'ch te to kamey xan yeshaa aga ka to ben' wni'a yiyo'e yabana'.

<sup>26</sup> Na' ben'ka' beni, gollgake'ne':

—ǰNoran yila shka'?

<sup>27</sup> Na'ch che' Jesúza' legake':

—Daa bi chak gon benecha', Chioza' chak gone'n.

<sup>28</sup> Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

<sup>29</sup> Na'ch che' Jesúza' legake':

—Dii li nia' le', nottezə ben' ba bzanile' no lille', no xaxnee, no ben' bishee, no ben' zane', no xiin xoole' kwenche cho'e latj chnabia' Chioza'ne', <sup>30</sup> Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kani'.

*De wyon shii wdixjee Jesúza' guete'*

*(Mt. 20:17-19; Mr. 10:32-34)*

<sup>31</sup> Na'ch wlej Jesúza' ben'ka' shllin ka'lə, ben'ka' nakgake'ne' txen, chi'e legake':

—Dga ziyajcho Jerusalenna' naa, yillinin daa bzej dii ben'ka' wdixjee daa goll Chioza' kani'yi daa gak cha', nad', Ben' Bsel' Chioza' Yell-lioni. <sup>32</sup> La' gongake' nad' lo na' ben'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. <sup>33</sup> Na' wit chingake' nad' na'tech witgake' nad', na' yiyon lla yiban' ladj ben' wetka'.

<sup>34</sup> Na' ben'ka' nakgake'ne' txen ni lat' bi wyajni'gakile' daa golle' legake', na' ni bi wnezgakile' berache chi'e legake' ka', la' daa golle' legake' nakan dii bi gak shajni'gakile'.

*Biyon Jesúza' to ben' l̥chol̥ yell Jericóna'*

*(Mt. 20:29-34; Mr. 10:46-52)*

<sup>35</sup> Na' ka ba chllin Jesúza' yell Jericóna', na' chi' to ben' l̥chol̥ cho'a neza' ch̥nabile' ben' yiyesh'lall'gakile'ne' we'gake' lat' wej xmeche'. <sup>36</sup> Na' ka benile' chde ben' zan na'ch w̥nabe' bin chak. <sup>37</sup> Na' gollgake'ne':

—Jesús, ben' Nazaretan', chda ni.

<sup>38</sup> Na'ch besyee, chi'e:

—¡Jesús, Xiin̄ dia che dii Daví, biyesh'lall'gachi nad'!

<sup>39</sup> Na' ben'ka' llialo lao Jesúza' chsheshlengake'ne' kwenche kwi'e llizə, na' zizikchlə chosyee, chi'e:

—¡Xiin̄ dia che dii Daví, biyesh'lall'gachi nad'!

<sup>40</sup> Na'ch wlez Jesúza' na' bene' mandad lljxi'gake'ne'. Na' ka bllin ben' l̥chola' lawe'na' na'ch w̥nabile'ne':

<sup>41</sup> —¿Beran cheenilo' gon' cho'?

Na'ch che' ben' l̥chola'ne':

—Xan', cheenid' ile'id'.

<sup>42</sup> Na'ch che' Jesúza'ne':

—Daa ba chon̄lilalloo nad' na' ile'ilo'.

<sup>43</sup> Na' katena' lii bile'teile', na'ch janoe' Jesúza' choe'lawee Chioza'. Na' yog' ben'ka' ble'i daa ben Jesúza' be'la'ogake' Chioza'.

## 19

*Jesúza' na' Zaquewa'*

<sup>1</sup> Na'ch bllin Jesúza' yell Jericóna' na' wdie' gchol̥ yella'. <sup>2</sup> Na' yella' zoa to ben' wni'a lie' Zaqueo, na' ngoo lall' nee xon̄j w̄chixjka'. <sup>3</sup> Na' goklallee ile'ile' Jesúza', per bi gok ile'ile'ne' daa nake' ben' b̄chekwdo' na' daa zejlen Jesúza' ben' zan. <sup>4</sup> Na'ch wllialodoe' lawe'ka' na' wyep'e' to lo yag xen kwenche ile'ile'ne' ka tie'. <sup>5</sup> Na' ka bllin Jesúza' xan yaga', na' blis lawe'na' chi'ene':

—Zaqueo, btalalloo biyetj, la' lillo'nan' yigaana' naa.

<sup>6</sup> Na'ch biyetjdo Zaquewa' chibaile' bichi'e Jesúza' lille'na'. <sup>7</sup> Na' ka ble'i ben'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill ben' saaxyani, na.

<sup>8</sup> Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' ben' yesh'ka', na' yog' ben'ka' ba bchixj' dii xench, yiyoe'gakee taplə ka daa ba wlan' chegake'.

<sup>9</sup> Na'ch che' Jesúza'ne':

—Naanlla ba bisla Chioza' ben'ki zoa loo yooni kwenche bi kwiayi'gake', daa len Zaquewi nake' xiiñ dia che dii Abrahama'. <sup>10</sup> La' ka nak' nad', Ben' Bsel' Chioza' Yellioni, bid' kwenche yiyilj' na' yisla' ben'ka' yoo nez daa wlliyi'n legake'.

*Jempl che beena' bkwaanlen wen llin che'ka' mech*

<sup>11</sup> Shlak chzenag ben'ka' daa che' Jesúza', bseesile' legake' to jempl, daa ba zoa illine' Jerusalénna' na' legake' gokgakile' daa nake' ben' bsel' Chioza' lii solotie' inabi'e.

<sup>12</sup> Na'ch chi'e legake':

—To ben' zakii bcheje' wyaje' to yell zit' wal kwenche lljalane' yel' wñabia' che lalle'na', na' ka yilline' inabi'e.

<sup>13</sup> Na' ka zi' see, wñie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mech, li gonlenan delgens shlak bi soa'.” <sup>14</sup> Na' ben' wlall che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche jellgake'ne': “Bi cheeninto' inabia' beeni neto'.”

<sup>15</sup> Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche inezile' ka'k' wej ben mecha' gan daa bkwaanlene' to toe'. <sup>16</sup> Na' ka bllin ben' necha' lawe'na' na' chi'ene': “Xan', xmecho'na' bkwaan'leno' nad' bena'n gan shin.”

<sup>17</sup> Na'ch ben' wñabia'na' chi'ene': “Wenkzan beno'. Daa

beno' ka chiyal' kon lat' mecha' bkwaan<sub>len</sub>' li', wzoa' li' inabi'o shi yell." <sup>18</sup> Na' ka bllin beena' sto lawe'na' na' chi'ene': "Xan', xmecho'na' bkwaan'leno' nad' bena'n gan gayaan." <sup>19</sup> Na' lekzka' chi'e beena': "Wzoa' li' inabi'o gay' yell." <sup>20</sup> Na'ch bllin stoe' lawe'na' na' chi'ene': "Xan', ni de xmecho'na' bkwaan'leno' nad'. Blall'tipteza'n to lech' na' wlooshawaan <sup>21</sup> daa blleb' li', la' le ben' znia nako'. Chkaatezo' dii bi naki cho', na' chizi' chilaptezo' dii goz goon ben' yoblə." <sup>22</sup> Na'ch che' ben' wñabia'na' le': "Bikzbi yejni'alallii beno'. Kon ka ba wno' ka'kzan gak cho'. Nezilo' nak' ben' znia, na' chkaatez' dii bi naki cha' na' chizi' chilap' dii goz goon ben' yoblə. <sup>23</sup> Na' daa nezilo' ka' chon', ¿beraçe ki bi'o xmechaa gon yichjin kwençe yikaan naa ba biyed'?" <sup>24</sup> Na'ch chi'e ben'ka' lle' na': "Li yikaa mecha' daa bi'ane' na' li we'n beena' bene' gan shin." <sup>25</sup> Na'ch che' ben'ka'ne': "Xan', ba napkzə beena' shin." <sup>26</sup> Na' che' ben' wñabia'na' legake': "Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee lat' yidoyo. <sup>27</sup> Na' ka nak ben'ka' chakzbangakile' nad', ben'ka' bi cheengakile' inabi'a, li lljxi'gake' ni na' li witgake' ile'teid'."

*Billin Jesúza' Jerusalénna'*

*(Mt. 21:1-11; Mr. 11:1-11; Jn 12:12-19)*

<sup>28</sup> Na' ka wde wna Jesúza' ka', na'ch bigoolene' nez ben'ka' nakgake'ne' txen ziyajgake' Jerusalénna'. <sup>29</sup> Na' ka billingake' xni'a yaa daa le Yaa Olivos, gaozə yel-lka' le Betfagé na' Betania, na'ch bselee chop ben'ka' nakgake'ne' txen, <sup>30</sup> na' chi'e legake':

—Li shaj yella' llia na', na' ka illinle ile'ile to burr chbando', ba konon' kwia, da'b yag. Na' wsell-leb wche'leb nilə. <sup>31</sup> Na' shi no inaz le': "¿Beraçe chsell-zleb?", na' ye'lene': "Xanchonan' chyalljile'b."



<sup>32</sup> Na'ch wyaj ben'ka' bselee, na' ka bllingake' ble'gakile' to burr chbando' da'b yag, kon kayen' goll Jesúza' legake'.

<sup>33</sup> Na' ka chsellgake' burra' na'ch che' xama' legake':

—¿Berache chsell-leb?

<sup>34</sup> Na'ch che'gake'ne':

—Xanchonan' chyalljile'b.

<sup>35</sup> Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blliagake' Jesúza' koll'ba'. <sup>36</sup> Na' shlak zej Jesúza' llie' burra', chshilj xa ben'ka' tlo neza'.

<sup>37</sup> Na' ka ba chillingake' gaozə gana' chiyetj nez daa ziza' Yaa Olívoza', yog'lol ben'ka' nakgake'ne' txen chosyaa-gake' daa chibagakile' na' choe'la'ogake' Chioza' daa ble'gakile' yog' yel' wakka' bene'. <sup>38</sup> Na'ch nagake':

—¿Gaklenshga Xancho Chioza' beeni ba bselee inabi'e! jLi da, we'la'ocho Chioza' zoa yabana' daa bene' ka zoa-lenchone' mbalaz!

<sup>39</sup> Na' bal fariseoka' len ladj ben'ka' no Jesúza', che'gake'ne':

—Maestro, goll ben'ki nakgake' li' txen soagake' llizə.

<sup>40</sup> Na' che' Jesúza' legake':

—Nia' le', shi ben'ki soagake' llizə, na' yaj kilə solo gosyaagakan we'la'ogakan nad'.

<sup>41</sup> Na' ka billine' gaozə yell Jerusalénna', gokyeshile' ka ble'ile'n na' wchelle' che ben'ka' zoa na'. <sup>42</sup> Na' chi'e:

—¿Shel'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile.

<sup>43</sup> Wllin lla ila' ben'ka' chakzbangakile' le' na' wzechjgake' yelli leej na' kono gak sho' ichej. <sup>44</sup> Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

*Bishesh Jesúza' ben'ka' chit' chde lesh' chyoodo'na' (Mt. 21:12-17; Mr. 11:15-19; Jn 2:13-22)*

<sup>45</sup> Na'ch ka bllin Jesúza' cho'a yoodo'na' na' bisheshe' ben'ka' chit' chde. <sup>46</sup> Na' chi'e legake':

—Cho'a Xtill' Chioza' nan: “Lilla'na' nakan ga choe'lwill ben' nad'”, na' le' naa ba nonzlen ka to ga chdop chllag wban.

<sup>47</sup> Na' yog' lla bli' bsemi Jesúza' ben' gana' zoa yoodo'na', na' b̄xozka' ch̄n̄abia' na' ben'ka' chli' chsemi leya' na' nochl̄e ben' w̄n̄abia' che ben' Israelka' la'kzi biy-iljall'gake' nakl̄e gongake' kwenche witgake'ne' <sup>48</sup> bikz̄e bi gok gongake', la' yog'z̄e ben' chibagakile' chzenaggake' dill'ka' cho'e.

## 20

Ye'l' w̄n̄abia' che Jesúza'

(Mt. 21:23-27; Mr. 11:27-33)

<sup>1</sup> Na' bllin to lla, shlak chli' chsemi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin b̄xozka' ch̄n̄abia' na' ben'ka' chli' chsemi leya' len ben' golka' ch̄n̄abia'. <sup>2</sup> Na' che'gake'ne':

—Wnashki neto', ¿bi ye'l' w̄n̄abia' napo' chono' diiki? Na' ¿nora ben' li' ye'l' w̄n̄abia'ni?

<sup>3</sup> Na'ch che' Jesúza' legake':

—Lekzka' nad' de to dii in̄abid' le', li in̄ashki nad':

<sup>4</sup> ¿Noran bsel' Juanna' kwenche bidchoe' ben' nisa'? ¿AChiozan' bseleene'? ¿Anti ben' yell-liona'zan bseleene', lla?

<sup>5</sup> Na'ch wzologake' choe'len ljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', lobe' in̄e' cho': “¿Berache ki wyajle'le che', shka'?” <sup>6</sup> Na' shi yize'chone' noz̄e ben' bseleene', yog' ben'ki wlligake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

<sup>7</sup> Na'ch gollgake' Jesúza':

—Bi nezinto' no bsel' beena'.

<sup>8</sup> Na'ch che' Jesúza' legake':

—Lekzka' nad' aga wnia' le' noran ben nad' yel'  
wnabia'na' kwenche chon' diiki.

*Jempl che wen llin malka'*

*(Mt. 21:33-44; Mr. 12:1-11)*

<sup>9</sup> Na' Jesúza' bseese to jempl lao ben'ka' lle' na':

—To ben' billee yag uva, na' bene'n lall' na' ben'ka' gap  
wwian, na' wzee wyaje' ssha gan yoblə. <sup>10</sup> Na' ka bizi' bilap  
ben'ka' uvana', xaninna' bselee to wen llin che' kwenche  
lljelle' ben'ka' nak lall' na'gake' yag uvaka' we'gake'ne'  
daa chidolee yikee. Na' ben'ka' chapgake' yag uvaka'  
bex'gake'ne' bet wdingake'ne', na'tech bilaggake'ne' to  
ka' che'. <sup>11</sup> Na'ch bselee sto wen llin che'na'. Na'  
lekzka' bet wdingake'ne', na' biya dii bengakile'ne', na'  
bizlaggake'ne' to ka' che'. <sup>12</sup> Na'ch de wyon shii, bizselee  
wen llin yoblə, na' lekzka' bengake'ne' bido we'zi, na'  
bizlaggake'ne'.

<sup>13</sup> Na'ch chaki xan yag uvaka': “¿Nakra ka gona'n?  
Wsel'shkid' bi' cha'ni, bi'ni le chakid'. Shera shicholə  
wzenaggake' cheb'.” <sup>14</sup> Na' ka ble'i ben'ka' chap yag  
uvaka' xiine'na', na'ch che' ljwelle': “Bi'nin yigaanlem'  
yell-lioni. Li da witchob' kwenche yigaanlenchon.” <sup>15</sup> Na'  
wlejkake'b' gana' lle' yag uvaka' na' betgake'b'.

Na'ch wnabi Jesúza' ben'ka' chzenag:

—¿Nakra ka chakile goni xan yag uvaka' ben'ka', lla?

<sup>16</sup> Ba nakten shaje' na' lljete' ben'ka' chap yag uva che'na'  
na' iyiyone' yell-lio che'na' lall' na' ben' yoblə.

Na' ka beni ben'ka' wne' ka', na' wnagake':

—¡Bat we' Chioza' latj gak ka'!

<sup>17</sup> Na' bwia Jesúza' legake', chi'e:

—¿Beran zejin Cho'a Xtill' Chioza' gana' na:  
Yaja' daa bi wyoolall' wen yooka',

leyen' lannan' yaja' daa ba nchejcha yoonā'?

<sup>18</sup> Nottezə ben' lljchaze' lawinna' kwiayee, na' shi idakwan ben', axt wshoshjan le'.

Janabgakile' Jesúza' shi chiyal' chixjgake' daa chnab beena' chnabia' Rómana'

(Mt. 21:45-46; 22:15-22; Mr. 12:12-17)

<sup>19</sup> Na' bxoška' chnabia' na' ben'ka' chli' chsedi leya' goklall'gake' gox'gake' Jesúza' ka biyoll golle' ka', la' gokbe'gakile' chezgaken' wnie' daa bi chajle'gake' che'. Per bllibgake' ben'ka' ndop nllag na'. <sup>20</sup> Na'ch bsel'gake' to chop ben' wiwia wiwi, na' bentezgake' ka ben' cheench-gayi wzenag che'. Per aga do lall'gaken' wyajgake', san kwenchezə kwejyelgakile' Jesúzan' na' lljadaogake' xya che' lao beena' chnabia' gana' mbani Judeana'. <sup>21</sup> Na' wñabgakile'ne':

—Maestro, nezinto' daa no' na' daa chli'o nakan dii li, na' aga chwio' nak nak ben', shi nake' ben' zakii wa shi bi nake'. Nezinto' chli'o nez li che Chioza' kon ka nakan. <sup>22</sup> Wnashki neto': ¿Achiyal' chixjcho daa chnab Césara', beena' chnabia', anti bi chiyal' chixjchon?

<sup>23</sup> Na' gokbe'i Jesúza' aga do lall'gaken' wñabgakile'ne', na'ch chi'e:

<sup>24</sup> —Li wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Che Césaran', beena' chnabia' Rómana'.

<sup>25</sup> Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

<sup>26</sup> Na' ni shcho'a dill' daa bi'e lao ben'ka' bi gok wchin-gake'n kwenche gaogake' xya che'. Na' bibangakile' ka golle' legake' na' bibe'gake' llizə.

Wnabgakile' Jesúza' nak gak kat' yiban ben' wetka'  
(Mt. 22:23-33; Mr. 12:18-27)

<sup>27</sup> Ka wde dga, bllin bal saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

<sup>28</sup> —Maestro, leya' bzej dii Moiséza' nan: shi to ben' byo guete' na' igaan xoolena' wizeb na' kono xiingake' wzoa, ben' bish' ben' weta' chiya' yikee nool wizeba' kwenche soa xiin dia che dii ben' bisheena'. <sup>29</sup> Ki gok to shii, wzoa gall bish' ben', na' ben' necha' bshagnee, na' wite' na' kono xiine' wzoa. <sup>30</sup> Na' ben' wchopina' bikee noola', na' lekzka' wite' na' kono xiine' wzoa. <sup>31</sup> Na' ben' wyonina', lekzka' bizkee noola', na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'. <sup>32</sup> Na' ka bllin lla lekzka' wit noola'. <sup>33</sup> Na' kat' yiban ben' wetka', norayen'en' gak ben' che', lla?, la' galltien' wzoalene'.

<sup>34</sup> Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' ye' wishagna' che xiine'ka'. <sup>35</sup> San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza', <sup>36</sup> ni koch no guet, san soagake' ka zoa anjlka'. Na' gakgake' xiin Chios daa ba bisbane' legake' ladj ben' wetka'. <sup>37</sup> Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'nin. Na' wne' Xancho Chioza' nake' Chios che Abraham'a', Isaaca' na' Jacoba'. <sup>38</sup> Na' Chioza' aga nake' Chios che ben' wet, san nake' Chios che ben' de ye' mban cheyin. La' yog'lol' ben' nxenilallii Chioza', dekza ye' mban chegake'.

<sup>39</sup> Na'ch bal ben'ka' chli' chsedi leya' gollgake'ne':

—Maestro, ka ba wnyaynoon nakan.

<sup>40</sup> Na' bich bi biyaxjchgakile' inabchgakile'ne'.

*Crístona' nake' xiiñ dia che dii Davina'*

*(Mt. 22:41-46; Mr. 12:35-37)*

<sup>41</sup> Na' che' Jesúza' legake':

—¿Berache nazə ben' Crístona' nake' xiiñ dia che dii Davina'?, <sup>42</sup> len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

<sup>43</sup> shlak wzoa' xni'ona' ben'ka' chakzbani li'.”

<sup>44</sup> ¿Berache chakzile Crístona' nake' xiiñ dia che dii Davina', len kwin Davina' golle'ne': “Xan”?”

*Jesúza' wne' nan ben'ka' chli' chsedi leya' chongake' mal*

*(Mt. 23:1-36; Mr. 12:38-40; Lc. 11:37-54)*

<sup>45</sup> Na' shlak chzenag yog' ben'ka' lle' na', Jesúza' golle' ben'ka' nakgake'ne' txen:

<sup>46</sup> —Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj lkwe' ben'. Na' gana' chdop chllagcho choe'lwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw. <sup>47</sup> Na' lekzka' chkaatezgake' lill nool wizebka', na' chongake' ka chshaljlen Chioza' ssha nllēb kwenche gaki ben' le wen chongake'. Na' daa chongake' ka', ba nakten ile'gakile' yel' zak'zi' wala'.

## 21

*Daa bzani to nool wizeb, bi'en Chioza'*

*(Mr. 12:41-44)*

<sup>1</sup> Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'. <sup>2</sup> Na' lekzka' ble'ile' to nool yesh', ben' wizeb, wlo'e chop sintabdo'. <sup>3</sup> Na' goll Jesúza' legake':

—Dii li nia' le', la'kzi nool wizebi nake' ben' yesh', ba be'che' dii xench aga ka yog'te ben'ka'. <sup>4</sup> La' yog'gake' choe'gake' daa chichoonan che'ka', na' le', naktie' ben' yesh', wlo'e doxen daa nape', la'kzi chyalljile'n.

*Jesúza' chi'e wllin to lla kwiayi' yoodo'na'*

*(Mt. 24:1-2; Mr. 13:1-2)*

<sup>5</sup> Na' ba ben'ka' choe'gake' xtill' yoodo'na' ka xochi nak yajka' nongakile'n na' diika' bzani ben' be'gake'n yoodo'na'. Na'ch che' Jesúza' legake':

<sup>6</sup> —Ka nak diiki chwiale naa, wllin lla kwiayi' yogaan, ni sto yaj bich kwia koll' ljwellin.

*Diika' gak kat' ba zoa te che yell-lioni*

*(Mt. 24:3-28; Mr. 13:3-23)*

<sup>7</sup> Na'ch wabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa gaoshosh gakan?

<sup>8</sup> Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake': “Nadaan Crístona”, na' lekzka' inazgake': “Ba bllin lla kwiayi' yell-lioni.” Bi gonle legake' txen. <sup>9</sup> Na' ka yenile chak no wdil wa chtop chshag ljwell ben' kwenche soshiyigake' ben' wabia'ka', bi illeble. Chonan byen zigaate gak diiki, per aga lii tete che yell-lioni kat' ba chakgakan.

<sup>10</sup> Na'ch golle' legake':

—Ganga kwe' wdila' na' ti yell kon yell. <sup>11</sup> Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban ben'.

<sup>12</sup> Na' ka zi gak diiki, gox'gake' le' na' biya dii gongakile' le'. Na' ljwa'gake' le' gana' chdop chllagcho choe'lwill-cho Chioza' na' yiya yiyiljgake' le' na' koogake' le' lillya, na' ljwa'gake' le' lao ben' wabia' xenka' na' lao ben'

wṇabia'ka' sto ni cha'. <sup>13</sup> Na' kat' gak chele ka', na' chlə gat' latj we'le cho'a xtilaana' lawe'ka'. <sup>14</sup> Na' bi sezle wṇeyi naklə inale kat' lljsele lao beṇ' wṇabia'ka', <sup>15</sup> la' nad'kzan wzajniid' le' nakan inale na' gon' le' ye!' sin'na' kwenche ni to beṇ'ka' chakzbangakile' le' bi sogakile' inagake' bi nakan ka nale. <sup>16</sup> Na' no xaxṇa'tezle, no beṇ' bish'le, no dialla chele, na' no beṇ' zoalenle wen gongake' le' lo na' beṇ' wṇabia'ka', na' witgake' ba!-le. <sup>17</sup> Na' axt yog'zə beṇ' gakzbangakile' le' daa nonilall'le nad'. <sup>18</sup> Per li koo yichjle, Chioza' gaklene' le' na' ni tlish' yish' yichjlēna' bi kwiayi'. <sup>19</sup> Na' shi sechale lawi daa yen ile'ile na' bi gakchoplall'le, na'chan gat' to ye!' mban chele dii bi te cheyin.

<sup>20</sup> 'Na' kat' ile'ile neḥj soldadka' Jerusalēnni, kanan' inezile nan ba zoa kwiayi'n. <sup>21</sup> Na'ch beṇ'ka' lle' gani mbani Judeani, chiyal' wxonjgake' lljakwash'gake' do yaa yaoka', na' beṇ'ka' lle' yelli, chiyal' wxonjgake', na' beṇ'ka' zej lyixaa, bichoklə yiyedgake' yelli. <sup>22</sup> La' kanan' gon Chioza' ye!' zi' che yog'ze' kwenche yillinin doxen ka na Cho'a Xtilleena'. <sup>23</sup> ;Nyesh'laz wal gak che noolka' noa' na' noolka' chwall' chxop llana' gak diiki! La' dii xen daa yen ile'i beṇ' Israelki. <sup>24</sup> Balgake' guet lo wdila' na' zi bale' wche'gake' pres yell zit'ka'. Na' beṇ' zit'ka' wlej wshoshjgake' yell Jerusalēnni axt kat'ch illin lla yiyoll yido ka llia bia' gongake'.

### *Kat'ka' yiyed Jesúza'*

*(Mt. 24:29-35, 42-44; Mr. 13:24-37)*

<sup>25</sup> 'Na' lo wbillā', lo bewaa na'ch lo beljka' gak dii gonan ka yibani beṇ'. Na' beṇ'ka' lle' yell-lioni gakshejlall'gake' na' illebgake' kat' gon niso'da'na' sshag wal daa so' kwe'n. <sup>26</sup> Na' axt ichol-lall' beṇ' daa chllebgake' kwiayi'lengake' yell-lioni, la' axt yog' diika' llia xan yabana' inibgakan.



<sup>27</sup> Na'ch ile'gakile' nad', Ben' Bsel' Chioza' Yell-lioni, zizaa to lo bej kon yel' wak xen na' balaan xen. <sup>28</sup> Na' kat' solo gak diiki, li wtipch lall'le, la' ba zoa gaoshosh yidsla' len'.

<sup>29</sup> Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlæ yag. <sup>30</sup> Kat' chle'ile ba chibia xlaguiinka', chakbe'ile ba zoa yiyoo la'o linna'. <sup>31</sup> Ka'kzæ, kat' ile'ile ba chak diiki ba wnia', chiyal' inezile ba zoa gao wli' Chioza' yel' wñabia' che'na'.

<sup>32</sup> 'Dii li nia' le', aga ba wit ben'ka' zoa naa kat' gak yog' diiki. <sup>33</sup> 'Yabana' na' yell-lioni te chegakin, san cho'a xtillaana' aga wde bi gak ka nan.

<sup>34</sup> 'Li wsak' bi we'le latj sho' diika' wxinjan yichjlall'do'lena'. Bi wlanzle yel' weezo, na' bi sezle wneyi bi chak chele. Li wsak' kwenche aga sha chel-le chon llana' zizaa. <sup>35</sup> La' tokonganzen gak diiki yen ile'i yog'te ben'ka' lle' doxen yell-lioni. <sup>36</sup> Na' le', li se wneyi, li inabi Chioza' toshiizi gaklene' le' kwenche yilale lao yog' diiki llia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

<sup>37</sup> Na' Jesúza' bli' bsedile' ben' yog' lla yoodo'na', na' ka chal, chjagaane' lo Yaa Olívoza'. <sup>38</sup> Na' yog' zil yog' ben' chajgake' yoodo'na' chjazenaggake' daa chli' chsedile'.

## 22

*Wloogake' xnezin witgake' Jesúza'*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Ba zoa gaozæ lni Paskwa' kat' chaogake' yetxtil daa bi nchix levadúrana'. <sup>2</sup> Na' bxozka' chñabia' len ben'ka' chli' chsedi leya' chiyiljall'gake' naklæ gongake' witgake' Jesúza' ka kono gakbe'i, la' bllébgake' shi bi goni ben' wllall che'ka' legake'.

<sup>3</sup> Na'ch xan dii xiw'ka' daa le Satanás wyoon loo yichjlall'do' Jud Scariota', beena' nak txen ben'ka' shllin.

<sup>4</sup> Na' wyaje' lao bꞥozka' chꞥabia' len lao beꞥ'ka' ngoo lall' na' beꞥ'ka' chap yoodo'na', na' bi'e dill' nakan gone' Jesúza' lall' na'gake'. <sup>5</sup> Na' le bibagakile' na' bꞥhebgake' we'gake'ne' mech. <sup>6</sup> Na'ch bꞥhebe' gone'ne' lall' na'gake'. Na' wzolo chinoe' batan gat' latj kat' kono beꞥ' lle' gone' Jesúza' lall' na'gake'.

*Lle'na' zeelo wdaolengake' Jesúza'*

*(Mt. 26:17-29; Mr. 14:12-25; Jn. 13:21-30; 1 Co. 11:23-26)*

<sup>7</sup> Na' bllin llana' chsini'agake' che lꞥina', llana' chzolo chaogake' yetxtil daa bi' nꞥhix levadúrana' na' chitgake' to xil'do', bana' gaogake' lle' Paskwa'. <sup>8</sup> Na'ch wlej Jesúza' Pédrona' len Juanna' na' chi'e legake':

—Li lljasini'a daa gaocho lꞥi Paskwi.

<sup>9</sup> Na'ch che'gake'ne':

—¿Garan cheenilo' lljasini'anto'n?

<sup>10</sup> Na' che' Jesúza' legake':

—Ka sho'le Jerusalénna', na' ile'ile to beꞥ' byo zino'e to chee nis, na' li lljanoe' axt yoono' gana' yilline'. <sup>11</sup> Na' ye'le xan yoono': “Maestrona' chꞥabile' li': ¿Garan zoa yoono' wyoone' gana' gaolene' beꞥ'ka' nakgake'ne' txen lle' Paskwi?” <sup>12</sup> Na' wliile' le' to yoo xen dii llia shkwiana' cha'lə ga ba nonshao'tie'. Nan' wsini'ale daa gaocho xshe'na'.

<sup>13</sup> Na' wloogake' nez zejgake', na' kon kayen' golle' le-gake' gok. Na' bsini'agake' daa wdaogake' lle' lꞥi Paskwa'.

<sup>14</sup> Na' ka gol' gaogake' xshe'na', Jesúza' wche'lene' postl che'ka' cho'a mesa'. <sup>15</sup> Na'ch chi'e legake':

—Ba goklall'chga' yeej gaolen' le' lꞥi Paskwi naa bin' witgake' nad'. <sup>16</sup> Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' ye'l wꞥabia' xen che'na', kana'ch yeej gawa'n dii yoblə.

<sup>17</sup> Na' bexee kopa' na' bi'e Chioza' yel' choxken, na' chi'e:

—Li gox' dga, li yeejan lat' wej. <sup>18</sup> Na' nia' le', bichga yeej' nis uvani ax̄t ki illin lla wli' Chioza' yel' wñabia' xen che'na'.

<sup>19</sup> Na'ch bexee yetxtila' na' bi'e yel' choxken Chioza'. Na' bxoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

<sup>20</sup> Na' lekzka' bene' ka wde wdaogake' xshe'na', bexee kopa' sto shii, na'ch chi'e:

—Dga yoll loo kopi zej̄in xchen'na' daa laljə ni chele daa gonan ka gaki dii koba' bcheb Chioza' gone'.

<sup>21</sup> 'Na' naa, beena' gone' nad' lo na' ben'ka' chakzi'gakile' nad' chi'lene' nad' cho'a mesi. <sup>22</sup> La' ba bllin lla gak ka nak daa llia bia' gak cha', nad', Ben' Bsel' Chioza' Yell-lioni, per jnyesh'laz gak che beena' gone' nad' lo na' ben' malka'!

<sup>23</sup> Na'ch ben'ka' nakgake'ne' txen wzologake' chñabi ljwellgake' noen' gone'ne' lo na' ben'ka'.

*Gokgued ben'ka' nak Jesúza' txen nogaken' zak'chi*

<sup>24</sup> Na' lekzka' chakdil-len ljwellgake' nogaken' nak ben' zak'chi. <sup>25</sup> Na' che' Jesúza' legake':

—Zoa ben' wñabia' to to nación, na' chongake' byen chzenag ben' chegake', na' nagake' che kwingake' le chaklengake' ben'. <sup>26</sup> San le', bi chiyal' gonle ka'. Shi nole nakle ben' zakii, chiyal' wchek' yichjle ka to bi' xkwid', na' shi nole chñabia', chiyal' gonle ka nottezə ben' wen mandad. <sup>27</sup> ¿Noran nak ben' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' ben' zak'chi. San nad', la'kzi naktia' xanle, zoa' ladjleni ka to ben' wen mandad chele.

<sup>28</sup> 'Le' ba wzoalenle nad' lao yog'te daa ba gok cha'.  
<sup>29</sup> Na' daan, gon' le' yel' w<sub>n</sub>abia'na' ka daa ben Xa'na' nad'.  
<sup>30</sup> Na' yeej gaolenle nad' gana' in<sub>a</sub>bi'a. Na' kwe'le gana' in<sub>a</sub>bia'le yizi'le kwent che shllin kwen ben'ka' nak xiin dia che dii Israela'.

*Jesúza' wne' bi w<sub>ch</sub>eb Pédrona' shi nombi'ene'*

*(Mt. 26:31-35; Mr. 14:27-31; Jn. 13:36-38)*

<sup>31</sup> Na' lekzka' golle' Simón Pédrona':

—Simón, Simón, Satanáza', daa ch<sub>n</sub>abia' dii xiw'ka', ba w<sub>n</sub>aban le' gakte lo na'yin kwen<sub>che</sub> gondinj gonganin le'. <sup>32</sup> Na' nad' ba w<sub>n</sub>abid' Chioza' gaklene' li', Simón, kwen<sub>che</sub> gon<sub>l</sub>ilall'cho nad'. Na' kat' ba biyajilo' cheyi daa gono', na' gakeno' ben'ki nako' txen kwen<sub>che</sub> soa<sub>che</sub>ch-gake' gon<sub>l</sub>ilall'gake' nad'.

<sup>33</sup> Na' che' Simónna':

—Xan', ba n<sub>ch</sub>og<sub>l</sub>allaa laa lillyana' sa'len' li' wa axt guetlen' li' txen.

<sup>34</sup> Na' che' Jesúza':

—Pedro, nia' li', naanlle' shon shii bi w<sub>ch</sub>ebo' shi nombi'o nad' ka zi' kwell shikwteza'.

*Ba zoa gaoz w<sub>t</sub>il* Jesúza' daa gak che'

<sup>35</sup> Na'ch che' Jesúza' legake':

—¿Azyalljile bi byalljile kana' bse<sub>l</sub>aa le' na' bibi be<sub>x</sub>'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

<sup>36</sup> Na'ch golle':

—Per naach nia' le', shi de ga ch<sub>g</sub>oo xalaanle, li go<sub>x</sub>aan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. <sup>37</sup> Nia' le', chonan byen gak cha' kon ka na Cho'a Xtill' Chioza' gana' na: “Gongakile'ne' ka chongakile' to ben' wen dii mal.”

<sup>38</sup> Na' che'gake':

—Xan', ni napnto' chop spad.

Na' chi'e:

—Liz li soachoklə.

*Be'lwill Jesúza' Chioza' gana' le Getsemaní*

*(Mt. 26:36-46; Mr. 14:32-42)*

<sup>39</sup> Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano ben'ka' nakgake'ne' txen. <sup>40</sup> Na' ka bllingake' latja', na' chi'e legake':

—Li we'lwill Chioza' kwenche bi we'zle latj gon beli chenna' le' gan.

<sup>41</sup> Na' bkwase' kwite'ka', ka to ga zeelo chllin to yaj dii chzal'cho, na'ch bchek' xibe'na' be'lwille' Chioza'. <sup>42</sup> Na' golle':

—Xa, shi li' cheenilo', bislagach nad' lawi dga ba zoa idił illag'; per aga gak ka cheenid', san gak ka cheenilo'.

<sup>43</sup> Na'ch bli'lao to anjl ben' za' yabana' le', na' biyo'ene' fuerz. <sup>44</sup> Na' daa le chakyesh'chgaile', zizikli be'lwille' Chioza' axt biyaklolje'. Na' nis yes che'na' daa chxop lo yona' nakan ka to bllon wej chen.

<sup>45</sup> Biyoll be'lwille' Chioza', na' bizollee biyaje' gana' lle' ben'ka' nakgake'ne' txen, na' ka billine' kwite'ka' ba chesgake' daa chakyesh'gakile'. <sup>46</sup> Na' chi'e legake':

—¿Berache cheszle? Li chas na' li we'lwill Chioza' kwenche bi we'zle latj gon beli chenna' le' gan.

*Bex'gake' Jesúza'*

*(Mt. 26:47-56; Mr. 14:43-50; Jn. 18:2-11)*

<sup>47</sup> Ni choe'te Jesúza' dill', ka bllin ben' zan, na' beena' le Jud, beena' nak txen ben'ka' shllin, nchi'e legake'. Na' ka blline' jabiguee kwit Jesúza' na' bnopo' xagueena'.

<sup>48</sup> Na'ch che' Jesúza'ne':

—Jud, ¿akon dga bnopo' nad' chono' nad', Ben' Bsel' Chioza' Yell-lioni, lo na' ben'ki?

<sup>49</sup> Na' ben'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awñiyainto' spadki?

<sup>50</sup> Na' toe' lii wdintie'n to mos che b̄xoz choo b̄xoz xenna' b̄chogtie' nague' de sh̄lina'. <sup>51</sup> Na' che' Jesúza':

—Bich bi gonile ben'ka'.

Na'ch bida' Jesúza' nag beena'. <sup>52</sup> Na' daa bllin b̄xozka' chñabia' len ben'ka' chap yoodo'na', na' ben' golka' chñabia', kwenche gox'gake'ne', chi'e legake':

—¿Berache za'zle nox'le yag na' spad kwenche zidñizle nad' ka to no ben' wban? <sup>53</sup> Yog' lla wzoa' ladjlena' yoodo'na' na' bi bex'le nad'. Per ñaach bllin lla gonle ka cheenile na' ñaayen' chñabia' dii mala' daa chñabia' gana' shgasj shchol.

*Bi b̄cheb Pédrona' shi nombi'e Jesúza'*

*(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

<sup>54</sup> Na'ch bn̄izgake' Jesúza' na' b̄che'gake'ne' lill b̄xoz choo b̄xoz xenna', na' zit' zit'lə zjano Pédrona'ne'. <sup>55</sup> Na' bxengake' yi'na' lesh' chyoo che b̄xoz choo b̄xoz xenna' na' wche'gake' cho'a yi'na', na' wlen Pédrona' legake'.

<sup>56</sup> Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

<sup>57</sup> Na' Pédrona' aga b̄chebe', na' chi'ene':

—Noolə, aga nombi'a beena'.

<sup>58</sup> Na' gokzə xtit bizle'i ben' yoblə Pédrona' na' chizi'ene':

—Lekzka' lenon' nako' ben'ka' txen.

Na' Pédrona' chi'ene':

—Bi len' nak' ben'ka' txen.

<sup>59</sup> Na' wizak ka do zi' tgor na' wize' sto ben' yoblə:

—Dii likzan len beeni nake' txen Jesúza' la' lekzka' ben' Galilean.

<sup>60</sup> Na'ch che' Pédróna'ne':

—iNi bi nezd' bi dillaan choo!

Na' ni che'telə Pédróna' ka', ka wchell to shikwtez.  
<sup>61</sup> Na'ch biyechj Xancho Jesúsza' bwie' Pédróna', na' Pédróna' jadinile' daa golle'ne', kana' chi'e: “Naanlle' shon shii bi wchebo' shi nombi'o nad' ka zi' kwell shikwteza'.”

<sup>62</sup> Na' bichej Pédróna' gana' lle' ben'ka' na' wchellyeshee.

*Btitjgakile' Jesúsza'*

(Mt. 26:67-68; Mr. 14:65)

<sup>63</sup> Na'ch ben'ka' chapgake' Jesúsza' btitjgakile'ne' na' wdap' wllall'gake'ne'. <sup>64</sup> Na' bsejgake' jalawe'na', na'ch wllall'gake'ne', che'gake'ne':

—iWnashki non wllall' li'!

<sup>65</sup> Na' biya dii gollgake'ne' kwenche gakile' zi'.

*Wde Jesúsza' lao ben'ka' chnabia'gake' ben' Israelka'*

(Mt. 26:59-66; Mr. 14:55-64; Jn. 18:19-24)

<sup>66</sup> Na' ka wyeeni', bidop ben'ka' chnabia' ben' Israelka', len bxożka' chnabia' na' ben'ka' chli' chsedi leya'. Na' bdegake' Jesúsza' lawe'ka'. Na'ch wnabgakile'ne', che'gake':

<sup>67</sup> —Wnashki neto' shi li'kzan Crístona', beena' chbeznto'.

Na' che' Jesúsza':

—Shi inia' le': “Awe, nadaan”, aga wyajle'le cha'. <sup>68</sup> Na' shi inabid' le' bi dii inabid' le', aga williilen na' ni bi yisanle nad', shi naa. <sup>69</sup> Na' naate, nad', Ben' Bsel' Chioza' Yellioni, kwi'a kwit de shli che Chioza', beena' nap ye!' wak xenna'.

<sup>70</sup> Na'ch yog'ze' wnabgakile'ne':

—iAna' lin' nako' Xiin Chioza'?

Na'ch che' Jesúsza':

—Awe, shlikzan ba wnale.

<sup>71</sup> Na'ch che' ljwellgake':

—Kochno chyaljicho gawe' xya che beeni. Kwintekz-cho ba benicho ka ba wne'.

## 23

### *Wde Jesúza' lao Pilátona'*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Na'ch yog'loł ben'ka' bizolla'gake' na' jwa'gake' Jesúza' lao Pilátona'. <sup>2</sup> Na'ch wzologake' chaogake' xya che Jesúza', che'gake':

—Ba bidolinto' beeni chta chnie' ben' wlall chento'ka'. Chi'e bi chiyal' chixjcho daa chnab Césara', beena' chnabia', na' lekzka' naze' nake' Crístona', na' daa ne' ka' zejın nake' to ben' wñabia'.

<sup>3</sup> Na'ch wñabi Pilátona' Jesúza', chi'ene':

—¿Alin' nako' ben' wñabia' che ben' Israelki?

Na'ch che' Jesúza'ne':

—Kan' nakan.

<sup>4</sup> Na'ch che' Pilátona' bxožka' chñabia' na' yog' ben'ka' lle' na':

—Ni to dii mal bi chillelid' chon beeni.

<sup>5</sup> Na' zizikchli che'gake':

—Diika' chli' chsedile' chta chnen yog'loł ben' lle' doxen lallnto'ni. Wzoloze' Galileana', na' axt Judeani ba bide'.

### *Bde Pilátona' Jesúza' lao Heródeza'*

<sup>6</sup> Ka gollgake' Pilátona' ka', na'ch wñabile' legake' shi nak Jesúza' ben' Galilea. <sup>7</sup> Na' ka wñezile' nake' ben' Galilea, na'ch bdie'ne' lao Heródeza', beena' nłane' chñabi'e Galileana', la' kana'yen' zoa Heródeza' Jerusalénna'. <sup>8</sup> Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' ben' xtilleena'. Na' goki Heródeza' ile'ile' gone' to yeł' wak. <sup>9</sup> Na' biya dii wñabile' Jesúza', na' ni to daa wñabile'ne' bi billi'e. <sup>10</sup> Na' lekzka' na' lle' bxožka' chñabia' len



ben'ka' chli' chsedi leya', na' zizikli chaogake' xya che Jesúza'. <sup>11</sup> Na'ch Heródeza' len soldad che'ka' biya dii bengakile'ne', na' btitjgakile'ne' bwakwgake'ne' to lech' ka daa chakw to ben' wñabia'. Na'tech bizsel' Heródeza'ne' lao Pilátona'. <sup>12</sup> Na' lo llana' bizoalen Pilátona' Heródeza' wen, la' kana'te chakzbani ljwelle'.

*Bchoglogake' guet Jesúza'*

(Mt. 27:15-26; Mr. 15:6-15; Jn. 18:39-19:16)

<sup>13</sup> Na'ch biti'a Pilátona' bxozka' chñabia', na' ben'ka' chñabia'gake' ben' Israelka' na'ch ben' yell, <sup>14</sup> na' golle' legake':

—Le' bidwa'le beeni lawii, nale chta chñie' ben', na' nad' ba wñabidee laoleni, na' bi chillelid' ni to daa nale che' shi li ka chone'n. <sup>15</sup> Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile aga bi bene' inacho wchoglozcho guete'. <sup>16</sup> Na' naa gon' mandad wit chingake'ne' na'tech yisane.

<sup>17</sup> Na' ka chakz yog' yiz, chiya' yisane' to beena' nej lillyana' kat' chal' lni Paskwa'. <sup>18</sup> Na' yog' ben'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

<sup>19</sup> Nyixjgake' Barrabáza' lillyana' daa bxie' wdila' yell Jerusalénna', na' bettie' to ben'. <sup>20</sup> Na' daa cheeni Pilátona' yisane' Jesúza', na' stokzə wñabile' ben'ka' shi wisane'ne'. <sup>21</sup> Na' ben'ka' zizikchli chosyaagake', che'gake':

—¡Bdee lee yag cruza'! ¡Bdee lee yag cruza'!

<sup>22</sup> Na' de wyon shiyi che' Pilátona' legake':

—¿Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisane.

<sup>23</sup> Na' ben'ka' wzeyidgake' chosyaagake' chñabgak-ile'ne' wdeene' lee yag cruza'. Na' daa wzeyidgake'

chosyaagake', bengake' gan wzoa xtilleeka'. <sup>24</sup> Na' bchoglall' Pilátona' gone' ka cheeni ben'ka'. <sup>25</sup> Na' bisane' beena' wñabgake', beena' de lillyana' daa bxie' wdila' na' daa bettie' to ben'. Na' bene' Jesúza' lo na'gake' kwenche gongakile'ne' ka chaklall'gake'.

*Bda'gake' Jesúza' lee yag cruza'*

*(Mt. 27:32-44; Mr. 15:22-32; Jn. 19:17-27)*

<sup>26</sup> Na' ka nche'gake' Jesúza' lljada'gake'ne' lee yag cruza', billaggake' to ben' Cirene lie' Simón zizee lyixaa. Na' bex'gake'ne' bwa'gake'ne' yag cruz che Jesúza' na'ch janoe'ne'.

<sup>27</sup> Na' ben' zan zjanogake'ne', na' zan noolka' chbell-gake' na' chosyaagake' ni che Jesúza'. <sup>28</sup> Na' biyechj Jesúza' bwie' legake' na' golle':

—Le' nool Jerusalén, bi kwelzle cha'; li kwel che kwindle na' che xiinleka'. <sup>29</sup> La' wllin lla kat' ina ben': “Chakomba nool willka', ben'ka' bi wxan na' bi bwall bxopgake'.” <sup>30</sup> Na'ch ben'ka' zoa llana' gak ka', solo inagake': “Shel' iyinjtega yaa yaoki idakwtegan neto'.”

<sup>31</sup> Shi yag yaa yag banna' chongakile'n kon daa nazan chegake', ¿alechla ki gongakile' yag billa'?

<sup>32</sup> Na' lezkza' nche'gake' chop ben' wen dii mal kwenche witgake' legake' txen len Jesúza'. <sup>33</sup> Na' ka bllingake' latja' gana' le Llit Yichj Ben' Wet, bda'gake' Jesúza' lee yag cruza'. Na' lezkza' bda'gake' chopte ben' wen dii malka' shlaa wej kwite'na'. <sup>34</sup> Na' ka chda'gake' Jesúza' lee yag cruza', chi'e:

—Xa, wxi'xen chegake', la' aga nezgakile' bin chongake'.

Na' soldadka' bengake' to wyitj kwenche wnezgakile' nogake' yido! xe'na'. <sup>35</sup> Na' lle' ben' zan chwiagake', na' axt ben'ka' chñabia'gake' ben' Israelka' btitjgakile'ne', nagake':

—Gok bisle' ben' yoblə, na' naa yishashki kwine' shi leile' len' Crístona', beena' ba wlej Chioza'.

<sup>36</sup> Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'. <sup>37</sup> Na' che'gake'ne':

—Shi lin' nako' ben' wnabia' che ben' Israelki, bislashki kwino'.

<sup>38</sup> Na' yichj yag cruz che'na' bda'gake' to dii cho'en dill' biche nda'gake'ne' lee yag cruza', nan: “Beenin ben' wnabia' che ben' Israelka'.” Bzejgake'n dill' griego, dill' latín na' dill' hebreo.

<sup>39</sup> Na' to ben' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

<sup>40</sup> Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'. <sup>41</sup> Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

<sup>42</sup> Na'ch golle' Jesúza':

—Jesús, lljadingachilo' nad' kat'ka' solo inabi'o.

<sup>43</sup> Na'ch che' Jesúza'ne':

—Dii li nia' li', naanlla soaleno' nad' latja' gana' nak mbalaz.

*Wit Jesúza'*

*(Mt. 27:45-56; Mr. 15:33-41; Jn. 19:28-30)*

<sup>44</sup> Na' do ka gobill bichol doxen yell-liona', bllinte do ka chida shon, <sup>45</sup> daa bich bzeeni' wbillla'. Na' lechaa ze loo yoodo'na' blon' gokan chop laalə. <sup>46</sup> Na'ch besyaa Jesúza' zilljə, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

<sup>47</sup> Na' ka ble'i beena' chn<sub>h</sub>abia' soldadka' diika' gok, be'lawee Chioza', chi'e:

—Dii li beeni nake' dowaļj be<sub>n</sub>' wen.

<sup>48</sup> Na' yog' be<sub>n</sub>'ka' lle' na', ka ble'gakile' ka gok, ziyaj-gake' chball'gake' cho'alcho'eka'. <sup>49</sup> Na' yog' be<sub>n</sub>'ka' nom-bia'gake' Jesúza', do noolka' za'lengake'ne' axt Galileana', wzegake' zit'lə chwiagake' ka gok.

*Bkwash'gake' Jesúza'*

*(Mt. 27:57-61; Mr. 15:42-47; Jn. 19:38-42)*

<sup>50</sup> Wzoa to be<sub>n</sub>' wlie' José, be<sub>n</sub>' yell Arimatea, daa mbani Judéana'. Na' Joséna' nake' txen be<sub>n</sub>'ka' chn<sub>h</sub>abia' be<sub>n</sub>' Israelka'. Nake' to be<sub>n</sub>' wen na' to be<sub>n</sub>' chon ka cheeni Chioza', <sup>51</sup> na' zoe' chbeze' wseļ' Chioza' beena' in<sub>h</sub>abia'. Na' Joséna' aga wyoolallee ka ben be<sub>n</sub>'ka' chn<sub>h</sub>abia'lene' daa betgake' Jesúza', na' bi benlene' legake' txen. <sup>52</sup> Na' ch wyaje' lao Pilátona' na' w<sub>n</sub>abe' lsens yiletje' kwerp che Jesúza'. <sup>53</sup> Na' biletje'ne' lee yag cruza', na' ch bitobe'ne' to lech' xen na' jlo'ene' to loo blej daa beshawee, ga bi<sub>n</sub>' wkash'gake' ni tlish' be<sub>n</sub>' wet. <sup>54</sup> Na' llana' gok diiki nakan lla chsini'a be<sub>n</sub>' Israelka' chegake' kwenche bibi llin gongake' lla sabda', llana' chombaangake', na' zi lat'zə chyallj solo llana' chombaangake'.

<sup>55</sup> Na' noolka' za'lengake' Jesúza' axt Galileana', wyaj-gake' jawiagake' bleja' na' jale'gakile' nak wdixjgake' kwerp che'na'. <sup>56</sup> Na' ch biza'gake', na' ka billingake' gana' zoagake', beshao'gake' daa chl'a' zix. Na' bizi'lall'gake' lla sabda' kon ka na leya'.

## 24

*Biban Jesúza' ladj be<sub>n</sub>' wetka'*

*(Mt. 28:1-10; Mr. 16:1-8; Jn. 20:1-10)*

<sup>1</sup> Na' lla necha' chizolo xmanna', wizaj noolka' ni baļ cho'a bana', nox'gake' diika' chl'a' zix daa beshao'gake',

na' wyaj zi ba<sub>l</sub> noolə yoblə kon legake'. <sup>2</sup> Na' ble'gakile' aga chi'ch yaja' cho'a bana'. <sup>3</sup> Na' wyoogake' loo bleja', na' ble'gakile' aga bich bi kwerp che Xancho Jesúsza' de na'. <sup>4</sup> Na' shlak chakgakile' bera zejın dga, kat'kzali ble'gakile' chop ben' byo, nakwgake' lech' dii chey cheeni', zegake' kwite'ka'. <sup>5</sup> Na' noolka' bllbchgagake' na' b<sub>ch</sub>ek' yichje'ka' axt lo yona'. Na'ch ben'ka' zena' che'gake':

—¿Berache chiyiljzle beena' mban ladj ben' wetki? <sup>6</sup> Kochno de ni. Ba bibane' ladj ben' wetki. Li lljadini daa wne' le' kana' zoalene' le' Galileana'. <sup>7</sup> Wne' chonan byen Beena' Bse!<sub>l</sub> Chioza' Yell-lioni gake' lo na' ben' malka', na' witgake'ne' lee yag cruza', na' ka yiyon<sub>l</sub> lla yibane' ladj ben' wetka'.

<sup>8</sup> Na'ch jadini noolka' daa goll Jesúsza' legake'. <sup>9</sup> Na' biza'gake' biyajgake' gana' lle' postlka' shnej len yog' ben'ka' sto gokgake'ne' txen, na' be'gake' dill' yog' daa gok chegake'. <sup>10</sup> Na' noolkin jayellgake' postlka' daa gok chegake': María ben' yell Magdálana', Juánana', María xna' Jacóbona', na' len zi ba<sub>l</sub> nool yoblə. <sup>11</sup> Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

<sup>12</sup> Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'lə. Na'ch bizee zjade' gana' zoe' chibanile' ka nak daa ba gok.

*Bli'lao Jesúsza' chop ben' tnez Emaúza'*

*(Mr. 16:12-13)*

<sup>13</sup> Na' lo llana' gok ka', chop ben'ka' nak Jesúsza' txen wyajgake' to yell dii le Emaús, na' n<sub>l</sub>aa ljwellin ka do shnej kilometro kon Jerusalénna'. <sup>14</sup> Na' lo zej ngoogake' nez choe'gake' dill' cheyi diika' ba gok. <sup>15</sup> Na' shlak choe'gake' dill' cheyi diika' gok, na' jabig' kwin Jesúsza' kwite'ka'

na' zejlene' legake' txen. <sup>16</sup> Na' la'kzi chwiagake'ne', aga gokbe'gakile' no beena'. <sup>17</sup> Na'ch wñabi Jesúza' legake':

—¿Bera dillaan choe'le za'le ni? ¿Berache chakyesh'zile?

<sup>18</sup> Na' toe', beena' le Cleofas, chi'ene':

—Yog'zə ben' ñezgakile' daa ba gok Jerusalénna' llaki ba wde. ¿Astozo' li' bi ñezilo' daa ba gok?

<sup>19</sup> Na'ch chi'e legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel' wak na' bi'e dill' zakii dii nak shli lao Chioza' na' lao ben'. <sup>20</sup> Na' bñozka' chñabia' na' ben'ka' chñabia'gake' cho' ben' Israel bengake'ne' lo na' joschiska' kwenche bñoglogake' che' guete', na' bda'gake'ne' lee yag cruza'. <sup>21</sup> Neto' nonnto' lez nan len' yibeje' cho' ben' Israel lo na' ben' zit'ka'. Na' ba gok shon' lla gok diiki. <sup>22</sup> Na' bal' noolka' nak neto' txen wyajgake' cho'a bana' daa baabali, na' le bibaninto' ka wñagake' <sup>23</sup> bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, ben' goll legake' mbankzə Jesúza'. <sup>24</sup> Na'ch wyaj bal' ben' byoka' nonlennto' txen cho'a bleja', na' nakan kon ka wna noolka', per aga no Jesúza' ble'gakile'.

<sup>25</sup> Na'ch che' Jesúza' legake':

—¿Le' ben' bi chajni! ¿Bi llabia' bat shajle'le daa bzej dii ben'ka' wdixjee daa goll Chioza' legake'? <sup>26</sup> ¿Abi ñezile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan xenna'?

<sup>27</sup> Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

<sup>28</sup> Na' ka bilingake' yella' gana' zejgake', bentezə Jesúza' ka ben' shaj gan yoblə. <sup>29</sup> Na' ben'ka' bengake' byen yigaañlene' legake', che'gake'ne':

—Bigaanlen neto', la' ba wlle' naa, na' ba chał.

Na'ch wyoo Jesúza' bigaañlene' legake'. <sup>30</sup> Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bxoxje'n na' bi'en legake'. <sup>31</sup> Na'ch biyombia'yen' gake' nan len' Jesúza', na' to binit-loze'. <sup>32</sup> Na'ch che' ljwelle':

—ıBera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

<sup>33</sup> Na'ch lii biza'tegake' ziyajgake' Jerusalénna'. Na' ka bilingake', ndop nllag postlka' shnej na' nochlə ben'ka' nakgake'ne' txen, <sup>34</sup> na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

<sup>35</sup> Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bxoxje' yetxtila' bi'en legake'.

*Jali'lao Jesúza' ben'ka' nakgake'ne' txen*

*(Mt. 28:16-20; Mr. 16:14-18; Jn. 20:19-23)*

<sup>36</sup> Na' shlak ni choe'gake' dillaa, tokonganzi jaze Jesúza' ladje'ka' na' bwape' legake' chiox, chi'e legake':

—Soashgale mbalaz.

<sup>37</sup> Na' le bllebgake' daa chakgakile' yel bxenzan chwia-gake'. <sup>38</sup> Na' che' Jesúza' legake':

—ıBerache chllebzle? ıBiçe chak choplall'zle? <sup>39</sup> Li wwia ni'a na'ki kwenche inezile nad'kzan. Li gox' nad' kwenche inezile aga nak' to yel bxen, la' to yel bxen bibi bel' bibi llit yoon ka nak' nad'.

<sup>40</sup> Na' ka golle' legake' ka', bliile' legake' ni'a neena'.  
<sup>41</sup> Na' yel' chiba chizaki che'ka' na' yel' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

<sup>42</sup> Na'ch be'gake'ne' lat' bel ba bwey'gake' lo yi'na'.

<sup>43</sup> Na' be<sub>x</sub>eeb wdawe'b chwiategake'. <sup>44</sup> Na' chi'e:

—Ka nak daa ba gok cha', lennan' wnia' le' kana' ni zoalen' le', kana' wnia' llia bia' yillinin gak cha' yog' diika' bzej dii Moiséza', na' diika' bzej dii ben'ka' wdixjee daa goll Chioza' legake' na' diika' da' lee sálmoka'.

<sup>45</sup> Na'ch ben Jesúsza' ka wyajni'gakile' diika' na Cho'a Xtill' Chioza', <sup>46</sup> chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon lla yibane' ladj ben' wetka'. <sup>47</sup> Na' lekzka' nan: ides cho'a xtilleena' daa nan shi yiyaj yileni ben' dii malka' chongake' na' yiyakxen chegake'. Na' solozan Jerusalénni na' illiljan doxente.

<sup>48</sup> Na' le' chiyal' ye'le ben' yog' diiki ba ble'ile gok cha'.

<sup>49</sup> Na' nad' wselaabeena' bcheb Xa' Chioza' gone' gaklene' le', na' li soatezə Jerusalénni axt kat'ch Xa'na' gone' le' yel' waka' daa za' yabana'.

### *Biyep Jesúsza' yabana'*

*(Mr. 16:19-20)*

<sup>50</sup> Na'ch bche' Jesúsza' legake' wyajgake' yell Betániana'. Na' blis neena' benleeye' legake'. <sup>51</sup> Na' ni chonleeytie' legake', ka bikwase' kwite'ka' na' biyep'e yabana'.

<sup>52</sup> Na' ben'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'.

<sup>53</sup> Na' wzoatezi wzoagake' be'la'ogake' Chioza' yoodo'na'.



## Dill' wen dill' Kob Che Jesucristona'

New Testament in Zapotec, Cajonos (MX:zad:Zapotec, Cajonos)

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 14 Mar 2019 from source files dated 21  
Dec 2018  
f98bf0c8-4467-559d-82ab-96644a44d38f